

प्रभु यीशु मसीह दा शुभ संदेश

१. इस करी के मतेयां ने तिना गल्ला दा जे असां मझ गुजरी हिन इतिहास लिखने च हथ लगाया है। २. जिया जे उन्हाने पहले का ही इना गल्ला दे दिखने वाले अते पवित्र बचन दे सेवक थे असां तीकर पहुचाया। ३. इस करी के हे श्रीमान् थियुफिलुस मिन्जो भी ऐ ठीक लगेया जे उना सारी गल्ला दा पूरा-पूरा हाल शुरू का ठीक-ठीक पता करी के, उन्हा जो तेरे ताई बारी-बारी लिखा। ४. ता जे तू ऐ समझी जाये, जे सै गल्ला जुसेरी तै शिक्षा पाई है, कदेई पक्की हिन।

बपतिस्मा देने वाला यूहन्ना

५. यहूदिया दे राजे हेरोदीस दे जमाने विच अबिया दे कबीले विच जकरिया नां दा इक पुरोहित थिया। ओह कने उसेरी घरेवाली जणनी हारून दी ऊलाद का थी जिसेरा नां इलीशिबा थिया। ६. ओ दोइयो खुदा दे बड़े भक्त कने खुदा दे हुक्मा अते कानुना उपर चलने वाले थिए। ७. उन्हां दी



उलाद नी थी जिसदी वजह कने ऐ थी कि इलीशिबा बांझ थी। ते कने दोईयोई बड़ी उमर दे थिये।

८. इक दिन इयां होया कि जिस वेले ओ अपनी बारी कने रिवाजा दे मुताबिक खुदा दी भक्ति करदा थिया। ९. तां उसदी बारी आई कि ओह भी जाई करी खुदा दे घरे धूप धुखाये। १०. इसकरी के ओह खुदा दे घरे विच जिस वेले धूप धूणी धुखाणा गया तां बाकी लोक बाहर खड़े होई करी प्रभु दी भक्ति करदे थिये ११. उस वेले अन्दर वेदी दे दहणे हत्थे जिते धूप धूणी धुखी री थी उत्ते इक फरिश्ता उसजो लिभया १२. जकरिया उसजो दिखी करी डरी गया। १३. अपर फरिश्ते ने उसजो बोलया—जकरिया डरें मत किजो के तेरी विनती प्रभु ने सुणी लेई, तां अवे तेरी घरेवाली इलीशिबा दे घरे पुत्र हुंगा, पर तू उसेरा ना यहून्ना रखयां। १४. इस कने तिजो बड़ी भारी खुशी हुंगी और दूसरे लोक भी उसरे जमणे पर खुशी हुंगे १५. किजो के ओह प्रभु दी नज़रां विच बड़ा बड्डा हुंगा ओह कोई शराब या नशे वाली चीज़ नी पींगा अते अपनी मां दे पेटे विच ई पवित्र आत्मा कने भरी जांगा। १६. ओह क्वेराईल दे मते लोकां जो प्रभु पासे ढालगां १७. ओह ऐलिया सांहीं बड़ी ताकत वाली प्रभु दा भूठियार हुणां। ओह दुबारा पयो-पुत्रां जो मिलांगा ते कने जेहड़े प्रभु जो नी मन्दे उन्हां जो ठीक रस्ते पर पाई करी प्रभु दी पक्की जात बणांगा। १८. जकरिया ने बोलया कि मैं कियां इस गल जो भन्ना किजो कि मैं बुढा होई गये रा ते मेरी घरावाली वी बुड्डी है। १९. फरिश्ते ने जबाब दिता कि मैं जबराईल जेढा परमेश्वरे दे सामने खड़ा रहन्दा ते मिन्जो इसी वास्ते भेज्या कि तिजो मैं ऐ खुशखबरी दस्तां। २०. पर तिजो मेरे गलाणे पर विश्वास नी आया पर ए अपने मौके पर पूरा होई के रहणा जां ताई एह गल सच्ची नी होई जान्गी ता ताई तू बोली नी सकगा २१. जिस वेले एह गल्लां हुंदिया थियां तो लोक उसजो बाहर भालदे थिये ते कने हैरान थिये हुन्दे कि इसजो मन्दिर दे अन्दर इतनी देर किजो लगी गई। २२. जिस वेले ओ बाहर आया तां उन्हां कने गल नी करी सकया तो लोकां जो पता लगया कि इसने अन्दर किछ परमेश्वरे दा दर्शन दिखया किजो कि ओ जल्लयां सांही इशारे करदा रहया। २३. जिस मौके उसदी भक्ति दे दिन पूरे होई गए तां ओ अपने घरे जो चली गया। २४. थोड़े दिनां बाद उसदी घरेवाली पेटभारी होई गई अते उसने पंज महीने तक ए गल्ल लुकाई छड़ी। २५. कि इन्हा दिनां विच प्रभु ने लोकां का मेरी दबनामी होणे का मिन्जो बचाने वास्ते ऐसा कीता।

प्रभु यीशु दी जामणी (जन्मदिन)

२६. छेमे महीने विच परमेश्वरे ने जबर्राईल फरिश्ते जो गलील दे इक शहर नासरत विच इक कुआरी का भेजया २७. जिसदा ना मरियम थिया ते उसेरी मंगणी युसुफ ना रे इक आदमी जेहड़ा दाऊद दे खानदान दा थिया तसेरे कने होई दी थी। २८. फरिश्ते ने उसजो आई करी बोलया — सलाम तिजो कि तेरे ऊपर परमेश्वरे दी मेहरबानी होई। प्रभु तेरे कने हैं। २९. ओ एह गल्ल सुणी करी घबराई गई ते सोचणा लगी कि ऐ कदया सलाम है। ३०. फरिश्ते ने उसजो बोलया कि ऐ मरियम तू मत डरें किजो कि परमेश्वरे ने तेरे ऊपर मेहरबानी कीती ३१. कि तू पेटभारी हुंगी तां तेरे घरे इक पुत्र हुंगा तु ए उसेरा ना यीशु रखयां ३२. ओ बड़ा धर्मात्मा हुंणा ते परमेश्वरे दा पुत्र बोलया जांगा। परमेश्वरे उसजो अपने पुरखां दाऊद उसजो राज दिंगा। ३३. और याकूब दे टूबरा पर आखिर तक राज करगां ता उसदे राज दा खातमा कदी वी नी हुंगा। ३४. मरियम ने फरिश्ते जो बोलया कि ऐ गल्ल कियां होई सकगी। मैं मणु जो ता जाणदी नी। ३५. फरिश्ते ने परती करी बोलया कि पवित्र-आत्मा तेरी खोखा विच आणी, ते परमेश्वरे दी कुदरत ने तेरे ऊपर परछावां पाणां तां जाई करी ओ परमेश्वरे दा पवित्र पुत्र बोलया जाणां, ३६. कन्ने ऐ भी सुण कि तेरी रिश्तेदार इलिशबा दे घरे भी बुढे बूढे बूढे पुत्र होणे वाला है। जिस जो पहले बांभ बोलदे थिये उस जो अवे छेमा महीना लगे दा है। ३७. किजो के जो गल्ल परमेश्वरे ने बोली दी है ओ कदी भूठ नी जांदीरे। ३८. मरियम ने जबाब दिता कि दिख मैं परमेश्वरे दी पुजारन हांऐ ते मिन्जो उदेया ई होये जिदया तू बोलया। तां फरिश्ता उसेरे का चली गया।

मरियम दा इलिशबा दे घरे जाणां ते कने मरियम दा गीत

३९. उन्हां ही दिनां मरियम भटपट यहूदा दे इक नगरां जो चली गई ४०. ते जकरिया दे घर जाई करी इलिशबा जो सलाम किती। ४१. जिस मौके मरियम दा सलाम इलिशबा वे सुणयां उसेरे पेटा विच बच्चा उछलया। इलिशबा पवित्र आत्मा कन्ने शरी गई। ४२. ते ओ उच्ची आवाज कन्ने बोलने लगी कि तू जनानियां विच धन्य है ते कने तेरे पेट दा फल भी धन्य है। ४३. मेरे

ऊपर ऐ कृपा कुंतां का होई के मेरे प्रभु दी अम्मा मेरे का आई ? ४४. किजो कि जिहां ई तेरे सलाम दी आवाज मेरे कन्नां च आई तिहां ही बच्चा पेटे-च-खुशी कने उछली पेया ४५. ते धन्य ऐ तू जेहड़ी कि प्रभु दीया गल्लां जो सच्च मनी गई कि ओ पुरियां होई जागियां । ४६. फिरी मरियम ने बोलया कि मेरी जिन्द प्रभु दी बढ़ाई करदी है । ४७. अते कने मेरी आत्मा मेरे बचाणे वाले प्रभु कने खुशी होई, ४८. किजो कि उसने अपनी पुजारिन जो गरीब हालत विच दिखया, ते दिख अबे का लेईकरी अगे तिकहर जमाने दे मणु मिजो धन्य बोलगें, ४९. किजो कि उस प्रभु ने मेरे वास्ते बड़े बड़े कम किते, ते उसदा नां पवित्र है । ५०. ते उसदी मेहरबानी उन्हां समना पर-ए-जहड़े उसका डरदे, ते ऐ मेहरबानी पीढ़ीया तक रहंगी । ५१. प्रभु ने अपनी बाईयां दा जोर दसया ते जेहड़े अपने आप जो बडा समझदे थिये उन्हा जो हराया । ५२. उसने बड़े बड़े राजयां जो उन्हां दे आसना का भुईयां सुटी दिता ते गिरे दे लोकां जो ऊपर चूकीदा । ५३. उनी भुखयां जो खरी खरी चीजां कने रजाई दिता ते अमीरा जो खाली हत्थे भेजी दिता । ५४. ते ओ अपने इसराईल दी मदद वास्ते आई गया । ५५. ते ओ अपनी मेहरबानी जो याद करवांगा जेहड़ी उसने अब्राहम ते उसदी उलाद पर हमेशा वासते कीती, जिहां उसने हमारे बाबयां दादयां कने बोलया थिया । ५६. मरियम कोई तीन महीने उसदे कन्ने रेई करी अपने घरे मुडी आई ।

यहून्ना बपतिस्मा देने वाले की जन्म

५६. इलिशबा दे जमणे दा वक्त आई गया ता उसदे घरे पुत्र होया । ५७. उसदे पडैसी ते भैयात ने ऐ सुणी करी कि प्रभु ने उस पर बड़ी दया कीती ता उसदे कन्ने मिली करी बड़े खुशी होए ५८. ते अठवें दिन ओ मुण्डे दा खतना करने जो आये ते उसदा ना बाबे दे ना पर जकरिया रखणे लगे । ६०. पर उसदी अम्मां ने बोलया कि इसदा नां यहून्ना रखो ६१. उन्हांने उसा जो बोलया कि तेरे टब्वर विच-ता कुसेरा भी ए ना नी है । ६२. तां उन्हां ने उसदे बाबे का पुछया ६३. कि तू इसेरा ना क्या रखणा चाहंदा । उसने फटी मंगाई ते उस पर लिखया कि उसदा नां यहून्ना रहे, तां सारे बड़े हैरान होई गये । ६४. उसी मौके उसदा मुंह ते जबान खुली गई, ते ओह बोलणे ते कन्ने प्रभु दी बडीयाई करणा


लगया । ६५. उन्हां दे एताई उताई रहणे वाले लोक डरी गये ते यहुदिया दे सारे पहाड़ी इलाके बिच ए गल्ला फैली गईयां । ६६. सारे सुणने वालेयां ने अपने मना विच सोचया कि ऐ मुण्डा कदेया हुंगा किजो कि प्रभु दा हथ इस ऊपर थिया । ६७. ते उसदा बाबा जकरिया पवित्र आत्मा कन्ने भरी गया ते पुच्छा दिन्दे होये बोलणे लगया ६८. कि प्रभु जो इसराईल दा है उसदी जै हो । किजो कि उसने अपनी (कौम) लोकां ऊपर मेहरबानी कीति ते उन्हां जो छुटकारा दिता, ६९. ते अपने, सेवका दाऊद दे घरे विच मुक्ति दा रस्ता कडया । ७०. जेहड़ा उसने अपने पाक नबिया दी जबानी बोलया थिया जेहड़े दुनियां दे मुड्डा का हुन्दे आये । ७१. यानी असां जो हमारे दुश्मणा दे हथे का छुटकारा दिता ७२. तां जे ओ असां दे बब-दादयां पर रहम करे, ते अपने पवित्र वचना जो याद रखे ।

७३. यानी उसा कसम जो जेहड़ी उसने हमारे बब इब्रहम कन्ने खाई थी, ७४. कि ओह असां जो दुश्मणा दे हथां का छुड़ाई करी ७५. सच्ची ईमानदारी कने उमर भर डरे बगैर उसदी भक्ति करदे रेइए ७६. तां तू ऐ मुण्डे प्रभु दा नबी बोलया जांगा ७६. किजो के तू प्रभु दा रास्ता बणांदा-बणांदा अग्रे चलंगा ७७. ता जो उसदे लोका जो मुक्ति दा रस्ता दसगा जेहड़ उन्हां जो अपने पापां दी मुआफी का मिलदा है ७८. ऐ सब कुच्छ हमारे प्रभु दी मेहरबानी कन्ने हुंगा । जिस दी बजह कन्ने सारी दुनिया दा सूरज हमारे उपर चमकगा । ७९. ता जे ओह जेहड़े अन्धेरे ते मौत दे परछावें थल्ले बैठे दे ने उन्हां जो लो दे ते असां दे पैरां जो शान्ति दे रस्ते पर चलाये । ८०. ते ओह मुण्डा बददा गया ते पवित्र आत्मा कन्ने ताकत पान्दा गया । ते कन्ने ओ इसराईल-च-जाणेवेदे दिन तक जंगलां-च-रेहया ।

यीशु बी जामणी

२ उन्हां दिनां अगस्तस कैसर ने हुकम दिता कि सारी दुनियां दे लोकां दे नां लिखे जाण २. ऐ पहली ना दी लिखाई कोरीनियस हाकम दे जमाने-च-होई ३. ते सारे लोक नां लखाणे ताई अपने अपने शहरां-च-गये ४. युसुफ भी गलील दे शहर नासरत का दाऊद दे शहर बैतलहम-च-गया जेहड़ा यहुदिया विच

है, किजो के ओ दाऊद दे टबबर विचे का थ-५. ता जो ओ अपनी मंग मरियम जेहड़ी पेटभारी थी उसदे कन्ने नां लखाये । ६. जिस मौके ओ उत्ते थीये ता इयां होया कि उसदा जमणे दा टैम आई गया । ७. ता उसदा जेठा पुत्र होया ।



उसने उसजो कपड़ो-च-लपेटी करी चरणी विच रखया किजो कि उसदे वास्ते सरां-च-कोई जगह नी थी । ८. उसी इलाके-च-कुच्छ चरवाहे भी थिये ओ अपनी भेड़ा दी रखवाली करदे खेतां विच रात कटे थिये करदे ९. ता प्रभु दा



फरिश्ता उन्हां जो लिवया जिसने उन्हां जो प्रभु दी महिमा दस्सी । ओ बड़े डरी गये १०. फरिश्ते ने उन्हां जो बोलया - डरो मात ! मैं तुसां जो इक खुश खबरी देणें आया जेहड़ी दूसरे लोकां जो भी सुणी करी बड़ी खुशी हुंगी - ११. इस रात दाऊद दे शहर विच तुसां जो बचाणे वाला पैदा होई गया है । - प्रभु यीशू - १२. तुसां जो पछाण ए हुंगी कि तुसी इक बच्चे जो कपडेयां-च-लिपटया दा चरणी विच पांगे ।

१३. उसी मौके स्वर्ग दे फरिश्तयां दी बड़ी भारी फौज प्रभु दे गुण गान्दी लिमी १४. कि स्वर्ग विच प्रभु दी महिमा होये ते जमीन पर आदमी, जिन्हां का ओ बड़ा खुश है । शान्ति होये । १५. जिस मौके फरिश्तच चली गया ता चरवाहेयां ने अपु मिते बोलया कि जेहड़ी गल्ल प्रभु ने असां जो दस्सी उसजो चली करी बैतलहम-च-दिखिये । १६. ते झटपट जाई करी उन्हां ने मरियम ते युसुफ जो ते कन्ने उस बच्चे जो चरणी विच रखे दा दिखया १७. इन्हां जो दिखी करी उन्हां ने उसे गल्ल जेहड़ी इस बच्चे दे बारे विच उन्हां जो दस्सी थी दूसरेयां जो दस्सी, ता १८. सुणणे वालयां जो चरवाहयां दी गल्लां सुणी करी बड़ी हैरानी होई । १९. पर मरियम ऐ सारिया गल्ला अपणे मने-विच-रखी करी सोचदी रेही । २०. चरवाहेयां जो जदेया बोलया थिया उदेहा ही दिखी करी ते सुणी करी प्रभु दी बड़ाई ते प्रार्थना करदे वापस चली गये । २१. जिस मौके अठ दिन पूरे होई गये ते उसदे खतनी आई गया तां उसदा नां येशू रखया जेहड़ा फरिश्ते ने उसदे पेट विच आणे का पहले ही बोली दिता थिया ।

मन्दिर विच यीशु दी चढ़त

२२. जिस मौके मूसा दे प्रबन्ध सांई, उसदे शुद्ध होणे दे दिन पूरे होई गए तां प्रभु दे सामणे लिहाणे वास्ते उसजो येरुशलम लेई आये । २३. जिहां कि प्रभु दी व्यवस्था विच लिखया दा है कि हर इक पहला पुत्र प्रभु वास्ते पवित्र हुंगा । २४. ते प्रभु दी व्यवस्था दे मुताबिक पंडुको दा इक जोड़ा या कबूतरां दे दो बच्चे लयाई करी चढ़त चढ़ाये ।

शमौन दा गीत

२५. ते दिखो, यरुशलेम-विच-शमौन नां दा इक आदमी थिया जेहड़ा बड़ी धर्मी ते भक्त थिया ते उसजो इस्राएल विच शान्ति दी भाल थी, ते पवित्र आत्मा

उस उपर थिया २६. पवित्र आत्मा कन्ने उसजो पक्का पता थिया कि ओ जां ताई प्रभु दे मसीह जो नी दिखी लिगां तां ताई नी मरगां । २७. आत्मा दे दसणे कन्ने ओ मन्दिर विच आया ते जिस मौके उसदे मां-बबे यीशु जो लेई करी आये तां जे ओ रिवाजा मुताबक करण २८. ते उसने उसजो अपनी खोखा विच चुकी लेया ते प्रभु दा धन्यवाद कीता ते बोलया २९. मेरे प्रभु अबे तू अपने कहने दे मुताबिक अपने दास जो वापिस भेज दा ए ३०. किजो कि मेरिया अंखा ने तेरे उद्धार जो दिखि लेया । ३१. जिस जो तुंता ने सारे देशां दे लोकां सामणै त्यार किता ३२. कि ओ दूसरी जातां जो लौ वास्ते इक ज्योति ते अपने इसत्राएल दे लोकां दी बड़ाई होए । ३३. इन्हां गल्ला पर जेहड़ियां हुन्दियां थियां तसेरे मांबब बड़े हैरान हुन्दे थिये । ३४. तां शमौने ने उसदे सिरे पर हथ फेरया ते उसदी मां मरियम जो बोलया, कि दिख ओ इस्राएल विच बडेयां दे डिगणे ते उपर चुकणे पाई ऐसा निशान बणाया गया दे ऐ जिस दे खिलाफ गल्लां होणियां हिन । ३५. ते तेरा दिल भी तलवार कन्ने बिन्नया जांणा जिस का मते दिलां दे ख्याल निकलणे ने ।

हन्नाह

३६. अशरे दे विच-हन्नाह नां दी फनूएल दी कुड़ी अग्रे होणे वाली गल्लां दी पुच्छ हिन्दी थी । ओ बड़ी बुढी थी ते ब्याह दे सत साल अपने घरेवाला कन्ने रेई थी । ३७. ते ओ चौरासी सालां का विधवा होई गई दी थी पर रात दिन प्रभु दी पूजा करदी थी ते कने व्रत रखदी थी । ३८. ते ओ भी उस बेले उत्थे आई करी प्रभु दा धन्यवाद करणे लगी ते उन्हां सारयां करन्ने जेहड़े येरुशलम दे छुटकारे जो भालदे थे गल्लां करने लगी ।

यीशु दा बचपन

३९. जिस मौके ओह प्रभु दी रसम करी चुके ता गलील-विच-अपणे नगर नासरत जो चली गये ।

४०. ते बच्चा जवान ते जोर वाला हुन्दा गया कन्ने अकलमंद भी, ते प्रभु दी कृपा उसपर थी । ४१. उसदे मां बब हर साल-इक्ठे खाणे - दे तेयौहार जेहड़ा कि रिवाज था येरुशलम जान्दे थिये । ४२. जिस बेले ओ १२ साले

दा होई गया तां ओ उस जो लेई करी उस तेयौहार विच-गये ४३. जिस वेले पर्व दे धयाड़े पूरे होई गये ओ हटना लगे पर यीशु पिच्छे ही येरुशलम-विच रेही गया ते उसदे मां-बब जो पता नी चलया ४४. उन्हीं ने समझया कि ओ कन्ने कन्ने ही चलदा हुंगा । जिस मौके ओ इक दिन दा रस्ता अगे लंगी गये ते उसजो अपने टबबरा-विच ते जामा पछाया वालयां च तोपणे लगे । ४५. जिस मौके ओ नी लिमया ते ओ मुड़ी करी येरुशलम गये ४६. तां तिन दिनां वाद उसजो



गिरजे (मन्दिर) विच प्रचार करने वालयां दी गल्ला सुणदे दे सवाल करदे तोपया । ४७. जिन्ने मणु उसदियां सुणदे थिये ओ उसदी समझ ते सवालां कन्ने हैरान हुन्दे थिये । ४८. तां ओ उसजो दिखी करी हैरान होये ते उसदी मां ने उसजो बोलया, कि पुत्र तू असां कन्ने इदया किजो किता ? दिख, तेरा बाबा ते मैं तिजो तोपदे थिये ते इउदे थिये ४९. उसने उन्हीं जो बोलया – तुसी मिन्जो किजो थिये तोपदे ? तुसा जो ऐ नी पता कि मिन्जो अपने बाबे दे घरे रहणा जरूरी है ? ५०. पर जेहड़ी गल्ल उसने उन्हां जो बोली ओ नी समझे, ५१. तां ओ उन्हां कन्ने नासरत विच-आया ते उन्हां कन्ने रेहया, पर उसदी मां ने ऐ सारियां गल्लां अपपो दिले-विच-रखियां ५२. ते यीशू अकलमन्द ते शरीर-विच-प्रभु ते मणुआ दी कृपा विच बददा गया ।

यूहन्ना बपतिस्मा देने वाले दा संदेश

३ तिबरुयस कैसर दे राज दे पन्द्रहवें साल विच - जिस मौके पुन्तियुस पीलातूस यहूदिया दा हाकिम था, ते गलील विच - हरोदस नां चौथाई दा इतूरेया, ते त्रखोनितिस विच उसदा भाई फिलिप्पुस, ते अलिबेन विच लिसानियास चौथाई दे राजे थिये । २. ते जां कैफा ते हन्ना महा-प्रचारक थे ते उस मौके जकरिया दे पुत्र यूहन्ना जो प्रभु दा बचन जंगल च पुजया ३. ते ओ यरदन दे आसे पासे सारे मुल्क च पापा दी मुआफी ते अपने मन प्रभु पासे फेरने दे बपतिस्में दा प्रचार करने लगया । ४. जिहां कि यशायाह दी भविष्य वाणी वाली किताब विच लिखया दा ऐ कि जंगल च बोलणे वाले दा शब्द हाये करदा ऐ कि प्रभु दा रस्ता त्यार करो ते उसदी सड़का सिधियां बनाओ । ५. हर इक घाटी जो भरी दिता जागां ते हर इक पहाड़ ते टीला नीठा किता जाणां, ते जेहड़ा ढेरा है उसजो सिधा ते जेहड़ा उच्चा ऐ उसजो नीचा ता ओ चकूणा रस्ता बनणा ६. ते हर मणु ने प्रभु दे उद्धार जो दिखगां ७. जेड़ी भीड़ उसका बपतिस्मा लेणे आन्दी थी ओ उन्हां जो बोलदा थिया, "हे सांप दे बच्चो, तुंसा जो कुसने दसी दिता कि आणे वाले दे गुस्से का बचो ८. मन जो फेरणे दे लायक फल अणों, ते अपने अपण दिल च यह मत सोचो कि हमारा बाब इब्राहिम है किजो कि मैं तुंसा जो सच सच गलांदा कि प्रभु इन्हां पत्थरां का भी इब्राहिम दे वास्ते सन्तान पैदा करी सकदा । ९. ते अवे वी भोटूं बूटेयां दी जड़ह पर रखे दा है इस वास्ते जोहड़ा बूटा खरा फल नी लिहांगा उस जो कटी करी अग च पाई दिता जांगा ।" १०. तां लोका ने उस जो पुछया, कि "असी असी क्या करिये ? ११. उसने उन्हां जो जबाब दिता कि जिसका दो कुर्ते हिन ओ इक कुरता दूसरे जो जिसका नी है उस जो बंडी दे, ते जिसका भोजन है ओ भी ऐसा ही करे ।"

१२. ते, चुंगी लेणे वाले भी बपतिस्मा लेने आये ते उन्हां ने उसजो पुछया कि हे, गुरु असी क्या करिये ? १३. उसने उन्हां जो बोलया कि जेहड़ा ठीक ऐ उसका ज्यादा मत लेओ । १४. ते सिपाहीयां ने भी उसका पुछया कि असी क्या करिये ? तां उसने जबाब दिता कि कुसी का भी भुठा इल्जाम लगाई करी पैसे नी लैणा ते अपनी कमाई पर तसल्ली करणां १५. जिस मौके लोकां ने आस लगाई दी थी ते अपने मना च यूहन्ना दे बारे च सोचे करदे थिये कि कुये ऐ मसीह

ता नी है १६. तां यूहन्ना ने उन्हां जो जबाब बिच दिसया, कि मैं तां तुसां जो पाणी कने बपतिस्मा दिन्दा पर ओ जेहड़ा आणे वाला है ओ मेरे का बड़ा भारी ताकतवर है, ते मैं पा उसदे पैरां दे जुतैयां दे तस्में खोलणे दे लायक भी नी है ओ तुसा जो पवित्र आत्मा ते अग कने बपतिस्मा दिंगा । १७. उसदा छेन उसेरे हथ बिच ऐ ते ओ अपनी फसल जो अच्छी तरह साफ करंगा, ते कणके जो अपने गल्ले बिच जोड़गां पर भू जो अग बिच जेहड़ी बुझदी नी बाली दिंगा । १८. ते से मतियां शिक्षा देई करी लोकां जो ऐ खुश खबरी सुणांदा रेया । १९. पर उसने चौथाई देश दे राजा हैरोदेस जो उसदे भाई फिलिप्पुस दी घरा-वाली जो हैरादियास दे बारे बिच ते सारे बुरे कम दे बारे बिच जेहड़े उसने किते थिये उलाहमे दिते । २०. इस वास्ते हैरोदेस ने उन्हां कुर्कमा का बदी करी ए किता कि यूहन्ना जो जेल बिच पाई दिता ।

यीशु दा बपतिस्मा

२१. जिस मौके सब लोकां ने बपतिस्मा लेया ते यीशु भी बपतिस्मा लेई करी दुआ थिया करदा तां असमान खुली गया ते २२. पवित्र आत्मा कबूतर बणी करी उस पर उतरया ते ऐ अकाशवाणी होई कि तू मेरा प्यारा पुत्र है ते मैं तेरे का बड़ा भारी खुश हां ।

येशु दा पिछे कस्रा लेई करी टबबर

२३. जिस मौके येशु उपदेश देणे लगा ता उस बेले ओ तीस सालां दा थिया ते जिहां समझया जादां थिया कि ओ युसुफ दा पुत्र थिया ते युसुफ एली दा, २४. तो ओ मत्तात दा, ते ओ लेवी दा, ते ओ मलकी दा, ते ओह यन्ना दा, ते ओह युसुफ दा, २५. ते ओह तियात दा, ते ओह नहूम दा, ते ओ असल्याह दा, ते ओ नोगह दा, २६. ते ओ मात दा, ते ओ मत्तियाह दा, ते ओ शिमी दा, ते ओ योसेब दा, ते ओ योदाह दा, २७. ते ओ यहून्ना दा, ते ओ रेसा दा, ते ओ जरुब्बाबिल दा, ता ओ शालतिथेल दा, ते ओ नेरी दा, ते ओ मलकी दा, ते ओ अद्यदी दा, ते ओ इलाजार दा, ते ओ योरीम दा, ते ओ मत्तात दा, ते ओ लेवी दा ३०. ते ओ शमोन दा, ते ओ यहूदाह दा, ते ओ युसुफ दा, ते ओ योनान दा, ते ओ इलयाकोम दा, ३१. ते ओ मलआह दा, ते ओ मिन्नह का, ते ओ मत्तता दा, ते ओह नातान

दा, ते ओ दाऊद दा, ३२. और व थिशे दा, ते ओ ओबेद दा, ते ओ बोअज दा, ते ओ सलमोन दा, ते ओ नहशाने दा, ३३. ते ओह अम्मीनादाब दा, ते ओ अरनी दा, ते ओ हिस्त्रोन दा, ते ओ फिरिस दा, ते ओ यहूदाह दा, ३४. ते ओ याकूब दा, ते ओह इसहाक दा ते ओ इब्राहीम दा ते ओ तिरह दा, ते ओ नाहोर दा, ३५. ते ओ सरूंग दा, ते ओ रऊ दा, ते ओह फिलग दा, ते ओ एविर दा, ते ओ शिलहदा, ३६. ते ओ केनान दा, ते ओ अरफजद दा, ते ओ शेम दा, ते ओ नूंह दा, ते ओ लिमिक दा, ३७. ते ओ मथुशिलह दा, ते ओ हनोक दा, ते ओ यिरद दा, ते ओ महलेलल दा ते ओ केनान दा, ३८. ते ओह इनाशे दा, ते ओ राते दा, ते ओ आदम दा ते ओ आदम प्रभु दा थिया ।

यीशु की परीक्षा

४ फिरी येशु पवित्र आत्मा कने भरोई करी यरदन मुड़ी आया ते चालीस दिनां तीकर आत्मा दे गलाये जगलां च फिरदा रेया ते शैतान उसदी परीक्षा करदा रेया । २. उन्हां दिनां च उसने कुछ नी खाया, तां जिस मौके दिन पूरे होई गये ते उसजो भुख लगी । ३. तां शैतान ने उसजो बोलया कि तू इन्हां पत्थरां जो बोल कि रोटी बणी जाण । ४. येशु ने उसजो जबाब दिता, कि लिखया दा है कि आदमी रोटी कन्ने ही जिन्दा नी रहगा । ५. तां शैतान ने उसजो लेईगय करी पल च ही सारे दुनियां दे राज दिखाये ६. ते उसजो बोलया, कि इन्हां दा राज मैं तिजो देई दिंगा, किजो कि इनहां जो मिन्जो दिता दा है ते मैं जिस जो मरजी देई देयां । ७. इस वास्ते जे तू मिंजो प्रणाम करे तां ऐ सब तेरा होई जांगा । ८. येशु ने जबाब दिता कि लिखया दा है कि सिर्फ अपने प्रभु परमेश्वर जो ही प्रणाम कर ते कने तसेरी पूजा कर । ९. तां उसने उस जो येरुशलम दे मन्दिरा दे सिरे पर जाई खड़ा किता ते उसजो बोलया, कि जे तू प्रभु दा पुत्र है ते इदा का छाल लै १०. किजो कि लिखया दा है कि ओ अपणो फरिश्तयां जो हुक्म दिगां कि ओ तिजो बचाई लैण । ११. तो ओ तिजो हथां पर उषई लैण, ते पैरा जो पत्थरां कन्ने ठोकर न लगी जाये १२. येशु ने उसजो जबाब च एबी बोलया दा है कि तु प्रभु अपने परमेश्वर की भाल मत करे । १३. जिस मौके शैतान सारी परीक्षा करी बैठा तां थोड़ी देर वास्ते उसका दूर होई गया ।

यीशु नासरत मंभ

१४. फिरी यीशु आत्मा दी शक्ति कन्ने भरी करी गलील जो हटी गया । अते तसेरी गल्ला दे चर्चे वरे-परे सारे देशा मंभ फैली गई । १५. अते से तनेरे मन्दिरा मंभ अपने उपदेश दिन्दा रेया अते सारे मनु तिसा दी बड़याई करदे थिये । १६. फिरी से नासरत मंभ आया जुत्थे से पलया थिया अते अपने रिवाजा दे मुताबिक शनिचरे दे देहाडे मन्दिरा मंभ जाई करी पढ़ने ताई खड़ी गया । १७. यशायाह भविष्यवाणी करने वाले दी किताब तिसा जो दीति, तीनि किताब खोली करी से जगहा कड़ी जुत्थे जे ऐ लिखोया था । १८. प्रभु दी आत्मा मेरे पराले है, इस करी के जे तीनि कगांला जो खुशखबरी सुनाने वास्ते मिन्जो चुनया है कन्ने मिन्जो इधेरे तीकर ही भेजया है ता जे मनुआ दे छुटकारे अते अनेया दी लौ ताई खुशखबरी दा प्रचार करा अते जे पिछड़ी गये हन तिना जो बचाई लेया । १९. अते प्रभु दे खुश रहने दे साला (वर्षों) दा प्रचार करा । २०. ता तीनि किताब बन्द करी के सेवका दे हत्था देइ दीति अते बेइ गया, प्रार्थना घर दे सारे मनुआ दी अखियाँ तसेरे पराले लगी दी थिया । २१. ता से तिना जो गलाने लगया जे अज ही ऐ लेख तुसां दे सामने पूरा होया है । २२. अते सारेया ने तसेरी प्रशंसा कीति, अते जे अनुग्रह दी गल्ला तसेरे मुंह बला निकली थिया तिना का चकित होये ते गलाना लगे, जे क्या ऐ युसफ़ दा पुत्र है ? २३. उनी, उना जो गलाया, तुसी मिन्जो ऐ गल्ल जरूर गलागे, जे हे बैद्य अपू जो खरा करा ! जे किछ असा ने सुनया है जे कफरनहूम मंभ कीता गया है से इत्थे अपने देशा मंभ भी कर । २४. अते फिरी तीनि गलाया, मैं तुसा कन्ने सच गलान्दा है जे कोई भी भविष्यवाणी करने वाला अपने देशा मंभ मान नी पान्दा है । २५. अते मैं तुसां कन्ने सच्च गलान्दा है, जे एलिय्याह दे देहाड़े मंभ जो साढ़े तिन साला ताई असमान बन्द रेया, इत्थे ताई जे सारे देश मंभ बड़ा अकाल पेया, ता इस्राएल मंभ मतिया विधवा थिया ! २६. अपन एलिय्याह तिना मंभ कुशी का नी भेजया गया, सिर्फ सैदा दे सारफत मंभ इक विधवा का । २७. अते इलीशा भविष्यवाणी करने वाले दे बेले इस्राएल मंभ मते कोढ़ी थिये, अपन नामान सूरयानी जो छठी करी उना मंभ कोइ शुद्ध नी कीता गया । २८. ऐ गल्ला सुनदे ही जितने प्रार्थना घर मंभ थिये, सब गुस्से बिच आई गये । २९. अते उठी करी तिसा जो नगरा का बार कड़ी दित्या, अते जुस पहाड़ा पराले

तनेरा नगर बसयां दा थिया, तसेरी चोटी पराले लेई चले, जे तिस जो तित्थे बला भिक सृष्टी देईये । ३०. अपन से तिना मंभ निकली करी चली गया ।

भूतग्रसित दा खरा कीता जाना

३१. फिरी से गलील दे कफरनहूम नगर जो गया, अते अनिचरे दे देहाडे मनुआ जो उपदेश दे करदा थिया । ३२. से तसेरे उपदेश का हैरान होई गये, किजो जे तसेरी गल्ला मंभ अधिकार थिया । ३३. प्रार्थनाघर मंभ इक मनु थिया, जुस मंभ अशुद्ध (बुरी) आत्मा थी । ३४. से बड़ी जोरे बोलेया, हे येशु नासरी असा जो तेरे कन्ने क्या कम ? क्या तू असा जो खत्म करने आया है ? मैं तिजो जान्दा हूँ जे तू कुण है ? तू परमेश्वरे दा पवित्र मनु है । ३५. यीशु ने तिस जो गुस्से कन्ने गलाया, चुप रह ! अते उसका निकली जा ! ता अशुद्ध आत्मा ने तिसा जो मभाटे पटकी करी बगैर नुकसान कीते तिसा मंभा निकली गई । ३६. इस पर सभनी हैरान होये, अते से अपू मिते गल्ला करी के गलाने लगे, ऐ कदेया बचन हिन ? जे से अधिकार अते शक्ति कन्ने अशुद्ध आत्मा जो आज्ञा दिन्दा है, अते से निकली जान्दी हिन । ३७. ते चोत्री पासे हर जगहा तसेरी धूम पेई गई ।

शमौन दी ससु अते होरनिया दा खरा कीता जाना

३८. से प्रार्थनाघर बला उठी करी शमौन दे घरे जो गया अते शमौन दी ससु जो जोरे दा बुखार चढ़ेया दा थिया, अते तिना ने तिस वास्ते तिसा अगे बिनती कीति । ३९. तीनि तसेरे नेड़े खडी करी बुखार जो भिडकया अते से तिसा पर का उतरी गया, से भट उठी होई अते उठी करी तनेरी सेवा करने लगी । ४०. सूरज ढलदे बेले जुना-जुना दे घरे मनु बिमारियाँ कन्ने पेये दे थिये, से सब तिना जो तसेरे बाल लेई आये, अते तीनि इक-इक पराले हत्थ रखी करी तिना जो खरा कीता । ४१. अते अशुद्ध आत्मा भी लेश दिन्दी ते ऐ गलान्दी जे तू परमेश्वर दा पुत्र है, मतेया मंभा निकली गई अपन से तिना जो भिडकदा ते बोलने नी दिन्दा थिया, किजो जे से जानदे थिये, जे ऐ मसीह है । ४२. जा देहाडा चढ़ेया ते से निकली करी इक जंगली जगहा मंभ गया, अते भीड़-दी भीड़

तिस जो तोपदी तसेरे बाल आई, अते तिस जो रोकने लगी, जे हमारे बला मत जाये । ४३. अपन तीनि तिना जो गलाया मिन्जों होरनियां नगरा मंभ भी परेश्वरे दे राज्य दी खुशखबरी सुनाना जरूरी है, किजो जे मैं इसी करी के भेजया गया है । ४४. अते से गलील दे प्रार्थनाघरा मंभ प्रचार करदा रेया ।

पहले शिष्या वा सदया जाना

५ जां मणुआं दी भीड़ बढ़ी गई ते कन्ने तिसेरे उपराले डिगना लगी पे री थी कन्ने परमेश्वर दी गल्लां सुणदी थी । येसू कनेसरत दी डलां पर खड़ोता थिया । तां इयां होया २. कि उसी भील दे कण्डे दो बेड़िया लगी दिखियां पर मछी पकड़ने वालेयां ने उन्हां कछा उतरी करी अपने जाल धोदे थिये ३. उन्ही बेड़िया च इकी पर जे शमौन दी थी चढ़ी करी उस जो गलाया कि बढ़े कछा थोड़ा अग्से लेई चले ते उन्हां चई करी मनुणा जो परमेश्वर दीयां गल्ला सुनाणे लगया । ४. जां गल्ला होई चुकियां तां शमौन जो बोलया बेड़ी



जो डूगें पाणी च लेई चल ते मछली पकड़ने तांई जल सुटो । ५. शमौने ने जबाब दिता हे मालिक असां सारी रात मेहनत कीती पर किछ न मिलया पर अवे तेरे गलाणे पर मैं जाल बान्धा हां ६. फिरी उन्हां जाल सुटया ते मतियां मछिया आई गईयां ते जाल फटणे लगी पैया । ७. उन्हां दूजे अपने साथियां जो सैनिक मारी कि असां दी मदद करो । उन्हां आई करी बेड़ियां जो इथे तीकर

भरी दिता के डूबणे लगियां ८. शमौन ने ए दिखी करी येसू दे पैरा पैई गया ते बोलया हे मालिक मेरे कछा चली जा क्यों जो मैं पापी मणु हो । ९. मछियां दे शिकारा जो दिखी करी ऐ कने सारे साथी होई गये । १०. इयां ई जब्दी दे पुत्र याकूब ते कने यहुन्ना जे शमौन दे सम्बन्ध थिये हैरान होई गये । येसू ने शमौन जो गलाया मत डर अवे का अगो तू मनुवा दा शिकार करेगा ११. से बेड़िया जो कण्डे पर लेई आये कने सब किछ छडी करी येसू दे पिछे होई गये ।


काडिया दा खरा कीता जाना

१२. जां ओ इक नगरा च थिया तां दिखा इक कोढ़ कने भरया दा मणु येसु जो दिखी करी मुंह दे भारे डिगी करी मिन्नत करणा लगया हे प्रभु अगर तेरी मर्जी होये तू मिन्जो ठीक करी सकदा है । १३. उन्ही हथ अगे करी के कोहड़ी जो छुया ते कने गलाया मैं चाहन्दा हां कि तू चंगा भला होई जाये ते उसी वेले उसेरा कोढ़ ठीक होई गया । १४. उन्हीं उस जो गलाया कि ऐ गल्ल कुसी जो मत दसदा पर जाई करी प्रभु आपु जो परोहिते जो दिखा ते जे मूसा ने गलाया से भेट चढ़ा । तां जो उन्हां तां नही होये १५. पर ऐ गल्ल मती फैली गई कने मते लोकी इकटठे होई गये तां जो उसेरी गल्ला सुनी करी अपणे रोगा कछा छुटकारा पाण । १६. पर येसू बना च जाई करी प्रार्थना करदा थिया ।

हृदरंगी दा ठीक कीता जाणा

१७. इक दिहाड़े इयां होया कि ओ प्रचार करदा थिया ते शास्त्री कने सरा दें जानकार उते बैठे दे थिये । जे गलीले दिये सबनी ग्रामा कने यहुदिया अते येरुशलम कछा आये थिये । परमेश्वर दी करामात कने लोकां जो राजी करना तांई उस कने थी । १८. तां दिखा कई मणु इक मणु जो मंज्जे पर उठाई करी लयाऐ । कने उसजो अन्दर लेई जाने ताई कोशिश करणा लगे तां उसदे अगो रखणा । १९. जां दी बजह कने उन्हां जो अन्दर लेई जाने दा रास्ता न मिलया तां ओ कोठे पर चढ़ी करी बोढ मंभा खटोले जो येसु दे सामने रखी दिता । २०. उन्हीं उन्हां दा विश्वास दिखी करी गलाया है मणुआ तेरे पाप

माफ होई गयेर । २१. इस गला पर शास्त्री ते कने सरीयत दे जानकार सोचणे लगे कि ऐ कुण है जन्हा कुफर बकदा है ? परमेश्वरे दे बिना कुण पाप माफ करी सकदा है ? २२. येसु ने उन्हां दी दिलां दी गल्ल बुभी करी गलाया



तुसी अपने मना च कै सोचदे हिन ? २३. कुण गल्ला सोखी है ? ऐ गलाणा कि तुम्हारे पाप माफ होई गये या ऐ गलाणा उठी करी चल फिर ? २४. पर ऐ - इस करी के है तां तुसी बुभी लेण कि मणु दे पुत्रा जो धरती पर पापां जो माफ करने दा हक है । (मैं तिजो गलान्दा है रोले जो अपना खटोला चुकी करी अपने घरा जो जा) । २५. ओ उसी वक्ता उन्हां दे सामणे खटोले का उठया ते खटोले जा चुकी करी परमेश्वरे दे जश गान्दा घरा जो चली गया २६. ओ सभनी मते हैरान होई गये ते परमेश्वरे दे जश गाणा लगे ते मते डरी गये ते गलाणे लगे कि असा अजब गल्ला दिखीयां ।

लेवी दा सख्या जाना

२७. इन्हा गल्ला पीछे ओ बारे जो गया ते उन्हीं लेवी नामे दा इक घाटवा जो मसूले दी चौकी पर बैठा दिखया ते कने उसजो गलाया मेरे पीछे आई जाओ । २८. ओ सभ की छठडी करी उठया ते उसेरे पीछे होई गया २९. फिरी लेवी

ने अपने घरा मंभा उसेरी बड़ी धाम कीती कने घाटवाना ते कने मते दूजे साथियां दा जो धामे पर बैठे थिये बड़ा मुण्ड थिया । ३०. शास्त्री ने उन्हां दे (पुरोहित) सरीयत दे जानकर उसेरे शार्गिदां जो ऐ बोली करी बुढ़बड़ करणा लगे कि तुसां कीजो घाटवाना कने पापीयां कने खन्दे पिन्दे हिन ? ३१. येसू ने उन्हां जो गलाया कि राजी मणुआ जो बंधे दी जरुरत नी पर रोगिया जो ३२. मैं धर्मीया जो नी मैं पापीया जो तोबा ताई बुलाणा आया ।

व्रत दा प्रश्न

३३. उन्हा ने उसजो बोलया कि यहुन्ना दे चेले व्रत कने प्रार्थना करदे थिये ते इयां ई फरिशियां दे वी पर तेरे चेले खन्दे पीन्दे हिन । ३४. येसु ने उन्हां जो गलाया कि तुसी जनेता कछा जद लाड़ा उन्हां कने होये ते तुसी उन्हां जो व्रत रखाई सकदे हिन ? ३५. पर ओ दिन इणे वाले हिन जदाड़ी लाड़ा उन्हां कछा बखरा कीता जांगा तां उन्हां दिनां विच ओ व्रत रखें । ३६. उनी उन्हा जो इक दीरष्टान्त वी दिता कि कोई मणु नवे वस्त्र कछा पुराने वस्त्रा पर टली नी लगांदा निता नई टली वी फटीं जांगी तो उसेरा मेल वी पुरानी टली कने नी हुंगा । ३७. ते कने कोई मणु नवी शराब पुरानी मशका च नी भरदा किजो कि नवी शराब मशका जो फाड़ी करी अपु बाहर निकली जांगी ते कने मशका वी खराब होई जांगी । ३८. पर नवी शराब नई मशका विच भरनी चाई दी है । ३९. कोई मणु पुरानी शराब पी करी नई जो नहीं पीणा चाहन्दा किजो कि ओ जलान्दा है कि पुरानी ही खरी है ।

शनीचरे (सबत) दा मनना

६ फिरी ओ शनीचरा (सबत) दे दिन इयां होया कि ओ खेतरा मंभ होई करी जान्दा थिया ते उसेरे चेले मिजंरा जो तोड़ी करी ते हत्था मंभ मली करी खन्दे जान्दे थिये । २. ते फिरीसियां बिच का कुछ गलाणे लगे कि तुसां ऐ कम किजो करदे हिन जे शनिवारे दे दिन करणा भला नी ? ३. येसु ने उन्हां जो बोलया कि तुसां ऐ नी पढ़या कि जा दाऊद ते कने उसेरे सोगी भुखे थिये तां उनी बया किता ? ४. ओ कियां करी परमेश्वरे दे घरा मंभ गये अते चढीयां दिया

रोटियां खादियां । जिन्हा दा खाणा परोहतां दे बिना कुसे जो ठीकनी थिया ते कने सोगिया जो बड़ीयां ? ५. फिरी उनी उन्हां जो गलाया कि मनु दा पुत्र शनिवार दा भी मालिक है । ६. तां इयां होया कि कुसे दुजे शनिवारे दे दिहाड़े ओ इक मन्दिर बिच गया ते कने प्रचार करणा लगया उते इक मणु थिया जिसेरा सादा हथ सुकी गया दा थिया ७. शास्त्री कने सरीयत दे जानकार उसजो दिखेदे थिये कि ऐ शनिचर दे दिहाड़े इस जो ठीक करदा कि नी तां जो इस दे उपर इल्जाम लगाण । ८. पर उस जो उन्हा दे विचारा दां पता थिया उन्हीं उस मणु जो गलाया जिसेरे हथ सुकी गया दा थिया गलाया उठी करी सबनी मंभ खड़ा होई जा ओ उठी करी खड़ा होई गया । ९. येसु ने उन्हां जो गलाया कि मैं तुंसा जो पुछदा कि शनिचरे दे दिहाड़े भलाई करणा ठीक है या बुराई जानी बचाणा या मारी देणा ? १०. उनी चौला सभवाजो पासे दिखी करी उसजो गलाया अपणा हथ अग्गे करी दे उनी करी दिता ते ठीक होई गया । ११. ओ मते गुस्से होई करी इक दुजे बोलणा लगे कि असी येसु कने क्या करिये ? १२. उन्हां दिहाड़ेयां च होया कि ओ पहडा पर प्रार्थना करने जो गया ते परमेश्वरे बला प्रार्थना करना बिच सारी रात विताई दिती ।

बाहरा चले

१३. जां दिहाड़ा चढ़या उन्हीं अपणे चेलयां अपु कछा सदी करी उन्हां का बारह चुनी लेय कने उन्हां जो रसूला दा पद दिता । १४. शमौन जिसेरे ना उनी पतरस वी रखया कने उसेरे भाई इन्द्रयास ते याकूब ते यहुन्ना ते फिलिप्स बरतनमायी १५. मती ते कने तुमा कते हलफाई दा पुत्र याकूब कने शमौन जेहदे जलातस वी गलाया जान्दा थिया । १६. कने याकूब दा पुत्र यहुदा कने असकरयूती जिस ने उसजो पकड़वाई दिता थिया । १७. ओ उना कने उतरी करी पढरी जगह खड़ा होई गया कने उसेरे चेलयां दी बड़ी जमात कने लोकां दी बड़ी भीड़ उते थी । जे सारे यहुदिया येरुशलम सूर सैदा कने सारे समुद्रां दे बडेया कछे । उसेरी गल्ल बात सुणणे कने अपणे दुखां कछा छुटकारा पाणे ताई उसेरे का आई थी १८. जो मणु बुरी रहा कछा खुद पान्दे थिये से भले ठीक होई गये । १९. सभनी मणु उसजो छुने दी कोशिश करदे थिये किजो कि उस कछा शक्ति निकलदी थी ते सारे रोगी ठीक होई जान्दे थिये ।


धन्यवाद कक्षे अफसार

२०. फिरी उन्हीं अपने चेलयां जो दिखी करी गलाया धन्य हौ जे गरीब हिन किजो कि परमेश्वरे दा राज तुसां वास्ते है । २१. धन हिन तुसी जो अबे भूखे हिन किजो कि रजी जांगे । धन हिन तुसी जन्हें अबे रोन्दे हिन किजोकि ओह हसंगे २२. जिस वेले मनुआ पुत्रां दीबजह कने लोग तुसां कने बैर रखगे अते तुसां जो छेकी रखगे कने भला बुरा बोलगे अते तुसां दा ना बुरा जाणी करी कटी दिगें तां तुसी धन हुंगे २३. उसा दिहाड़े खुशी होना कने छाला मारणा इस गल्ला ताई के तुसां दा सबेश मंभ बड़ा अजर हुंगा, किजो कि जन्हा उन्हा दे बब दादे (पुरख) वी नबीयां कने इयां ही करदे थिये । २४. अपर अफसोस तुसां पर जे दौलत मन्द हिन किजो कि भुखे हुंगे अपसोस तुसां पर जे अबे हसदे हिन किजो कि दुखी हुनो कने रोन्गे । २५. अफसोस तुसां पर जां सभनी लोग तुसां जो ठीक बोलन किजो कि उनहरे पुरख भूठया नबीया कने इयां ही बरतदे थिये ।

दुश्मना कक्षे प्रेम

२७. पर मैं तुसां सुनेन बलया जो बोलदा हां कि अपने बैरियां कने दाह लाओ । कने जे तुसां कने बैर रखदे हिन उना दा भला करो । २४. जे तुसां वास्ते पर लानत करदे हिन उना ताई बरकत मंगो जे तुसा दी इज्जत नी करण उन्हां वास्ते प्रार्थना करो । २६. जे तुम्हारे इक खाखा पर थप्पड़ मारे ता दूजा वी उसेरे पासे करी दियो । जो तेरा चौलू लेणा चाहे उसजो करती लेणा कछा भी मत रोक । ३०. जे किछ तेरा कछा मांगे उसजो देई दे, कने जो तेरा माल लेई जाये उसका फिरी मत मंग । ३१. जियां तुसी चाहन्दे हिन के मणु तुसां कने बरतन तुसी वी उना कने उईयां ही बरतो । ३२. जे तुसां अपने दाह लाने वालेयां कने दाह लाओ तां तुसां दा कोई ओसान नी ? किजो कि जो पापियां लोक वी अपने दाह लाणे बालया कने दाह लांदे हिन । ३३. जे तुसी उना दा ही भला करो जो तुसा दा भला करदे हिन तां तुसा दा क्या ओसान हुंगा ? ३४. अगर तुसां उना जो करज दिता जिन्हा कछा वसूली दी उमीद रखदे हिन तां तुसा दा क्या ओसान है । पापी भी पापीयां जो कर्ज दिन्दे हिन तां पुरा वसूल करी लैन । ३५. पर तुसी अपने बैरियां कने प्यार रखो कने भला करो

कने बगैर आस दे उधार देयौ तां तुसां दा बड़ा अजर हुंगा अते तुसी परमेश्वरे दे पुत्र बनगे किजो कि ओ नाशुकरयां ते कने बुरे मनुवा पर भी मेहरबान है ।
३६. जियां तुम्हारा बाप तरस वाला तुसी वी तरस वाला दिल रखो ।



स दुसरेया दी बुरयाई

३७. बुरयाई न दिखो तुसां दी वी बुराई न दिखी जांगी कसूरवार कुसे जो न बनाओ तुसां वी कसूरवार न बणगे । छुटकारा दर्ई दियो तुसां जो वी छुटकारा मिलंगा । ३८. दियौ तां तुसा जो वी दिता जांगा । ठीक मानी जिकी जिकी करी कने भरी करी तुसां दे पल्ले पांगे । किजोकि जिस मानी कने भरदे हिन उसी माणी कने तुसां लेई मी भरया जान्गा । ३९. उनीं उनहा जो इक मिसाल दिती के क्या अन्ने जो अन्जा रस्ता दसी सकदा ? क्या दोणे ही गत्ता मंभ नी पेई जान्गे । ४०. चेला अपने गुरु कछा बड़ा नी हुन्दा पर हर इक जो सिखी जांगा ता अपने गुरु साई बणगा, ४१. तू किजो अपने भाई दी अखा दे तीले जो दिखदा है, ४२. ते अपने हाखी दे शतीरे जो नी दिखदा तां तू अपने भाई जो कियां बोली सकदा है कि आ भाई मैं तेरी हाखी दा तिनका कढी दियां । ४३. है पाजी पहला अपनी हाखां मंभ शतीर कढी ले फिरी उस तीले जो जे तेरे भाई री आखी मंभ है ठीक तरह दिखी करी कढी सकन्गा । ४३. कि जो कोई ठीक बुट्टा बुरा फल नी दिंगा कने ना कोई बुरा बुटा है जो ठीक फल दिंगा ४४. हर बुटा अपना फला कछा पछाणया जांन्दा है किजो कि जन्हा भाड़िया

कछा अजीर नी तोड़ता ता कने ना भड़ बैरी कछा अगूर । ४५. खरा मणु अपणे खरे मन कछा खरियां गल्ला कढदा ते बुरा मणु अपणे बुरे मना कछा बुरियां गल्ला कढदा है । किजो कि जे किछ उसेरे अन्दर हुंगा सेई मुहं कछा निकलगा ।

सुनना अते करना

४६. जां तुसी मेरे गलाया नी मनदे ता तुसी मिन्जो है प्रभु परमेश्वर किजो बोलदे हिन ? ४७. जे कोई मेरे कछा आन्दा है तां कने मेरिया गल्लां सुणदे हिन उना जो बखसदा है मैं तुसा जो दसदा कि ओ कुस सांई है ? ४८. ओ उस मणु सेई है जिसने घर बनादे वेले जमीन डुगी खोदी करी सपड़ा पर नीह रखी, जां बाढ़ आई तां धार उस घरा पर जोरे कने पेई अपर उसजो हिलाई नी सकी कि जो ओ पक्का बणया दा थिया । ४९. पर जो सुणी करी बरतदा नी ओ उस मणु सांई है जिनी जमीना पर बिना नी दे घर बणाया जां बाढ़ पर जोरा दी कने पेई तो ओ भट ढेई गया ते ओ घर बिलकुल बरबाद होई गया ।

सूबेदारे दे नौकरा दा खरा किता जाना

७ (प्रभु यीसू इक रूमी अफसर दे नौकरा जो ठीक करदा) यीसु मणुआ जो जां अपणिया गल्लां बताई चुकया ता कफरनहुमे मभं आया २. कुसे सूबेदारे दा नौकर जिस जो ओ प्यार करदा थिया बिमारी कने मरने जो थिया । ३. उनी यीशु दी खबर सुणी करी यहुदिया दे मते सरदारा जो उस कछा भेजया ओ आई करी मेरे नौकर जो खरादी करे ४. ओ येसु कने मिन्नत करी गलाणे लगे कि ओह तेरी मदद दा हकदार है । ५. किजो कि ओह अंसा दी जाति कने दा लान्दा कने उनी असां ताई मन्दिर बनाई किता । ६. यीसू उन्हां सोगी चली पेया पर जां ओह उसेरे घरे दे बेअड़े पुजया तो सूबेदार ने अपणो मिन्त्रा हात्थे गलाई भेजया कि प्रभु तकलीफ ना कर किजो कि मैं इस जोगा नी कि तु मेरी छत्त हेठे आये ७. इसी गल्ला पिछे तुसां बल नी आया तुसी अपणे मुहां कछा बोली देण ता मेरा नौकर ठीक होई जांगा । ८. किजो कि मैं भी दुजे भिक है अते सिपाही मेरे हेठ हिन जां इक जो गलाया ता ओ जान्दा अते दूसरे जो सदद तां ओह आन्दा है कने अपणो नौकरा जो जे कम दसदा से ओ करदा है । ९. यीसू ने ऐ गल्ला

सुणी करी हैरान होई गया कने मुड़ी करी भीड़ा जो गलाणे लगया कि मैं बोलदा है कि एजहया भरोसा विश्वास मैं इस्राईल बिच भी नी दिखया । १०. सदण वाले जा सूबेदारे दे घरे जो मुड़ी करी गये ता दिखया कि उसेरा नौकर खरा भला होई गया थिया ।

येसू विधवा दे पुत्र जो राजी करदा

११. थोड़ दिहाड़ेया पीछे येसू नैन दे नगर जो गया उसेरे चेले ते कने मते लोकी उसेरे कने थिये १२. ओ जिया ही ओ नगरे दे फाटका कछा पुजया तां दिखेया लोक इक मुर्दे जो बाहर लेई जान्दे थिये । जे अपणा माये रा इको ही इक पुत्र थिया ते कने से विधवा थी । अते नगरे दे मते लोकी तिसेरे कने थिये । १३. उसा जो दिखी कर येसू जो दाह लगी ते तिसा जो गलाया कि मत रो । १४. फिरी उनी अथौ दे नेडे आई करी उसजो छुईया अते चुकने वाले खड़ी गये येसू ने गलाया हे जवान मैं बोलदा उठी खड़ा हो । १५. तां फिरी से मुरदा उठी बैठा कने बोलने लगया फिरीतां येसू ने उस जो उसेरी मां देई दिता । १६. इस कने सभनी पर डर छाह गया अते । परमेश्वरे दी बढआई करणा लगे कने सुनाना लगे कि इक बड़ा नबी असां मंभ खड़ा होई गया ते कने परमेश्वरे ने असा री जाति पर दया कीति १७. अते इन्हां गल्लां दी खप सारे यहूदिया दे ग्रामा मंभ फैली गई ।

यूहन्ना बपतिस्मा देनेवाला

१८. यूहन्ना दे चेलया ने सभनी गल्ला दा पता उसा जो दिता १९. इन्हां गल्ला पर यूहन्ना ने अपने दो चेलयां जो सदी करी प्रभु कछा ऐ गल्ला पुछने ताई भेजया कि इणे वाल तू ही हुंगा या असी कुसे दूजे दी बत दिखिये ? २०. उनां उसेरे कछा आई करी बोलया कि यूहन्ना बपतिस्मा देणे वाले ने असां जो तेरे कछा एह गल्ला पुछणे जो भेजया है कि इणे वाला तू ही हुंगा या असी दुवे री बत दिखिये ? २१. तिसी बेले तिसने मते मणुआ जो दुखा कने कष्टा कने बुरी रुहां कछा बचाई दिता ते कने मते अन्नयां जे हाखी देई दिती । २२. उन्हीं उना जो गलाया जे तुसी दिखदे कने सुणदे हिन जाई करी यहून्ना जो दसी देओ कि अन्ने दिखदे हिन, रोहले चलदे फिरदे हिन, कोढेयांदा कोढ जादां रिहा टोणे

सुनणे लग, मुरदे जिन्दा कीते जान्दे हिन, अते गरीबा जो खुशखबरियां सुणाई जांदी हिने, २३. कने वन हिन से मणु जो मेरे सबब ठोकर न खादे हिन । २४. जियां ही यहुन्ना दे चेले चली गये तियां ही यीसु ने यहुन्ना दे बारे मनुआ जो दसया कि तुसी बणा मंभ क्या हेरने गये थिये ? कि तुसी हवा कने हिलने वाले काने जो दिखणे गये थिये ? २५. तां फिरी क्या दिखने गये थिये ? कि पतले टले लाये होये मणु जो दिखणे गये थिये ? दिखा जे चिलकदे टले लान्दे कने मजे विच हिन से राजेंया दे महलां विच रहन्दे हिन । २६. तां फिरी तुसी क्या हेरणे गये थिये ? कि इक नबी जो? हां में तुसां जो बोलदा हां कि नबी कछा बडे जो । २७. ऐ सेई है जिसेरे बारे लिखया है दिखा मैं अपणा दूत (पैगम्बर) तेरे अगे भिजवाई दिन्दा से तेरा बत तैयार करंगा । २८. हाऊं तुसां जो गलांदा हां कि जे मणु तिरीमता कछा पैदा हुन्दे हिन उना मंभ यहूना बपतिस्मा देने वाले का कछा कोई बडा नी पर जे परमेश्वरे दे राज्य विच छोटा हो ओ बडा हुंगा । २९. सभनी मणुआ ने कने घाटवाणा ने यहुन्ना दा बपतिस्मा लेई करी परमेश्वरे जो सच्च मनी लेया । ३०. पर फरीसियां ते कने सरीयत दे जानकारां ने उस कछा बपतिस्मा न लेई करी परमेश्वरे दी मर्जी जो अपने बारे विच भुठा बनाई दिता । ३१. ता अबे मैं से इस जमाने दे मणुआ जो उस कने मैला अते ऐ कुस साई हिन । ३२. से उना गबरुआं साई हिन जे बजारा मंभ बई करी इक दूजे जो हक देई करी बोलदे हिन कि असां तुसां वास्ते बासंरी बजाई पर तुसी न नचे असां सोग मनाया पर तुसी न रोये । ३३. किजो कि यहुन्ना बपतिसमा देणे वाला न रोटी खन्दा आया न सुर पीन्दा आया । पर तुसी बोलदे उसेरे अन्दर बुरी रह है । ३४. पर मणु दा पुत्र खांदा पीन्दा आया पर तुसी गलान्दे कि दिखा ओ खाऊ कने शराबी मणु घाटवाण कने पापियां दा मित्र है । ३५. पर समभ सभनी गबरुआं कछा सच्ची मनी गई ।

येशु दे पैरा पराले तेल मलना ते कन्ने दो पैसे देने वालेया दा दृष्टान्त

३६. फिरी कुसी फरीसी ने तिस कन्ने छन्दे किते जे तू मेरे कन्ने रोटी खा अते से तिस फरीसी दे घरे जाई करी रोटी खाने बई गया । ३७. तां दिखा इक बुरी जनानी इस गल्ला जो जानी करी कि यीसु फरीसी दे घरा मंभ खाणा खाणा बैठोरा थिया इक सगंमरमर दी कूपी विच इत्र लेई आई । ३८. येशु दे पैरा कछा खिड़ी करी कने रोई

करी उसेरे पैरा जो अपने अथरुआं कने सेडने लगी अते अपने सिरां दे बांला कने पूजणे लगी कने उसेरे पैरा जो सुन्ने दिते कने इत्र सुटया । ३६. फरीसी एह गल दिखी करी अपने मना मंभ सोचणा लगा जे ऐ मणु नबी हुन्दा ता जानी जान्दा कि जे जनानी उसेरे पैरा जो छुन्दी है से कुण ते कने कदेई जनानी है ? किजो कि से पापिन जनानी है । ४१. यीसु ने जबाब दिता है शमौन हाऊं तिजो किछ बोलणा चाहन्दा हां उन्ही गलाया हे गुरु गला ४१. किसी साहें दियां दो समीयां थिया इक पंज सौ रुपये दी ते इक पञ्जाह ५० पन्जा रुपये दी । ४२. जां उना दोनो कछ हटाने जो किछ न रिया तां साहे ने दोना जो छडी दिता, फिरी उन्हां मणुआ बिचो कुन उस कने मती पियार दाह लगांगा ४३. शमौन ने जबाब



दिता मेरी समझा कने ओ मती दाह लगांगा जिस जो उसने मता छड़या उसने उस जो गलाया ते ठीक गलान्दा बोलया ४४. फिरी उस जनानी वाला दिखी करी शमौने जो बोलया कि तू इस जनानी जो दिखदा है ? हाऊं तेरे घर मंभ आया पर तैं मेरे पैरा जो धाने ताई पानी न दिता पर उनी मेरे पैरा जो अपने अथरुआं कने सेडी दिता अते अपने वालां कने पूजीं दिता ४५. तैं मिन्जो सूना न दिता अपन जिस वेले दा मैं आया दा हैइनी मेरे पैरा जो सुने देने नी छडे । ४६. ते मेरे सिरा मज तेल नी पाया पर इनी पैरा पराले इत्र सुटया । ४७. इस करी

के मैं तिजो गलांदा है कि असेरे जेड़े मते पाप थिये से माफ करी दिते किजो कि इनी बड़ा भारी प्रेम किता अपन जिसा जो घट माफ किता से घट प्रेम करदा है ४८. उनी जनानी जो गलाया कि तेरे पाप माफ होई गये । ४९. तां फिरी जेहड़ै आदमी तसेरे कने खाणे जो बैठे थिये से सब अपने मना मंभ सोचना लगे कि ऐ कुण मणु है जे पापां जो भी माफ करी दिन्दा । ५०. फिरी तिनी जनानी जो गलाया, कि तेरे विश्वास ने तिजो बचाई लैया ते अबे तू ठीकठाक चली जा ।

सैं जनानियां जिना ने यीशु दी बड़ी सेवा कीति

थोड़ा देरी बिच से नगरा-नगरा कने गां गां परमेश्वरे दे राज्य दी गल्ला सुणांदा फिरने लगया । २. से बारह तसेरे कने थिये, कने कितनी जनानियां वी जुना बुरी रुहा कने बिमारियां कछा खलासी पाई लेई थी । से ऐ हिन मरियम जे मगदलीनी थी जिस कछा सत बुरी रुहा कड़ी थिया । ३. हैरोदीस दे बजीरे दी लाड़ी योआन्ना कने सुसन्नाह कने होर मती जनानियां थिया जे अपने माल कने तसेरी सेवा करदीयां थियां ।

बीज बोने वाले दा दृष्टान्त

जिस बेले जे मती भीड़ कठी होई गई कने नगर-नगर दे मणु तिसा कछा आणे लगे थिये ते उसाने दृष्टान्त मंभ गलाया ५. कि इक बी बोने वाला बी बोणा निकलया, बान्दे-बान्दे किछ सड़ेका कनारे पेई गया ते से पैरा भिक मरडि गया अते किछ हवा दे फेरुआ ने चुगी लेया । ६. किछ पत्थरां मंभ डिगी पया ते उगी होया अपन पानी नी मिलणा दी बजह कने सुकी गया । ७. किछ भिलां मंभे पैया अपन भीलां तसेरे कने कने मटीणे लगीयां तां तिसा जो दबी लेया ८. अते किछ खरी जमीना मंभ पैया ते उगी करी साँ सौ गुणा फलया ए सब गल्ला गलाई करी तिने जोरे करी गलाया जे जसेरे कन्न हिन से सुणी लैण । ९. फिरी तसेरे चेलया ने तिसा जो पुछया कि ऐ दृष्टान्त क्या है ? उनी गलाया । १०. तुसां जो परमेश्वरा दे राज्य दे भेदा दी समभ दिती गई है अपन दुये जो जो दृष्टान्ता मंभ सुनांदे हिन । इस करी के कि से दिखदे होये भी न दिखन कन्ने सुनदे होये भी न समभन । ११. दृष्टान्त एह है बी ता परमेश्वरे दा बचन है । १२. सड़ेके दे कनारे दे से हिन जिनां ने सुणया तां

जै शैताने ने आई करी उनेरे मना कछ बचन चुकी करी लेई जान्दा है, कि कुतकी इयां न होये कि से विश्वास करी के पार होई जाण । १३. सपड़ा वाले से हिन जे सुणदे ते खुशी कने बचना जो सुनी लिन्दे हिन अपन से वचन जड़ जो खरी करी नेई पकड़ेदे इस करी के से विश्वास रखी करी परखने बेले फिरी से गिरी जान्दे हिन । १४. अते जेहड़े भीला मंभ छुड़के थिये, से ऐ हिन जे सुनदे हिन अपन हुन्दे-हुन्दे फिरा मंभ कने जिन्दगी दे सुखा विलासा मंभ फसी जान्दे हिन अपन तसेरा फल नी पकदा । १५. अपना खरी जमीने वाले से हिन जे बचना जो सुणी करी खरे कने बदीया मना मंभ सम्भाली करी रखदे हिन कने चैना कने से फल लियादे हिन ।

दिये री शिक्षा

१६. कोई मणु दिया जाली करी बाण्डे भिक नी रखदा न ही मन्जे भिक अपन से दियूट पर रखदा ता जे अन्दर आने वाले जो रोशनी मिली जाये । १७. किछ लुकया रा नी है जे सामने नी आये न किछ होर लुकया दा है जेहड़ा दिखया नी जाये कन्ने सामने नी आये । १८. इस करी के होसा विच रेयो कि तुसी कियां करी सुनदे हो ? किजो कि जिसा कछ है तिसा जो होर भी दिता जांगा कन्ने जिसा कछ नी है तिसा का से भी लेई लिता जांगा जिस जो से अपान समझदा है ।

सच्चे भाई चारे दा तरीका

१९. फिरी तसेरी अम्मा कन्ने तसेरे भेयाल आये, अपन भीड़ करी के से तिसा जो मिली नी सके । २०. कन्ने तिसा जो गलाया गया, कि तेरी अम्मा कने तेरे भेयाल बाहर खड़ीते दे हिन तेरे कन्ने मिलणा चाहन्दे हिन । २१. उसा ने उन्हां जो गलाया कि मेरी अमां कने मेरे भाई ऐई हिन जे परमेश्वरे दे बचणा जो सुनदे कन्ने मन्दे हिन ।

यीशु दा तुफाने जो रोकना

२२. फिरी इक दिन से, कन्ने तसेरे चेले कस्तियां पराले चढ़े कन्ने तिनी तिना जो गलाया, कि आओ भीला दे पार चलदें, ते फिरी तिन्हा कस्तियां खोली सुटिया ।

२३. अपन जिस बेले जे किस्ती चलदी थी ते से सोई गया ते तिसी बेले तुफान आई गया ते किस्ती पाणी कन्ने भरने लगी अते से मुश्किला फसी गये । २४. ता फिरी तिन्हा ने तिस का आई करी तिसा जो जगाया कन्ने गलाणे लगे, मालिक मालिक असी खत्म होई चले दे हिन, ता फिरी से उठी करी तूफान कन्ने लहरां जो बकने लगया, ता फिरी से सब किछ से खड़ी गया कन्ने चैन छाई गया । २५. अतः फिरी उने उना जो गलाया, कि तुम्हारा विश्वास कुताई चली गया ? अपन से फिरी डरी गये कन्ने से हैरान होई करी अपू मिते गलाने लगे कि ऐ कुण है ? जे तूफान कन्ने पाणी जो भी हुक्म दिन्दा है कन्ने से तसेरी गल्ल मन्दे हिन ।

गिरासेनी भूताप्रस्ते जो खरा किता जाना (गिरासेनी जिस जो भूत चिमड़या दा थिया खरा कीता जाणा)

२६. फिरी से गिरासेनीयां दे देशा पुजया, जे उस पार गलीले दे साम्हने है । २७. जिस बेले जे से किनारे पराले उतरया ता तिस नगरे दा इक मणु तिसा जो मिलया जसेरे अन्दर बुरी रुहा थियां कन्ने से बड़े दिना का कपड़े नी पान्दा थिया कन्ने न घरे रिहन्दा थिया अपन कन्नां मंभ रिहन्दा थिया । २८. तिनी यीशु जो दिखया ते जोरे करी लेर दिती कन्ने तसेरे सामने डिगी करी जोरे कन्ने गलाने लगया हे प्यारे बड़े परमेश्वरे दे पुत्र यीशु मिन्जो तेरे कन्ने क्या कम, मैं तेरे कन्ने प्रार्थना करदा है कि मिन्जो तू पीड़ा मत दे । २९. किजो जे से तिस गन्दी आत्मा जो तिस मणुआ मंभ का निकली जाने दी आज्ञा थीया दिन्दा इस करी के क्रि से तसेरे उपराले छड़ी छड़ी पोन्दी थी मणु तिसा जो बड़े संगला कन्ने रसीयां कन्ने थिये बने करदे ता भी से तिना जो तोड़ी रखदा थिया कने से खराब रुहा तिसा जो जंगला मंभ नसादियां थियां ३०. यीशु ने तसेरे का पुछया तेरा ना क्या है, तिसा ने गलाया जे फोज किजो कि मती सारी बुरी रुहां तसेरे मंभ पेई गई री थियां । ३१. फिरी तिना ने तसेरे अग्गे हात्थ जोड़े कि असां जो इतणे बड़े नरका मंभ जाने जो मत गलायें । ३२. तिसी पहाड़ी पराले मते सारे सूर चुगदे थिये ते तिना गलाया जे असां जो से सुरां दे भुण्डा मंभ बैणे जो गलाई दे अतः फिरी तिनी तिना जो जाने जो गलाई दिता । ३३. अतः फिरी से खराब रुहा तिस मणुआ मंभ निकली करी सुरां मंभ पई गईयां अतः फिरी से सुरा दा

धण तिस पहाड़ी का भिक भील मंभ छुड़की पेया ते डुबी गया । ३४. सूरों जो चराने वाले ऐ दिखी करी नसी पे कन्ने नगरा ते ग्राँ विच जाई करी अघेरी खबर दिती । ३५. फिरी तित्थे दे ऐ सुणी करी बाहर इस गल्ला जो दिखने जो चली पेये कन्ने यीशु का आई करी जिस मणुआ मंभ का से बुरी रुहां निकली थियां उसजो टल्ले पाये ते होशर कन्ने यीशु दे पैरा दे नेड़े बैठे दिखी वे डरी गये । ३६. अते दिखणे वालेयां ने तिना जो दसया कि जुस मंभ भूत प्रेत थिये से कियां करी खरा होई गया । ३७. तां गलासिनिया दे सभनी मणुआ ने यीशु दे छन्दे किते की से उना कछा चली जाये किजो कि तनेरे उपराले बड़ा भारी डर पेई गया दा थिया से फिरी कस्तियां उपराले पड़ी करी चली गया । ३८. अपन जस नुआ मंभा बुरी आत्मा निकली थी से तिस कन्ने मिन्नत करी के गलाने लगाया जे मिजो अपने कन्ने ही रहने दे । अपन येशु ने तिस जो बिदा करी के गलाया जे अपने घरे हटी करी जा अते मनुआ जो दस जे प्रभु ने तेरे ताई कदेये बड़े-बड़े काम कीते । ३९. से तित्थे बला जाई करी सारे शहरा मभां दसने लगाया जे येशु ने मेरे ताई कदेये बड़े-बड़े काम कीते ।

**याईर दी कुड़ी दा जिन्दा करणा कन्ने इक जनानी
जिसा जो खून निकलने दी बुमारी थी तसेरा ठीक होई जाणा**

४०. जिस बेले यीशु हटे करदा थिया ता लोक तिस कन्ने बड़े प्रेम कन्ने मिलने लगे किजोकि से सब तिसा जो भाले करदे थिये । ४१. इक मणु थिया तसेरा ना याईर थिया से गन्दिरा दा बड़ा सरदार थिया, आया ते यीशु दे पैरां पराले डिगी करी गलाणे लगेया कि मेरे घरा जो चल । ४२. किजो कि तसेरी इक कुड़ी थी १२ साले दी ते से मरने वाली थी जिस बेले से जाये करदा थिया ता मणु तसेरे पराले छुड़की पे करदे थिये । ४३. ते इक जनानी जिसा जो बाहरा साला का खून निकलने दी बुमारी थी कन्ने से अपणा सारा कुछ बड़े बड़े वैद्या पीछे खत्म करी बैठी थी वा भी से कुसी का खरी नी होई सकी थी । ४४. से पीछे का आई ते तसेरे कछ आई गई अते तेसेरा चोला छुया ते भटपट तसेरा से खून निकलना बन्द होई गया । ४५. इसेरे बाद यीशु ने गलाया जे मेरे कन्ने कुण छुईता थिया ? जिस बेले सारे मुकरना लगी पे ते पतरस कन्ने तसेरे



साथियां ने गलाया, हे स्वामी तिजो ता भीड़ दबे करदी है कन्ने से तेरे पराल छुड़की पे करदी है । ४६. पर ता भी येशु ने गलाया जे कुसकी ने मिन्जो छुया है किजो कि मेरे कछा जोर निकलया है । ४७. जिस बेले जे तिस जनानी ते दिखया जे से लुकी नी सकदी ते से कबंदी कबंदी आई ते तसेरे पैरा पराले डिगी पेई ते सारे मणुआ सामने दसया कि मैं तिजो किजो छुया, कन्ने कियां करी भूट खरी होई गई । ४८. तिनी तिसा जो गलाया जे तिजो तेरे विश्वासे ने खरा किता, अबे ठीक-ठाक घरे जो चली जा । ४९. से ऐ गलाये थिया करदा कि कि कुसकी ने मन्दिरा दे सरदार जो आई करी गलाया जे तेरी वी मरी गई ते अबे तु येशु जो दुखी मत करें । ५०. यीशु ने ऐ सुणी करी गलाया जे डरे मत बस तू विश्वास रख ते से बची जांगी । ५१. घरे आई करी तिनी पतरस कन्ने यहूना कन्ने याकूब कन्ने कुड़ी दे मां पेयो जो छड़ी करी कुसी जो अन्दर नी आणे दिता । ५२. ते सब तसेरे वास्ते रोन्दे पटिन्दे थिये पर तिनी गलाया जे रोन्दे किजो हिन से मरी थोड़ी गई । से ते सोये करदी है । ५३. से ऐ जाणी करी जे से मरी गई है ते तसेरा मजाक उड़ाने लगे ५४. पर तिनी तसेरा हथ पकडेया ते गलाने लगया कि हे कुड़ी उठी हो ५५. ता फिरी तसेरे अन्दर जान पेई गई ते

से उठी होई फिरी तिनी आज्ञा दिती जे इस जो किछ खाणे जो देखो । ५६. तसेरे मां पेयो बडे हैरान होई गये अपन तिनी तिना जो गलाया जे ऐ जो कुछ होया से कुसी जो मत दसदे ।

बारह चलेयां दा काम

६ फिरी तिनी बारह जो सदी करी बुरी रहा कन्ने खराब बुमारियां जो दूर करणे दी शक्ति कन्ने हक देई दिता । २. कन्ने तिना जो ईश्वरे दे राज्य दा प्रचार करने कन्ने बिमारी जो खरा करने जो भेजी दिता । ३. कन्ने तिनी तिना जो गलाया जे रस्ते वास्ते किछ मत लिन्दे, न ता सोठी न खोख, न रोटी, न रुपेईये कन्ने न दो-दो कुरतु । ४. कन्ने जिस घरे मंभ जाओ ते थिते रेहयो कन्ने तित्थे का ही अगेडा जाई आओ । ५. जे तुसां जो नी चाहंगा ता तिस नगरा का जान्दे वेले तित्थे कृपणे पैरां दी धूड़ भाड़ी रखयो, जे तनेरे वास्ते गवाही देणे जो हो । ६. अता फिरी से ग्रां ग्रा निकली करी सुसमाचार सुनाने लगे, कन्ने हर जगहा लोगां जो खरे करदे फिरदे थिये ।

हैरोदिसे दी बेचंनी

७. कन्ने देश दी चौथाई दा राजा हैरोदेसा ऐ सब सुणी करी बेचैन होई गया, किजो कि मतेया ने गलाया थिया जे यूहन्ना मरेयां बिच का जिन्दा होई गया है । ८. कन्ने मतेया ने गलाया जे एलियाह जो भी दिखया, कन्ने होरना ने एह गलाया जे पुराणे मुजूमियां विच का कोई जिन्दा होई गया है । ९. अपन हेरादेस ने गलाया जे यूहन्ना दा ता मैं सिर बडाई रखया थिया फिरी ऐ कुण है जसेरे बारे बिच एदेई गल्ला सुणदा है ? अता फिरी तिनी तिस जो दिखना चाहन्दा थिया

पँज हजार लोकां जो खाणा खिलाणा

१०. फिरी प्रेरितां ने हटी करी जे किछ तिना ने कित्ता थिया, तिसा जो दसी दिता अता फिरी से तिना जो कनारे करी के बैतसैदा ना वाले इक नगरा जो लेई गया । ११. ऐ सब किछ सुणी, कन्ने दिखी करी भीड तनेरे पिछे लगी गेई अतः फिरी बड़ी खुशी कन्ने तिना जो मिलया फिरी तिना कन्ने ईश्वरे दे राज्य दी

गल्ला करने लगेया कने जे खरा होणा चाहन्दे थिये तिना जो खरा किता ।
 १२. जिस वेले दयाड़ा खत्म लगेया हुणा, ते बारहा ने आई करी तिस जो गलाया
 जे भीड़ जो अवे भेजी दे, किजो कि चारा पासे दे ग्रा विच जाई करी अपणा
 ठकाणा बनाई लैण कन्ने अपने खाणे दा इन्तजाम करी लैण किजो जे असी इते
 सुनसान जगहा मंभ हिन । १३. तिनी तिना जो गलाया जे तुसी तिना जो
 खाणे जो देयो तिना गलाया, जे हमारे का पंज रोटियां कन्ने दो मछियां जो छड़ी
 करी होर किछ नी है, अपन हां, जे असी जाई करी इना सारे मनुआ तिकर खाने
 वास्ते किछ खरीदी लेईये ते किछ होई सकदा है । से मणु ते कोई पंज हजार
 मणुआ बराबर थिये । १४. ता फिरी तिनी अपने चेलेआ जो गलाया, जे
 पंजा पंजा करी पान्दा मंभ बठाई देओ । १५. तिना ने तदेया किता, कन्ने सारे
 बठाई दिते । १६. ता फिरी तिनी से पंज रोटियां कन्ने दो मछीया लेई करी,
 ते स्वर्ग पासे दिखी करी धनवाद किता, अता कन्ने तोड़ी-तोड़ी करी चेलेया जो
 दैणे लगया, जे मनुआ जो बंडी देयो । १७. फिरी सारे खाई करी रजी बैठे
 कन्ने जेहड़े टुकह बची गये थिये तिना कन्ने बारह टोकरियां भरी करी चुकियां ।

पतरसा दा मनी लेणा जे यीशु मसीह है

१८. जिस वेले से किल्ला प्रार्थना करदा थिया, चेले तसेरे कन्ने थिये, ते
 तिनी तिना जो पुछया, जे लोक मिन्जो क्या गलान्दे हिन ? १९. तिना ने
 जवाब दिता, यूहन्ना बपतिस्मा दैणे वाला कन्ने कोई एलियाह, कन्ने होर पुराने
 विद्वाना विच का जिन्दा होई गया है । २०. तिनी तिना जो गलाया वे तुसी
 मीन्जो क्या गलान्दे हिन पतरस ने गलाया जे असी ते तिजो ईश्वरे दा मसीहा
 गलान्दे हिन ।

यीशु अपने मरने कन्ने दुबारा जिन्दे होई जाने भविष्यवाणी करदा है

२१. ता उसने तिना जो समझाई करी गलाया जे ए कुसी जो मत दंसदे ।
 २२. फिरी तिनी गलाया जे मणु दे पुत्रा वास्ते ऐ जरूरी है जे से मते दुखः चुके,
 ते पुराने बडे-बडे विद्वान ते शास्त्रा दा ज्ञान पाने वाले मणु तिस जो बड़ा छोटा
 समझी करी मारी रखन, अता से तीसरे दिन फिरी जीन्दा होई जाये ।

स्वार्था जो छडी देने दी पुकार

२३. तिनी सारे कन्ने गलाया, जे कोई मेरे पीछे आना चाहे ते अपने आप का न करी के कन्ने हर रोज अपनी सूली चुकी करी मेरे पीछे होई जाये ।
 २४. किजो जे कोई अपनी जान बचाणा चाहन्दा है से तसि जो गंवाई दिंगा अपन जो कोई मेरे वास्ते अपनी जान गवांगा सेई तिसा जो बचांगा । २५. जे मणु सारे जगता जो पाई ले, ते अपनी जान गवाई दे, या फिरी तसेरा घाटा तुके ते तिस जो क्या लाभ हुंगा । २६. जे कोई मेरे का या मेरी गल्ला का शर्मींगां मनुए दा पुत्र भी जिस वेले अपने कन्ने अपने पिता दे कन्ने पवित्र स्वर्गा दे दूता दी महिमा कन्ने इन्गां ते तिस का शर्मींगां २७. मैं तुसां कन्ने सच गलान्दा कि जे इतथे खडीते हिन, तिना विच कोई-कोई इदे हिन जे बिदा तीकर ईश्वरे दा राज नी दिखी लिन्गे ता तीकर मरने दा मजा नी चखगे ।

रूप कन्ने रूपान्तर

२८. इनहां गल्ला दे कोई अठवें रोजे बाद से पतरस कन्ने यहून्ना कन्ने याकूब जो लेई करी प्रार्थना करने वास्ते पहाड़ पराले गया । २९. जिस वेले से प्रार्थना करे थिया करदा, ता तसेरा मुंह हैशोर देया होई गया, ते तसेरे कपड़े सफेद होई करी चमकणा लगे । ३०. फिरी दिखो जे मूसा कन्ने एलियाह, ऐ दोई मणु तिसा कन्ने गल्ला थिये करदे । ३१. ऐ सब बड़ी महिमा कन्ने नजरी इन्दा थिया, कन्ने से तसेरे मरी जाने दी गल्ला करदे थिये, जो यरुशलमा मंभ होने वाला थिया ३२. तिस कन्ने तसेरे साथी नीद्रे कन्ने भरी रे दे थिये, अता जिस वेले खरी करी जागी होये ते तसेरी महिमा कन्ने उना दो मणुआ जो जे तसेरे कन्ने खडीते थिये दिखया । ३३. जिस वेले से तसेरे का जाने लगे, ते पतरस ने यीशु जो गलाया है स्वामी हमारा इते रहणा भला है । इस करी के असी तिन गाठे बनोगे इक तेरे वास्ते इक मूसा वास्ते अता इक एलियाह दे वास्ते । ३३. से नी जान्दा थिया जे ऐ क्या गलान्दे हिन । ३४. से ए गलाये थिया करदा, जे इक बहले ने आई करी तिना पराले छां करी दिती, अता जिस वेले से तिसा बहले कन्ने विरना लगे ता डरी गये । ३५. अता फिरी तिस बहला मंभ का ऐ आवाज आणे लगी जे ऐ मेरा पुत्र कन्ने मेरा चुनीता दी है, इसेरी सुणो । ३६. ऐ

सबद मुकदे ही यीशु किला रेई गया अता से चुप रे कन्ने जे किछ दिखया थिया, तसेरी कोई गल्ल तिना दिना बिच कुसी कन्ने नी गलाई। ३७. फिरी दुऐ दिन जिस वेले से पहाड़ा का उतरे ते इक बड़ी भीड़ तिस कन्ने आई मिली। ३८. अता फिरी दिखो जे भीड़ा बिच का इक मणु ने जोरेलेर देई करी गलाया हे गुरु मैं तेरे कन्ने प्रार्थना करदा जे मेरे पुत्रा पराले दया कर किजो जे से किला है। ३९. फिरी दिख जे इक बुरी रूह तिसा जो पकड़दा है, ते से जोरी करी लेर देई सुटदा कन्ने से तिसा जो अदेया मरोड़दा कि जे से मुहां बिच भग भरी लिन्दा है, कन्ने तिसा जो मरोड़ी, सरोड़ी करी मुश्कला कन्ने छड़दा है। ४०. कन्ने मैं तेरे चेलेआं कन्ने प्रार्थना किती थी जे तिस जो कडी देण अपन से कडी नी सके। ४१. यीशु ने गलाया है विश्वास नी करने वाले कन्दो जिद्धी लोको मैं कुते तक तुम्हारे कने रिहन्गा कन्ने तुमारी सेहन्गा? अपने पुत्रा जो इते लेई आ। ४२. से आये थिया करदा जे बुरीरूह ने तिसा जो पटकी करी मरोड़या अपना यीशु ने बुरी रूहे जो बकया कन्ने मुण्डे जो खरा करी के तसेरे बाबे का देई दिता।

यीशु अपने मरी जाने दी दुबारा भविष्यवाणी करदा है

४३. ता सारे मणु ईश्वरे दी शक्तियां का हैरान होई गये। ४४. अपन जा सारे मणु तिना सारे कमा जो से करदा थिया हैरान होये करदे थिये, ता तिनी अपने चेलैया जो गलाया ऐ गल्ला तुम्हारे कना बिच पेईया हिन किजो जे आदमी दा पुत्र आदमियां दे हत्था पकड़ी जाने जो है। ४५. अपन से इना गल्ला जो नी समझदे थिये, इस करी ऐ तिना का लुकी रेही, जे से तिस जो न जानी सकन कन्ने से इस गल्ला बारे तिस का पुछदे वी डरदे थिये।

नअता कन्ने सहनशीलता पराले शिक्षा

४६. फिरी तिना बिच ऐ गल्ला लगीयां होने, जे हमारे बिच का बड़ा कुण है। ४७ अपन यीशु ने त तनेरे दिला दी गल्ल समझी लेई। तर इक हलके मुण्डे जो अपने का खड़ा करी लेया। ४८. फिरी तिना जो गलाया, जे कोई मेरे ना का इस मुण्डे जो लेई लिखदा है कन्ने मिन्जो अपने बिच लेई लिगा। से मेरे भेजने वाले जो मनी लैगा किजो जे तुम्हारे बिच सब का छोटा का छोटा सेई

बड़ा है। ४६. ता फिरी यहून्ना ने गलाया, हे स्वामी असां ने इक मणु जो तेरे ना का बुरी रुहा जो कडते दिखया, कन्ने असा ने तिसा जो अदेरे तीकर मना किता,



किजो जे से हमारे कन्ने होई करी तेरे पिछे नी होई जान्दा है। ५०. यीशु ने तिना जो गलाया जे तिसा मना मत करो। किजो जे तुम्हारे खलाफ नी से तुम्हारे पासे हिन।

यीशु दा यरुशलम जाणा ता विद्रोही सामरी मणु

५१. जा तसेरे ऊपर चुकी जाने दे दिन पूरे होने वाले थिये, ता उसने यरुशलम जाने वास्ते पक्की सलाह बनाई लेई। ५२. फिरी तिनी अपने अगे दूता जो भेजया से सामरियां दे इक ग्रां विच गये, जे तसेरे वास्ते जगहा तैयार करने। ५३. अपन तिना लोकां तिस जो उतरने नी दिता, किजो जे से यरुशलम जो जाये करदा थिया। ५४. ऐ दिखी करी तसेरे चेले याकूब कन्ने यहून्ना ने गलाया हे प्रभु क्या तू चाहन्दा है जे असी हुकम करीये जे असमाना का अग छुड़की करी इना जो भस्म करी दे। ५५. अपन तिनी फिरी करी तिना जो बकी सुटया, कन्ने गलाया, तुसी नी जान्दे जे तुसी कुस आत्मा दे हिन। ५६. किजो मनुए

दा पुत्र मनुआ जो मारी मुकाने नी आया दा है अपन तिना जो बचाने जो आय रा है फिरी से कुसी होर आं जो चली गये ।

होनहार शिष्या दी परीक्षा

५७. जिस वेले से रस्ते मंभू चले दे थिये ता कुसी ने तिस जो गलाया जिथे-जिथे तू जांगा मैं तेरे पिछे चलंगा । ५८. यीशु ने तिस जो गलाया जे लोमड़िया दी गुफा हुन्दी ते पक्षियां दे घोसंले हुन्दे अपन मणुएँ दे पुत्रा जो सिर रखने दी बी जगहा नी है । ५९. तिनी दुएँ जो गलाया मेरे पीछे चली आ तिनी गलाया जे हे प्रभु मैं तेरे पीछे चली आंगा पर अवे मिन्जो अगे जाने दे जे अपने बाबे जो दबी आ । ६०. तिनी तिस जो गलाया जे मरे होया जो अपने मुरदे अपु दबने दे पर तू जाई करी ईश्वरे दे राज्य दी कथा सुण । ६१. इक होर ने गलाया, हे प्रभु मैं तेरे पीछे चली आंगा पर पहले मिन्जो अपने घरे दे लोकां जो छड़ी आने वास्ते जाने दे । ६२. यीशु ने तिस जो गलाया जे कोई अपना हथ हल्ला पराले रखी करी पिछे दिखदा है, से ईश्वरे दे राज्य जोगा नी है ।

सत्तर चेलया दा कम कन्न तनेरा हटी करी आना

१० फिरी इना गलां देबाद यीशु ने सत्तर होर मणु लिते फिरके जिस-जिस जगहा जो से अपु जाने जो था, तिथे तिना जो दो दो करी के भेजी दिता । २. फिरी तिनी तिना जो गलाया, जे पक्के दे खैतर मते हिन, अपन मजदूर घट हिन, इस करी के खेतरे दे मालिका दे अगगे विनती करो जे से अपने खेतरे जो कटने ताई मजदूर भेजी दे । ३. जाओ दिखो मैं तुसा जो भेडा साई भेडिया विच भेजदा है । ४. इस करी के न बटुआ ना खोख न जूते लेओ, न ही रस्ते विच कुसी जो नमस्ते करयो । ५. जिस कुसी घर विच जाओ, पहले गलाना जे इस घरे दा कल्याण होये ६. जो कोई तिथे कल्याण जोगा हुंगा ता तुम्हारा कल्याण तिना पर रिहन्गा नी ता से हटी कर तुमारे बाल आइ जांगा । ७. तिसी घर विच रेहयो, कन्ने जे किछ तिना का मिले सेई खायो पीयो किजो जे मजदूरे जो अपनी मजदूरी मिलनी ही चाई दी । घरे घरे मत फिरदे । ८. अता जिस नगरा मंभू जाओ कन्ने तिथे दे मणु तुसां जो रहने जो जगा दैण ते जे किछ तुम्हारे

सामने रखन सेई खायो । ६. तिते दे बुमारा जो खरा करयो कन्ने तिना जो गलाना जे परमेश्वरे दा राज्य तुम्हारे नेड़े आई गया दा है । १०. अपन जिस नगरा विच जाओ अता जे तिथे दे लोक तुसां जो न चाहन ता उते दे बजारा विच जाई करी गलाणा ११. जे तुम्हारे नगरा दी घूड़ भी जे हमारे पैरा जो लगी गई है असी तुम्हारे सामने भाड़ी दिन्दे ता भी ए तुसां जो ऐ दसी दिन्दे जे परमेश्वरे दा राज्य नेड़े आई रेया दो है । १२. मैं तुसा कन्ने गलादा हां जे तिस दिन तिस नगरा दा हाल सदोम दा हाल सहने जोगा हुंगा । १३. हाय खुराजीन हाय बैतसैदा जे शक्ति दे कम तुम्हारे विच किते गये जे से सुरा कन्ने सैदा मंभ किते जादे ते से खदोली लेई करी कन्ने घुड़ा विच बेई रकरी अपने मना दो मैला जो कड़ी सुटदे । १४. अपन न्याय वाले रोज तुम्हारे हाल का सूर ते सैदा दा हाल सहने जोगा हुंगा । १५. कन्ने हे कफरनहूम क्या तू स्वर्गा तक ऊंचा ही रिंगा ? तू ता अधोलोका तक भिक जांगा । १६. जे तुम्हारी गलाई मन्दा है से मेरी मन्दा है ते जे तुसा जो नीच समझदा है से मिन्जो नीच समझदा है ते जे मिन्जो नीच समझदा से मेरे भेजने वाले जो भी नीच समझदा है १७. से सत्तर जने खुशी कन्ने आई करी फिरी गलाने लगे हे प्रभु तेरे ना कन्ने बुरी आत्म भी हमारे हत्था विच है । १८. तिनी तिना जो गलाया, मैं शैतान जो बिजली सोई स्वर्गा का छुड़कया दा दिखे करदा थिया । १९. दिखो मैं तुसां जो ऐ पूरा-पूरा हक दिता है जे तुसी कीडे अते बिच्छुअ जो मुकाई रखो अते शत्रु दी सारी शक्ति पराले छाई जाओ । २०. ता भी इसा का खुरा मत होई जा जे आत्मा तुम्हारे बसा विच है, अपन इस गला का खुरा होई जाओ जे तुम्हारे ना स्वर्गा विच लिखी गये हिन ।

यीशु दा धन्यवाद करना

२१. तिसी बेले से पवित्र आत्मा मंभ होई करी खुशी कन्ने भरी गया कन्ने गलाया हे पिता, स्वर्गा कन्ने जमीने दे परमेश्वर, मैं तेरा धनंवाद करदा है, जे तू इना गला जो ज्ञानियां कन्ने समझदारां मणुआ का लुकाई करी रखया, अत हल्के छोकरुआ जो दसी दिता हां, हे पिता, किजो जे तिजो ऐ खरा लगया । २२. मेरे पिता ने मिन्जो सब किछ देई दिता दा है कन्ने कोई नी जान्दा जे पुत्र कुण है सवाये पिता दे, कन्ने पिता कुण ऐ भी कोई नी जान्द सिवाये पुत्र दो, कन्ने से भी जुस

पराले पुत्र तिस जो दसना चाहे तो । २३. फिरी चेलयां पासे फिरी करी गलाया, धन्य हिन से अंखा जे ऐ गल्ला जे तुसी दिखदे हिन दिखदीयां हिन । २४. किजो जे मैं तुसा जो गलांदा जे मते सारे भविष्यवाणी करने वाले कन्ने राजेआ ने ऐ चाया जे, जे गल्ला तुसी दिखदे हिन से दिखन पर नी दिखी सके, जे गल्ला तुसी सुणदे ही सुनन पर भी नी सुणी सके ।


खुशी दी जिन्दगी किया मिलगी

२५. अते दिखो भई इक मनु अगे आई करी तिस जो ऐ गलाई करी ते परखने लगया, जे हे गुरु सदा दा जीवन पाने ताई मैं कदेये काम करा । २६. तिनी तिसा जो गलाया जे व्यवस्था विच क्या लिखया है ? तू किया पढ़दा हुन्दा ? २७. तिनी जबाब दिता जे तू प्रभु अपने ईश्वरे कन्ने अपने सारे मना अपने प्राणा कन्ने अपनी सारी शक्ति कन्ने अपनी सारी समझदारी कन्ने प्रेम रख, कन्ने अपने पड़ोसी जो अपने सांई प्यार कर । २८. तिनी तिस जो गलाया, तें ठीक जवाब दिता, ऐई कर ते तू जिन्दा रिंगा । २९. अपन तिनी अपने तांई धर्मी बुलाने तिकर यीशु जो गलाया ते मेरा पड़ोसी कुण है ?

खरे सामरी दा बृष्टान्त

३०. यीशु ने जवाब दिता, जे इक मणु यरुशलेम का यरीहो जो जाये करदा थिया, जे चोरा ने तिस जो घेरी लेया तसेरे कपड़े उतारी ले ते जो मारी मारी करी अधमुआ करी के छडी करी ते नसी गये । ३१. ते फिरी इयां होया, जे उसी रस्ते का पुरोहित थिया चलेया दा, पर तिस जो दिखी करी मुंह घेरी करी चली गया । ३२. फिरी इक पंडित तिदा का गया ते से भी मुंह घेरी करी चली गया । ३३. अपन इक सामरी तिथे का चलेया दा थिया ते तिस जो तिसा पराले दया आई गई । ३४. ते तसेरे का आई करी तमेरे जखमा पराले तेल कन्ने दाखा दा रसा लगाई करी पट्टियां बनी दितिया ते अपने घोड़े पराले चढ़ाई करी सराये जो लेई गया, ते तसेरी खुब सेवा कीती । ३५. दुये दिन तिनी दो दिनार कड़ी करी सराय दे मालिका जो दिता ते गलाया असेरी सेवाकरयां ते जे

तेरा इस पराले होर लगगा से मैं हटदे वेले तिजो देई दिगा । ३६. अवे तेरी समझे विच से जा चोरा विच धिरी गया था, इना तिना विच का तसेरा पड़ोसी



कुण हुंगा । ३७. तिनी गलाया, जिस ने तिसा पराले दया कीती, यीशु ने तिस जो गलाया, जा तू भी इयां ही करेयां ।

मार्था कन्ने मरियम

३८. फिरी जिस वेले से जाये करदा थिया ते सै इक ग्रां विच गया, ते मार्था ना दी इक जनानी ने तिस जो अपने घरे बठाया । ३९. कन्ने मरियम ना दी तसेरी इक बहन थी, सै प्रभु दे पैरां वाल बेई करी तसेरी गल्लां सुणदी थी । ४०. अपन मार्था सेवा करी-करी घबराई गई ते तसेरे का आई करी गलाने लगी, हे प्रभु, जे तिजो जरा समझनी जे मेरी बहन ने मिन्जो किले सेवा करने जो छड़ी

रखया दा है ? इस करी तिसा जो गला जे मेरी मदद करे । ४१. प्रभु ने तिसा जो जवाब दिता, मार्था, हे मार्था तू बड़ी गल्ला दी फिकर करदी कस्से घबरांदी है । ४२. अपन इक गल्ला जरूरी है, जे उस खरे हिस्से जो मरियम ने लेई लेया ह जे तिस का खोई नी जाई सकदा ।

प्रभु की प्रार्थना

११ फिरी ओ कुसी जगह प्रार्थना थिया करदा ते जिस बेले खत्म करी चुकया ते उसदे चेलयां विच इक ने उसजो बोलया; हे प्रभु जिहां यहुन्ना ने अपने चेलया जो प्रार्थना करना सखाया उईयां ही असां जो वी सिखाई दे ओ । २. उसने उन्हां जो बोलया; कि जिस मौकै तुसी प्रार्थनां करो ते बोलो; हे पिता, तेरा नाम पवित्र मनया जाये, तेरा राज आये । ३. हमारी दिन भर दी रोटी रोज असां जो दे । ४. असां दे पापां जो मुआफ कर, किजो कि असी अपने सारे कसूर करने वालेयां जो मुआफ करदे हन, असा दी परीक्षा मत लें ।

अधी रात मंभ मित्र दे आणे की कथा त कस्से रोज प्रार्थना करना

५. उसने उन्हां जो बोलया, कि तुसां बिच इदेया कुण है जिसदा इक मित्र होये, जेहड़ा अधी रात जो उस का जाई करी बोले कि हे मित्र; मिन्जो तीन रोटिया दो ६. किजो कि इक मेरा दोस्त मेरे का आया दा है, ते उसजो दैणे वास्ते मेरे का कुछ नी है । ७. ते ओ अन्दर का ही उसजो जबाब देई दे, कि मिन्जो दुख मत दे; दरवाजा बन्द है ते मेरे बच्चे मेरे कस्से विस्तर पर हैं, इस वास्ते मैं उठी करी तिजो देई नी सकदा । ८. मैं तुसां जो गलांदा कि उसदा मित्र होणे पर ओ उठी करी न दे तां भी उसजो उसदी शर्म छड़ी कर मगणे कस्से उसदी जहरत मुताबिक उठी करी दिगा । ९. मैं तुसा जो गलांदा कि मंगणे ता तुसां जो दिता जांगा तोपो त तुसा जो मिलगा द्वार खडकागे त खोलया जागां १०. किजो कि जेहड़ामंगदा है उसजो दिन्दे ते जेहड़ा तापदा उसजो मिली जान्दा, ते जेहड़ा खटकाटादां उसदे वास्ते खोलया जांदा । ११. तुसां मंभ ऐसा कुण बब हुंगा जेहड़ा अपने पुत्र जो रोटी मंगणे पर पत्थर दिगा ? या मछी मगणे पर उसजो सप दिगा ? १२. या अण्डे मंगे ते बिच्छू दिगा ? १३. ते तुसी बुरे होई

करी भी अपने बच्चेयां जो खरी चीजा दिन्दे ते स्वर्गीय पिता अपने मंगणे वालेयां जो पवित्र आत्मा किजो नी दिन्गा ?

यीशु दा इस गल्ल दा जबाब जे ओह शैतानी दी ताकत कन्ने कम करदा

१४. फिरी उसने इक गूंगी परेत आत्मा जो कडया ते जिस मौके ओ निकली गई ता गूंगा बोलणे लगया ता लोकां जो बड़ी हैरानी होई १५. पर उन्हां च मतेयां ने बोलया कि परेतआत्मा दे प्रधान, शैतान दी मदद कने इन्हां जो कडदा १६. होरा ने उसदा मतयान लैणे वास्ते उसका असमान दा इक चिन्ह मंगया । १७. पर उसने उन्हां दे मन दी गल्ल जो जाणी करी उन्हां जो गलाया कि जिस राज विच फूट हुन्दी ओ राज उजड़ी जान्दा, ते जिस घरे च फूटहुन्दी ओ घर नास होई जान्दा । १८. ते शैतान अपने ही खिलाफ होई जाये ते उसदा राज किया करी बणी रहणा ? किजो कि तुसी मेरे बारे च त गलादे कि यह शैतान दी मदद कने प्रेतआत्मा जो कडदा । १९. भला जे मैं शैतान दी मदद कने प्रेत आत्मा जो कडदा ते तुम्हारी सन्तान कुसदी मदद कने कडदी ? इस वास्ते ओ ही तुम्हारा न्याय चुकांगे । २०. पर जे मैं परमेश्वरे दी शक्ति कने पैत-आत्मा जो कडदा ताई प्रभु दा राज तुम्हारे नेडे आई पुजया । २१. जिस मौके जोर वाला आदमी हथियार लेई करी अपने घरे दी रखवाली करदा तां उसदी जायदाद बची रिन्दी । २२. पर जिस मौके उसका भी ताकतवाला आदमी उस पर हमला करदा ते उसजो जीति लैन्दा ते उन्हां हथियारा पर जिन्हां पर उसजो भरोसा हुन्दा खोई लिन्दा ते उसदी दौलत जो लुटी करी बडी दिन्दा । २३. जेहड़ा मेरे कन्ने नहीं से मेरे खिलाफ ते जेहड़ा मेरे कन्ने बटोलदा नी; ओह खलारदा ।

अधूरे सुधार दा डर

२४. जिस मौके बुरी आत्मा आदमी का निकली जान्दी ते सुकी जगह जो तोपदी फिरदी ते जिस मौके उसजो ऐसी जगह नी मिलदी ते बोलदी जे मैं उसी जगह उसी घरे वापस हटी जाणां । २५. ते उन्ही आई कर उस घर जो सोतया सुताया ते सजया सजाया पांदी । २६. तां ओ जाई करी होर सत अपने का बुरी बदरुहा जो अपने कन्ने लेई आन्दी उस जगह रिहन्दी ते उस

आदमी दी हालत पहले का खराब होई जान्दी । २७. जिस मौके ओ ऐ गल्ला गलादां थिया ता भीड़ का इक जनानी ने जोरे कने बोलया कि ओ गर्भ धन्य है जिस विच तू रहेया ते ओ मम्मे जिन्दां जो तू चूसया । २८. उसने बोलया हा पर धन्य ओ जेहड़े प्रभु दा बचन सुणदे ते मन्दे ।

नशान मंगणे पर चितावनी

२९. जिस मौके बड़ी भीड़ जमा हुन्दी जान्दी थी ते उसने बोलया कि इस युग दे लोग बड़े बुरे हिन ओ निशान मंगदे पर यूनस दे चिन्ह जो छडी करी उन्हां जो कोई होर निशान नी मिलणा ३०. जिहां यूनस नीनवे दे लोकां वास्ते निशान ठहरेया उहियां ही मनुष्य दा पुत्र भी इस युग दे लोकां वास्ते निशान हुणा । ३१. दक्षिण दी रानी न्याय दे रोजे इस युगा दे मणुआ कन्ने उठी करी उन्हां जो दोषी ठहरांगी कि जोकि ओ सुलेमान दा ज्ञान सुनने ताई जमीन दे किनारे का आई ते दिखो इसे ता ओह है जेहड़ा सुलेमान का भी बडा है । ३२. नीनवे दे लोक न्याय दे रोज इन्हां लोकां कन्ने खड़े होई करी उन्हां जो दोषी ठहरांगे । किजोकि उन्हां ने यूनस दा प्रचार सुणी करी अपने मन फेरे ता दिखो यते ओ है जेहड़ा युनुस का भी बडा है ।

दीये दी शिक्षा

३३. कोई भी आदमी दिया जलाई करी तलोबरु च या पैमाने हेठ नी रखदा पर ओ दयूखड़ पर रखदा ता जेहड़े अन्दर आण उन्हां जो लो परगड़ा होये । ३४. तेरे जिस्म दा दीया तेरी अंखी है जिस मौके तेरे जिसम दीया अंखा उजजल हिन ते तेरा शरीर भी उज्जल है पर जे ओ बुरीहिन ता तेरा जिस्म भी अन्धेरा है । ३५. इस वास्ते चौकन्ना रह कि जेहड़ा उजाला तेरे च है ओ अन्धेरा न होई जाये । ३६. इस वास्ते जे तेरा सारा जिसम उजियाला होये ते उसेरा कोई हिस्सा अन्धेरा नी रहे, तां सब दा सब ऐसा उजाला हूणां जैसा उम मौके हुन्दा जिस मौके दीया अपनी चमक कन्ने तिजो उजाला दिन्दा ।

यीशु फरीसियां जो तलाइदा

३७. जिस मौके ओ गल्ला थिया करदा ते इक फरीसी ने उसको विनती कीती कि मेरे घरे रोटी खाओ, ते ओ अन्दर जाई करी रोटी खाणे बैठा ।

३८. फरीसी को अजीब लगया जिस मौके उसने दिखया कि ओ रोट्टी खाणे का पहले नहादा नी । ३९. प्रभु ने उसजो बोलया, हे फरीसियो, तुसी कटोरे ते थाली जो उपर उपर का ही माजदे पर तुम्हारे अन्दर अन्धेरा कने दुष्टता भरी दी है । ऐ बेबकूफो, जिसने बाहर दा हिस्सा बनाया ते कया उसने अन्दर दा नी बनाया ? ४१. पर हां, अन्दर वालिया चीजां जो दान करी दयो ते दिखो कि सब कुछ तुम्हारे वास्ते शुद्ध होई जाणा । ४२. पर हे फरीसियो, तुसां पर हाय । तुसी पोदीने ते सुदाब दा ते सब तरह दे सागपात दा दसवां हिस्सा दिन्दे पर न्याय जो ते प्रमेश्वरे दे प्यार जो टाली दिन्दे । हूणां ता इहां चाहिदा थिया जे तुसी इन्हां जो भी करदे रिन्दे ते उन्हां जो भी नी छड़दे । ४३. पर हे



फरीसियो तुसां पर हाय । तुसी मन्दिरा च खास खास आसन ते बजारां च नमस्ते तोपदे । ४४. तुसां पर हाय । किजो कि तुसी उन्हां छुपी दिया कबरा साई हिन जिहा पर लोग चलदे पर उन्हां जो पताभी चलदा ४५. तां इक शरियत दे जानने वाले ने उसजो जबाब दिता कि हे गुरु, इन्हां गल्लां कने तू हमारी निन्दा करदा है । ४६. उसने उन्हां जो बोलया कि हे शरियत दे जानकारे तुसां पर भी हाय, तुसी ऐसे बोझ जिन्हां जो चुकणा बड़ा मुश्किल हुन्दा दूसरेया पर लददे ते अप्पू इक उंगली कने वी नी छुन्दे । ४७. हाय तुसा पर । तुसी उन्हां पूछां देणे वालयां दी कबरां जो बणादे, जिन्हां जो यम्हारे बाप दादया ने मारी दिता थिया । ४८. ता तुसी गवाह रे ते अपने बापदादेयां दे कम्म च मिले दे ने किजो कि उन्हां ने उन्हां जो मारी दिता ते तुसो उन्हां दिया कबरां बणादे ।

४६. इस बास्ते परमेशवर की बुद्धि ने भी गलाया जे मैं नबियां ते प्रेरितां जो भोजना ते ओ उन्हां च कितनेयां जो मारी दिंगे ते कितनेयां जो सतागे । ४७. ता जे जिने बादिधा दा लोहूँ दुनिया दे गुरु का बहाया गया दा है सारे दा साहद उस दुनिया दे हीका का लिता जांगा । ४८. हाबिल दे मरने का लेई करी जकरयाह दे मरने ताई जे मन्दिर अते बेदी दे मभाटे मारे गये, मैं तुसां कझे सच-सच गलान्दा है जे तसेरा सारा लेखा इसी बेले दे मनुआ का लिता जागां । ४९. हाय तुसां इन्जामियां पर कि तुसां ने ज्ञान की चाबी ता लेई लई पर ना ता अप्पू अन्दर गये ते न जाणे बालया जो अन्दर जाणे दिता । ५०. जिस मौके ओ उते का निकलया ते शास्त्री ते फरीसी बड़े पिछे पेई गये, ते छोड़ने लगे, ता जे ओह होर गल्लां करे ५१. ते ओह इस पुन च लगे रहे कि जसेरी कुसी गल्ल जो पकड़न ।

कपट दे खिस्साफ येशु की खेलयां जो खेताबनी

१२ जिस मौके हजारा की भीड़ लगी गई । इते ताई कि लोक इक दुएँ पर डेई पैने लगे ते सारेयां का पहले यीशु ने अपने खेलयां जो बलाया के फरीसियां दे कपट का खमीर साही हुस्वार रेयो । १. कुछ भी डकया दा नी जन्हा खोलया नी जाण, ते ना ई कुछ छुपया की है जन्हा जाणया नी जाण । २. इस बास्ते जन्हा तुसां ने अन्धेरे च बलाया दा है ओ प्रमडे च सुजायां जाणा । ते जन्हां तुसां ने कमरेयां च कभा च बलाया दा है उसदा प्रचार कोठ्यां पर हुणां ।

खेलया जो होसला देना

४. मैं तुसां जो जेहड़ो मेर मिस हिन बलादा कि जेहड़ा शरीर पर चोट करदे पर उसदे पिछे कुछ नी करी सकते । उन्हां का मत डरा । ५. मैं तुसां जो बतदा कि तुसां जो कुस का डरणा चहिन्दा । चोट करने का बाद जिस जो नरक च सुटयो दा हक है उसका डरो । मैं तुसां जो बलादा कि उसी का डरो । ६. क्या दो पैसे च पंज चिड़िया (बौरया) नी बिकदियां ? त भी प्रभु उन्हां च इक जो भी नी भुलदा । ७. तुम्हारे ते सिरे दे बाल भी बिणे दे हिन । सौ डरो नी, तुसी चिड़िया (बौरया) का बडे बड़ी करी हिन । ८. मैं तुसां जो बोलदा कि जेहड़ा कोई आदमिया सामणे मिन्जो मन्नी लिबा उसजो मणु दा पुत्र

भी प्रभु दे दूता सामणें मनी लिंगा । ६. पर जेहड़ा मणुआ सामणें मिन्जो पछाण-गां नी उसदा प्रभु दे दूता अगे जाणने दा इनकार होई जाणा । १०. जेहड़ा कोई मणु दे पुत्र दा विरोध करंगा उसदा कसूर मुआफ कीता जांगा पर जेहड़ा पवित्र आत्मा दी बुराई करंगा उसदा कसूर मुआफ नी होणा । ११. जिस मौके लोक तुसां जो सभां च हाकिमा ते मुलाजिमा सामने लेई जाणं ते फिकर मत करंदे कि किहां उन्हां जो जबाब देईय या क्या बोलिये । १२. किजो कि पवित्र आत्मा उसी मौके सिखाई दिगां कि क्या बोलणा चाहिदा ।

लोभी ते अमीर मूर्ख दी गल्स

१३. फिरी भीड़ का इक ने उसजो बोलया, हे गुरु मेरे भाई जो बोल कि बापू दी जायदाद मिन्जो बंडी दे । १४. उसने उसजो गलाया हे मणु कुस ने मिन्जो तुम्हारा न्यायी ते बटंवाराकरने वाला बणाया ? १५. उसने उन्हां जो गलाया चौकन्ने रेयो ते हर तरह दे लोभ का अणणे जो बचाई के रखो । किजो के कुसी दा जीणा उसदी मती जायदाद कन्ने नी हुन्दा । १६. उसने उन्हां जो इक गलल दस्ती, जे कुसी अमीर आदमी दी जमीन च बड़ी फसल होई । १७. ता ओ सोचणें लगया जे क्या करा किजो कि मेरे का इस फसल जो रखणें वास्ते जगह नी कि मैं इस जो रखी सका । १८. तां उसने गलाया कि मैं ए करमा जे मैं अपनी बखारिया तोड़ी करी बडियां बणांगा । १९. ते उते अणणा सारा अन्न ते दौलत रखगा ते अपनी जान जो बोलगा कि हे जान, तेरे वास्ते साला वास्ते दौलत है चैन कन्ने खा पी ते सुख कने रह । २०. पर परमेश्वर ने उस जो गलाया हे मूर्ख इसी राती तेरे प्राण निकली जाणे ते जेहड़ा तु इकठा कीता ओ कुसेरा होणा ? २१. इहां ही ओ आदमी भी है जेहड़ा अणणे वास्ते घन बटोरदा पर परमेश्वर दी नजर च घनी नी है ।

पिस्ता पर पिस्तावनी

२२. फिरी उसने अणणे चेलयां जो बोलया, कि मैं तुसां जो बोलदा कि तुसी अणणे प्राण दी फिकर मत करो, कि असी क्या खांमे न अणणे शरीर पर पीणे दी कि क्या पां मे २३. किजो कि रोटी का प्राण ते कपड़ेयां का पिंडा (शरीर)

बढ़ी करी है। २४. कौआं पर ध्यान करो ओ न बोन्दे, न कटदे न उन्हां दा भण्डार ते ना ही गल्ला हुन्दा तां भी परमेश्वर उन्हां जो पालदा। तुसां दा मुल पक्षियां का बड़ा है। २५. तुसां च इदेया कुण है जेहड़ा चिन्ता करी के अपनी हालत जो इक घड़ी भी बधाई सकदा? २६. इस वास्ते जे तुसी सारेयां का छोटा काम भी नी करी सकदे ते होर गल्ला वास्ते किजो फिकर करदे? २७. सोसनो दे बूटेयां जो दिखो जे ओ किया बददे। ओ न मेहनत करदे। न कतदे तां मैं तुसां जो बोलदा कि सुलेमान ने भी अपनी शान विच ऐसे कपड़ेनी पाये दे ने। २८. इसवास्ते परमेश्वर जेड़ा घा जो जेहड़ी अज है ते कल भटी च फूकी जाणे एसा पहनादा ता हे थोड़ा विश्वास करने वालयो तुसां जो किजो नी पहनांगा।



२९. तुसी इस गल दी खोज मत करो कि क्या खागें ते क्या पीगें, ते ना ही शक करो। ३०. किजो कि दुनियां दी सारियां ज तियां इस खोज विच रिहन्दियां ते तुम्हार पिता ए सब जाणदा कि तुसां जो इनहां चीजां दी जरूरत है। ३१. पर तुसी उसदे राज दी तोपा च रेओ तां तुसां जो ऐ सारियां चीजां मिली जाणियां। ३२. हे छोटे भुण्ड तू मत डरे किजो कि परमेश्वरे जे ऐ खरा लगया कि तुसा जो राज दे। ३३. अपना धन बेची करी दान करी दयो ते अपने वास्ते ऐसे बटुए बणाओ जेहडे पुराणे नी हुन्दे। जिस दा मतलब ऐ कि तुसी अपना धन स्वर्ग च जमा करो, जिते ओ घटदा नी ते ना ही चोर भी नेडे आन्दा न कीड़ा लगदा। ३४. किजो कि जिते तेरा धन हुंगा उते तेरा मन लगया रहणा।

जागदे रहणे दी जरूरत ते विश्वासी नौकर दी कथा

३५. तुसां दे लक बने होण ते तुम्हारे दिये जलदे होण । ३६. ते तुसी उन्हां आदमियां साही बणो जेहडे अपने स्वामी दा रस्ता दिखते होण, जे ओ जगह का कुस मौके मुड़दा ते आई करी दरवाजा खटखटांदा ते तुसी भटपट खोलण । ३७. ओ दास धन्य हिन जिन्हां जो उन्हां दा मालिक आई करी चागदे होये पांदा । मै तुसां कने सच बोलदा कि जो अपने लक जो बनी करी उन्हां जो भोजन करने बैठांगा । ते नेडे आई करी उन्हां दी सेवा करगां । ३८. जे ओ आई करी राती दे दुए या तीसरे पहर उन्हां जो जागदे पांगा ता ओ (दास) नौकर धन्य ने ३९. पर तुसी यह जाणी रखो जे घरे दा मालिक यह जाणदा जे चोर कुस घड़ी आंगा ते ओ जागदा रिहन्दा ते अपने घरे दी दवाल पुटणे नी दिदां । ४०. तुसी भी त्यार रहो जिस घड़ी मणु दे पुत्र ने ईणा तुसी सोची भी नी सकदे । ४१. तां पतरस ने गलाया हे प्रभु तू यह गल असां जोई बोलदा या सारेयां जो । ४२. प्रभु ने गलाया कि ओ विश्वासी ते अकल मन्द भण्डारी कुण है जिस जो उसदा स्वामी नौकर चाकरां दा सरदार बणाये ते मौके पर उस जो दसी दे । ४३. ओ दास धन्य है जिसजो उसदा स्वामी आई करी ऐसा ही करदे पान्दा । ४४. मै तुसां कने सच बोलदा कि ओ उस जो अपनी सारी दौलत दा सरदार बणागां । ४५. पर जे ओ दास सोचणे लगे कि उसदा मालिक आणे च देरी करे करदा है ते ओ दासां जो ते दासियां जो मारने पिटणे ते खाणे पीणे ते पियकड़ होणे लगे ते उसदा ४६. स्वामी ऐसे दिन, जिस रोज ओ उसदा रस्ता नी दिखदा होय, ते ऐसी घड़ी जिस जो ओ ना जाणदा होय, आगां ते उसदी खरी मुरम्मत करी के उसदा हिस्सा अविश्वासीयां कने ठहरांगा । ४७. ते ओ दास जेहड़ा अपने मालिक दी मर्जी जो जाणदा थीया ते त्यार नी रेया, ते उसदी मरजी कने नी चलगा बड़ी मार खांगा । ४८. पर जेहड़ा नी जाणी करी मार खाने वाला कम करे, ओ थोड़ी मार खंगा । इस वास्ते जिस जो मता दिता दा है उसका मता मंगया जाणा ते जिस जो मता सौपयां दा है उसका मता मंगया जाणा ।

बकत दे निशान

४९. मै जमीन पर अग लगाणे आया ते सिर्फ वह चाहंदा कि अबे ही सुलगी जांदी । ५०. मिन्जो ते इक बपतिस्मा लैण है ते जा ताई ओ न होई ले ता ताई

मैं बड़ा जिन रिगा । ५१. तुसी क्या बुझदे हिन जे मैं धरती पराले मेल कराने आया है ? अपन; नी मैं ता तुसां जो बरव कराने आया है । ५२. किजो कि अवे का इक घरे च पंज जणे अपु च विरोध रखमे तीन दो कने ते दो तिना कने । ५३. पयो पुत्र कने, पुत्र पयो कने विरोध रखगा, मां घी कने, ते घी मां कने । सस नू कने ते नू सस कने विरोध रखगी । ५४. ते उसने भीड़ जो गलाया, कि जिस मौके पश्चिम का बदल उठदे ते तुसी बोलदे बारिष होणी, ते ईहां ही हुन्दा । ५५. ते जा दखिना चलदी दिखदे ते बोलदे लू (गर्म हवा) चलणी ता तिहां ही हुन्दा ५६. हे कपटियो । तुसी धरती ते आकाश दे भेद करी सकदे पर इस जमाने दे बारे च किजो नी भेद करना जाणदे ? ५७. ते तुसी अपू ही फैसला किजो नी करी लिन्दे कि ठीक क्या है ? ५८. जे तू अपने मुदेई कने हाकम का जाये करदा होये ते रस्ते विच ही तू छुटवे दी कोशिश कर नी ता ऐसा न होये कि ओ तिजो न्यायी का लेई जाये त न्यायी तिजो प्यादे (सपाही) दे हवाले करी दे ते प्यादा तिजो जेले खाने च पाई दे ५९. मैं तुसां कने सच सच गलांदा कि जा ताई तू दमड़ी दमड़ी ती भरगा ता ताई तू उते का नी छुटणा ।

पांपा पर पछताणे वास्ते उपदेश

१३ उस मौके कुच्छ लोक आये ते उस कने गलिलियां दी गल्ला करने लगे, जिन्दा दा लहू पीलातूस ने उन्हां दी बलिदाना कन्ने मिलाया थिया । २. ऐ सुणी करी उसने जवाब दिता कि क्या तुसी ऐ समझदे जे ऐ गलीली ते बाकी सारे गलिलियां का पापी थे तां उन्हां पर ऐ मुसीबत पेई ? ३. मैं तुसां जो बोलदा के नहीं पर जे तुसां ने भी अपणां मन नी फेरया ते तुसी सब इसी रिवाजे कने नास होई जाणे । ४. या तुसी ऐ समझदे कि ओ अठारह जणे जिन्हां पर शीलोह दा गुम्मट डिगया ते ओ दबी करी मरी गये, यरुशलम का ते सब रहने वालेयां का ज्यादा कुसूरवार थे ? ५. मैं तुसां जो गलांदा कि ऐसा नी, पर तुसां ने अपने मन नी बदले तां इसी तरीके कने तुम्हारा नास होई जाणां ।


फल बगैर अंजीर दा बूटा

६. फिरी उसने ऐ गल्ल भी दसी, के कुसी दी बाड़ी विच अंजीर दा बूटा लगया थिया । ओ उस पर फल तोपणे आया पर कुच्छ नी मिलया । ७. तां

उसने वागीचे दे माली जो गलाया कि दिखे मैं तीन सालां का इस अंजीर दे बूटे बिच फल तोपदा रेया । पर कुच्छ नी मिलदा । इसजो कटी दे जे ए जगह जो भी न रोके । ८. उसने उसजो जबाब दिता कि हे मालिक इसजो इक साल तक होर रहणे दे, मैं इस जो चौपासे खोदी करी खाद पांगा । ९. जे अग्रे फली पेया ता ठीक नी ता बडी देणा ।

सबत दे रोज इक जनानी जो ठीक कीता जाणां

१०. शनिचरे (सबत) दे रोज ओ इक मन्दिरे बिच उपदेश दिन्दा थिया ते दिखो, इक जनानी जिस जो अठारह सालां का कमजोर करने वाली चुडैल लगी दी थी ते ओ कुबड़ी होई गई दी थी ते कुसी तरीके सिधी नी होई सकदी थी । १२. येशू ने उसजो दिखी करी सदया ते गलाया, ऐ जनानी तू अपनी कमजोरी का छुटी गई । १३. तां उसने उस पर हथ रखे ते ओ सिधी होई गई ते कने परमेश्वर दी बड़ाई करने लगी । १४. इस वास्ते के येशू ने सबत (शनिचर) दे रोज उसजो ठीक कीता थिया । मन्दिरा दा सरदार खौरा होई करी लोकां



जो गलाणा लगया जे छः दिन है जिन्हां च कम करना चाहिदा इस वास्ते उन्हां ही दिना च आई करी ठीकर हो पर सबत दे रोज नी । १५. ए सुणी करी प्रभु ने जबाब दिता, हे कपटियो क्या सबत ले रोज तुसी अपने बैलां जो ते गधेया जो गुआड़ी का खोली करी पाणी प्याणे नी लेई जान्दे १६. ते क्या ए दीन नी था कि ओ जनानी जेहड़ी इब्रहीम दी कुड़ी ऐ ते जिस जो शैतान ने १८. सालां का जकड़या दा थिया सबद दे रोज इस बन्न का छुड़ाई जादी १७. जिस मौके उसने

ए गल्ला गलाईयां ता उसदे खिलाफ लोग शर्मिन्दा होये ते सारी भीड़ उन्हां बड़ाई दे कम्मा च जेहड़ें ओ करदा थिया खुशी होई ।

राई दा दाणा ते खमीर दी गल्ल

१८. फिरी उसने गलाया कि प्रभु दा राज कुस दे बराबर है ? ते मैं उसदी बराबरी कुस कस्ने करां ? १९. ओ राई दे दाणे दे बराबर है जिस जो कुसी आदमी ने लेई करी अपनी बाड़ी च बोया ते बदी करी बूटा बणी गया ते असमान दे पछिया ने उसपर बसेरा (अल्ले) बनाई लेया । २०. उसने फिरी गलाया कि मैं परमेश्वर दे राज दी बराबरी कुस कने करां ? २१. ओ खमीर सांही है जिसजो कुसी जनानी ने लेई करी तीन पसेरी आटे च मिलाया ते सारा आटा हुन्दे हुन्दे खमीर होई गया ।

जीणे दा सही रस्ता

२२. ओ शहर शहर गांव गांव हुन्दा होया उपदेश करदा यरुशलम पासे जाये थिया करदा । २३. ते कुसी ने पुछया हे प्रभु क्या मुक्ति पाणे वाले थोड़े ने ? २४. उसने उन्हा जो बोलया कि निवे दरवाजे रस्ते अन्दर आणे दी कोशिश करो । किजो कि मैं तुसां जो गलांदा जे मतेयां ने अन्दर आणे दी कोशिश करनी पर आई नी सकणा । २५. जिस मौके घरे दा मालिक दरवाजा बन्द करी दिगा ते तुसी बाहर खड़े होई करी दरवाजा खडकांगे तो गलांगे हे प्रभु असां वास्ते खोली दे, तां जबाब दे कि मैं तुसां जो नी जाणदा, तुसी कुते दे हिन ? २६. तां तुसी गलाणे लगो कि असां ने तेरे सामणे खाया, पीता ते असां दे बजारां विच तै उपदेश दिते । २७. पर ओ गलांगा कि मैं तुसां जो गलांदा कि मैं तुसां जो नी जाणदां, तुसी कुते दे हिन । हे बुरे कमा बालयो । तुसी सारे मेरे का दूर होई जाओ । २८. उते जिते रोना ता दन्दा दा कड़कड़ाणा हुंगा जिस मौके तुए इब्रहिम इसहाक ते याकूब ते सब नबियां जो परमेश्वर दा राज च बैठे दे ते अपने आप जो बाहर कडे दी दिगे । २९. ते पूर्व, पश्चिम उत्तर ते दक्षिण का लोक आई करी परमेश्वर दे राज दे जग च हिस्सा लिगे । ३०. ते दिखो कई जेहड़ पिछे न ओ अगे हुनो ते कई जेहड़ें अगे न पिछे होणे ।

हेरोदीस की बुझणी

३१. उसी मौके कितने ही फरीसीयां ने आई करी उसजो गलाया इदे का चली जा, किजो कि हेरादीस तिजो मारी देणा चाहन्दा। ३२. उसने उन्हां जो गलाया जाई करी उस लोमड़ी जो बोली दया कि दिखे मैं अज ते कल प्रेत-आत्मा ते बिमारां जो ठीक करदा ते परसो तक पूरा करंगा। ३३. ता भी मिन्जो अज कल ते परसों चलना बड़ा जरूरी है। किजो कि होई नी सकदा कि कोई भविष्यवक्ता (अग्ने की गल्ला दसणे वाला) यरुशलेम दे बाहर मारया जाये।

यरुशलेम पर विलाप (रोणा)

३४. हे यरुशलेम, हे यरुशलेम तू जेहड़ा भविष्यवक्ताआंवा (नबियां) जो मारी दिन्दी ते जेहड़ा तेरे का भेजया गया उन्हां जो पत्थर मरवान्दी, कितनी बारी मैं सोचया कि जिहां मूर्गी अपने बच्चयां जो अपने पंख थल्ले इक्कठा करदी तिहां ही मैं भी तेरे बचयां जो इक्कठा करां पर तिजो खरा नी लगया। ३५. दिखे तेरा घर तेरे वास्ते उजाड़ छड़या जान्दा ते जा ताई तू ए न बोले कि धन्य है ओ जेहड़ा प्रभु दे नां पर आन्दा ता ताई तू मिन्जो फिरी कदी नी दिखें।

सबत दे दिन जलोघर रोग दे रोगी जो ठीक करणा

१४ फिरी ओ सबत दे रोज फरीसीयां दे सरदारा च कुसी दे घरे रोटी खाणे गया। ते ओ उसदी ढोक च थिये, २. ते दिखो इक आदमी उसदे सामणे थिया जिस जो जलोघर दा रोग थिया ३. इस पर येशु ने फरीसीयां ते शरियत दे जानकार जो पुछया कि क्या सबत दे दिन ठीक करणा ठीक है या नी? पर ओ चुप रहे। ४. ता उसने उसजो हथ लगाई करी ठीक किता ते जाणे दिता। ५. फिरी उसने उन्हां जो गलाया कि तुसां च ऐसा कुण है? जिसदा गधा या बैल कुर्ये विच डूबी जाये ते सबत दे रोजा ओ उसजो भट बाहर नी कड़गा? ६. ओ इन्हां गल्ला दा कोई जबाब नी देई सके।

नम्रता ते बड़ाई

७. जिस मौके उसने दिखया कि सदद् नयीत द्वारा सदे दे लोग किजो खरी कदे उन्नी जगह चुणी लिन्दे, ते उसने इक गल्ल सुणादे होये उन्हां जो गलाया कि जिस मौके कोई तिजो ब्याह च सदे ते खास जगह पर मत बैन्दा, कुये इहां नी होये कि उसने तेरे का भी कुसी बड़े जो न्योता दिता दा होये । ते जिसने तिजो ते उसजो दीना जो न्योता दिता दा है, आई करी तिजो बोलो कि इस जो जगह देई दे, ते तिजो शर्मिन्दा होई करी सारेयां का हेठ बैणा पे । १०. पर जिस मौके तू सदया जाये तू सबका हेठ बै, कि ओ जिस तिजो न्योता दिता दा है । आये ते तिजो बोलो हे मित्र अगो हौई करी बै, ता तेरे कने रोटी खाने बालदा दिन तेरी बड़ाई होणी । ११. किजो कि जो कोई अपने आप जो बडा बनांगा उसजो छोटा कीता जाणा, ते जे कोई अपने आप जो छोटा बनांगा बडा कीता जाणा । १२. त उसने अपने न्योता देने वाले जो भी गलाया कि जे तू दिन दा या रात दा । जग (भोज) करे ता अपने मित्रा या भयईयां या रिश्तेदारां या अमीर दड़ेशिदा जो मत सदे कुते ऐसा न होये कि ओ तिजो न्योता दैण ते तेरा बदला होई जाये । १३. पर जा तू घाम करे ता कगांला, टुण्डयां लगडियां ते अन्नयां जो सद १४. त तू धन्य होणा किजो कि उन्हां का तिजो बदला देने वास्ते कुच्छ नी होणा । पर तिजो धर्मियां दे जी उठणे पर इसदा पल मिलणां ।

ब्याह दे भोज (खाणा) दी गल्ल

१५. उसदे कन्ने रोटी खादे, बिचे का इक ने ए गल्ला सुणीं करी उसजो गलाया धन्य है ओ जेहड़ा परमेश्वर दे राज बिच रोटी खांगा । १६. उसने उन्ह जो गलाया, कुसी आदमी ने बड़ी धाम दिती ते उसने मते सारे लोका जो बुलावा (बुलाये लोग) जो बोली भेजया कि आई जाओ रोटी तैयार होई गई । १८. पर सारे ही बहाने बनाने लगे । पहले ने बोलया मैं खेत मुल लेया ते जरूरी है कि उसजो मैं दिखी लेयां । मैं तेरे छन्दे करदा कि मिन्जो माफ करया १९. दूसरे ने बोलया मैं पंज जोड़े बैलां दे खरीदे ते उन्हां जो परखणे जान्दा मैं छन्दे करदा जे मिन्जो माफ कर । २०. इक होर ने गलाया कि मैं ब्याह कीता ते आई नी सकदा । उस नौकर ने आई करी से गल्ला अपने मालिक जो दसियां । २१. ते घर दे मालिक ने गुस्से च आई करी अपने नौकर जो

गलाया शहर दे बजारां, गलियां च भट जा ते कंगाला, टुण्डियां, लटयां ते अन्नयां जो इते लेई आओ। २२. नौकर ने फिरी बोलया हे मालिक जिहां तुसां बोलया थिया ही कीता पर फिरी जगह खाली है। २३. मालिक ने नौकर जो गलाया कि सड़कां पर ते बाडां पासे जाओ ते लोका जो जबरदस्ती लेई आओ ता जो मेरा घर भरी जाये। २४. किजो की मैं तुसां जो गलादा कि जिन्हां जो मैं सदया थिया उन्हां च कोई भी मेरी घाम नी चखगा।

चले बणने दा मूल

२५. ते जिस मौके मती भीड़ उसदे पीछे जाये थी करदी ते उसने पिछे मुड़ी करी गलाया। २६. जे कोई मेरे का आये ते अपने मा बंब लाडी ने वडजे ते भाई वैहणा ते अपनी जान जो भी कुप्यार न समझे ते ओ मेरा चेला नी होई सकदा। २७. ते जेहड़ा कोई अपनणी सलीब न चुके ते मेरे पिछे न आये ओ भी मेरा चेला नी होई सकदा २८. तुसां च कुण है जन्हां घर भरी बणाना चाहन्दा ते पहले खर्च नी जोड़दा। कि पूरा करने दी हिम्मत मेरे का है या नी? २९. कुते ऐसा नी होये कि नीह पाई करी त्यार न करी सके ता लोक उसदा मखौल उडाण। ते ए बोलण की ए आदमी बनाणे ता लगाया पर बणाई नी सकदा। ३१. या कुण ऐसा राजा है जेहड़ा दूसरे राजे कने लड़ाई करने जान्दा ते पहले ए नी सोचदा कि जेहड़ा २० हजार लेई करी मेरे पर चढ़ाई करे ते क्या मैं १० हजार लेई करी उसदा मुकाबला करी सकदा या नी? ३२. नी ता दूरे का ही ओ उस कन्ने सुलह करने वास्ते अपने दूत भेजी दिन्दा। ३३. इसी रीत कने तुसां च जेहड़ा कोई अपना सब कुछ छड़ी नी दिन्दा ते ओ मेरा चेला नी होई सकदा। ३४. लूण ता खरा है पर उसदा जे स्वाद बिगड़ी जाये ते कुस चीज कने उसजो खरा कीता जांगा। ३५. ओ न ते जमीने दे और न खाद दे कम आन्दा ते लोक उसजो सुटी दिन्दे। जिसदे सुनणे दे कनेन होण ओ सुणी लैण।

गुआची दी भेड़

१५ सारे चुंगी गुराणे वाले उसका आदे थिये ता जे उसेरी सुणन। २. फरीसी ते शास्त्री बुडबुड़ाई करी बोलने लगे कि ए ता पापियां कन्ने मिलदा ते

उन्हां कन्ने खान्दा भी । ३. तां उसने एह गल्ल सुणाई । ४. तुसां च ऐसा कुण है जिसदी सौ भेडा होण ते उन्हां च इक गुम होई जाये ते ओ नितानवे जे जंगल छडी करी उस गुम होई दी भेड़ जो नी तोपदा जां ताई ओ मिलदी नी ? ५. ते जिस मौके ओ मिली जान्दी ते बड़ी खुशी कन्ने उसजो मोडे पर लदी लिन्दा । ६. ते घरेआई करी मित्रा ते पड़ेशिया जो बोलदा के मेरे कन्ने खुशी मनाओ किजो कि मेरी गुआची दी भेड़ मिन्जो मिली गई । ७. मैं तुसां जो गलांदा जेइ स रीत कन्ने इक पापी जे अपणा मन फिराई ले ता स्वर्ग च इतना ही आन्नद हुन्दा जितना कि नियानवे धर्मी लोकां दे बारे च नी हुन्दा, जिन्हां जो मन फेर ने दी जरूरत नी ।

गुम होया दा सिक्का


या ऐसी कुण जनानी हुन्गी जिसका दस सिक्के होण ते उन्हां च इक गुम होई जाये ते ओ दिया वाली करी ते भाडू देई करी, जा ताई लिभदा नी जी लगाई करी तोपदी न रहे ? ८. ते जिस मौके मिली जाये ता अपनी सहेलियां ते पडोसणा जो इक्ठा करी के बोलदी के मेरे कने खुशी मनाओ किजो कि मेरा गुआचया दा सिक्का मिली गया । ९. मैं तुसां जो गलान्दा जे इस रीती कने इक मन फेरणे वाले पापी दे बारे प्रभु दे स्वर्गदूतां दे सामणे खुशी हुन्दी ।

उजाडू मुंडा

११. फिरी उसने गलाया कुसी आदमी दे दो पुत्र थिये । १२. उन्हां च छोटे ने अपने बाबे जो गलाया जे बाबा जेहड़ा मेरे हिस्से दा बनदा है ओ




मिन्जो दई दे। उसने उसजो माल त धान बंडी दिता। १३. थोड़े दिन बाद हो छोटा पुत्र सब कुच्छ बटोली करी दूर मुल्का जो चली गया ते उते बुरे कम्मां च अपणा धन उजाड़ी दिता। १४. जिस मौके ओ सब कुछ उजाड़ी चुकया ता उस मुल्क बिच काल पेई गया ता ओ कगांल होई गया। १५. ते होर उस मुल्क दे एक रहणे वाले का गया। उसने उसजो अपने खेता च सूर चरणे वास्ते भेजया। १६. ओ चाहन्दा थिया जे ओ अपना पेट उन्हां फलियां कन्ने भरे जिन्हां जो सूर खान्दे थिये। उसजो कुच्छ नी दिन्दा थिया। १७. जिस मौके उस जो होश आया ता ओ गलाणां लगया जे मेरे बाबे दे घरे इतणे नौकर हिन जिन्हां जो भर पेट रोटी मिलदी ते मैं इते भुखा मरे करदा है। १८. मैं उठी करी अपने बाबे का जान्दा ता उस जो बोलदा कि मैं स्वर्ग दे खलाफ ते तेरी



नजरा च पापी बनी गया १९. ते अबे इस जोगा भी नी के तेरा मुडां कहलावां, तू मिन्जो अपने इक मजदूर दी सरि रखी लै। २०. तां ओ उठी करी अपने बापू का चलया। हाली ओ दूर ही थिया जे उसेरे बापू जो उसजो दिखी करी तरस आया ते उसने दौड़ी करी उसजो गले लगाई लेया ते उसदे सुन्ने ले। २१. पुत्र ने उसजो बोलया, बापू मैं स्वर्ग दे खलाफ ते तेरी नजर च पाप कीता ते अबे इस लायक नी जे तेरा पुत्र कहलावा। २२. पर बापू ने अपने नौकरा जो बोलया के भटपट खरे का खरे कपड़े कड़ी करी इसजो पुआओ, इसदे हथ च

अंगूठी ते पैरां च जुटटे पुआओ । २३. ते पलया दा बछड़ा लेई करी बडो ते असी खाई करी खुशी मनाईये । २४. किजो कि मेरा पुत्र मरी गया दा थिया से फिरी जिन्दा होई गया । गुवाची गये दा थिया सें फिरी मिली गया ते ओ खुशी करने लगे । २५. पर उसदा बड़ा पुत्र खेतरां च थिया । जिस मौके ओ घरे दे नेड़े पुजया ते उसने गाणे बजाणे ते नचने दे बोल सुणे २६. ते इक नौकर वो सदी करी पुछया ए क्या होय करदा है ? २७. उसने उसजो गलाया तेरा भाई आया ते तेरे बापू ने इक तगड़ा बच्छा बडाया किजो कि उसजो खरा



भला पाया २८. ए सुणी करी ओ गुस्से होई गया ते अन्दर जाणा खरा नी समझया । पर उसदा बापू उसजो बाहर ओई करी मनाणे लगया । २९. उसने बापू जो जबाब दिता कि दिखे मैं इतणे साला का तेरी सेवा करे करदा है ते कदी तेरी अणमन्नी नी कीती ता भी तू कदी इक बकरी दा बच्चा नी दिता जे मैं अपने दोस्ता च खुशी मना । ३०. पर जिस मौके ए तेरा पुत्र आया जिसने सारी लैलत कजरियां जो खुआई दिती आया ते उस ताई पलया दा बछड़ा बडया । ३१. उसने उसजो गलाया पुत्र तू ता मेरे कन्ने ही है ते जे कुच्छ मेरा ओ तेरा है । पर अवे खुशी मनानी चहिन्दी किजो की तेरा भाई जेहड़ा मरी गया दा थिया फिरी जिन्दा होई गया, गुआची गया दा थिया फिरी मिली गया ।

अन्यायी भण्डारी

१६ फिरी तिनी चेलया जो भी गलाया, जे कुसी अमीर मनुआ दा इक भण्डारी थिया अता मनुआ ने तसेरे सामने तसेरे पराले ऐ लगा गलाई या जे ऐ तेरा सारा माल (धन) खत्मा करने लगया दा है। २. ते फिरी तिनी तिसा जो सदी करी गलाया, ऐ क्या है जे किछ मैं तेरे ताई सुणया करदा है। अता तू अपने भण्डारीपने दा हिसाब मिन्जो दे। किजो जे तू अगे ताई भंडारी नी रही सकदा। ३. ता भण्डारी सोचणे लगया जे अवे मैं क्या करां किजो जे मेरा मालिक भण्डारी दा कम मेरे का खोई लिंगा, मिटटी ता मैं खनी नी सकदा ते भीख मंगदे मिन्जो शर्म ईन्दी। ४. मैं समझी गया जे मिन्जो क्या करणा हुंगा, जिस वेले मिन्जो भण्डारी दे कमा का हटाया जांगा ता लोग मिन्जो अपने घरा मंभ जगह देई दिगें। ५. फिरी तिनी अपने मालिका दे देने वाले जो सदी करी इक-इक जो पुछया जो तुसा ने मेरे स्वामी दा कितना कितणा देणा है। ६. तिनी गलाया जे सौ मना तेल, ता तिनी गलाया जे अपनी खाता बही लेई करी दिखी दे। भट ५० मण लिखी दे। ७. फिरी दुये जो गलाया, तेरे पराले कितणा है? तिनी गलाया सौ मण गेहूं ता तिनी गलाया अपना बही खाते विच ८० मण लिखी दे। ८. स्वामी ने तिस अधर्मी भण्डारी जो सराया, जे तिस ने बड़ी चलाकी कन्ने कम किता है, किजो जे इस संसार दे मणु अपने टैमे दे मनुआ दे कन्ने रीति रिवाजो च ज्योतिस दे मनुआ का ज्यादा चलाक हिन।

पैसे वा ठोक इस्तमाल

९. कन्ने मैं तुसां जो गलादां है जे अधर्म दे पैसे कन्ने अपने जोगे मित्त बनाई लेयो, ता जे से जांदा रे, ते से तुसां जो अपने पूरे घरा मंभ लेई लैण १०. जे जरा भर जरा विच सच्चा है से मते च भी सच्चा हुंगा। अता जरा भर विच बेईमानी करंगा से मते च भी बेईमानी करंगा। ११. इस करी के जे तुसी भूठे धना मंभ सच्चे नीरिगें ते सच्चा धन कुण दिगां तुसा जो? १२. कन्ने जे तुसी बगाने धना च सच्चे नी रिगे ते जे तुम्हारा है तिसा जो तुसा जो कुण दिगा। १३. कोई नौकर दो मालिका दी सेवा नी करी सकदा किजो जे से इक कन्ने बैर ते दुये कन्ने प्रेम करदा रिगां, या फिरी इक कन्ने मिली रिगा ते दुये कन्ने बैर करंगा। तुसी परमेश्वरे ते धना दोना दी कठी सेवा नी करी सकदे।

फरीसियां जो बकणा

१४. फरीसी जे भूखे थिये, ऐ सारी गल्ला सुणी करी तिसा जो छेड़ने लगे । १५. तिनी तिना जो गलाया, तुसी ते मनुआ सामने अपने आप जो बड़े धर्मी बोलदे, अपने परमेश्वर तुम्हारे मना जो जानदा है, किजो जे जेड़ी चीज मनुआ दी नजरा च बड़ी है से परमेश्वरे दे नेड़े गन्दी हैं । १६. व्यवस्था करने वाले ते भविष्यवाणी वाले यहून्ना तक ही रे, तिस वेले का परमेश्वरे दे राज दी खुशखबरी सुनाई जान्दी है, अते हय कोई तिसा च खुशी कन्ने चले इन्दे हिन । १७. असमान कन्ने जमीने दा टली जाणा व्यवस्था विच इक बिन्दु दा फर्क आई जाने कन्ने खत्म होई सकदा है । १८. जुन कोई अपनी घरेवाली जो छड़ी करी होर कुसकी कन्ने व्याह करदा से बड़ा बुरा करदा है, अते जे कोई अदेई छड़ी दी जनानी कन्ने व्याह करदा से भी गलत कम करदा है ।

अमीर मनु अते गरीब लाजर

१९. इक बडा अमीर मनु थिया जे जामनू रगेरे कन्ने मलमले दे कपड़े पान्दा थिया अते रोज बड़ो सुखा कन्ने मजे कन्ने रिन्दा थिया । २०. अते लाजर ना दा इक भखारी तसेरे घरे दे दरवाजे अगे बेई रिहन्दा थिया । २१. कन्ने से चान्दा थिया जे अमीरे दे बची दी रोटी कन्ने अपना पेट भरी लैये अपने कुते आई करी तसेरे जखमा जो चटदे थिये । २२. अते फिरी इयां होया जे से कंगाल मरी गया, ते स्वर्गा दे दूता ने तिसा जो इब्राहिम दी खोखा मंभ बठायो अते से अमीर भी मरी गया ते तिसा जो नरका च बठायो । २३. ते तिस नरका च तिनी अखां चुकी करी ऊपरा जो दिखया जे इब्राहिम दी खोखा च से लाजर कंगाल बैठयो दा है । २४. ते तिनी हक देई करी गलाया जे हे पिता इब्राहिम मेरे पर दया कर ते लाजर जो भेज ताकि से अपनी उंगुली दा सिरा गिला करी के मेरी जीभ च रखी करी मिन्जो इस तेज अगे दे सेके का बचाई ले । २५. अपना इब्राहिम ने गलाया जे हे पुत्र याद कर जे तू अपने जीवन च सारी खरी चीजां जो लेई बैठयो दा है ते लाजर सारी बुरी, अपना से अवे इते शान्ति कन्ने रे करदा है ते तू तड़पदा है । २६. ते इन सारी गल्ला जो छड़ी करी हमारे कन्ने तुम्हारे च इक बड़ा गड़ा है जिस कन्ने न वरे का परे जाई सकदे



न परे का वरे आई सकदे । २७. तिनी गलाया जे हे पिता मैं तेरे अगे विनती करदा जे तू तिसा जो मेरे बाबे दे घरे भेजी दे । २८. किजो जे मेरे ५ भाई हिन से तिन्ना सामणे इस गल्ला दी गवाही दे इयां न होये जे से भी इस पीड़ावाली जगहा मंभ आन । २९. इब्रहिम ने तिस जो गलाया, जे तिना का ता भविष्यवाणी कन्ने मूसा री किताबा हिन, से तनेहरी सुनणा । ३०. तिनी गलाया जे नी हे पिता इब्राहिम, अपन जे कोई मरे होया च का तिना का जांगा ते से अपने दिला जो बदली लिंगे । ३१. तिनी तिस जो गलाया जे से जे मूसा ते भविष्यवक्ता दी नी सुणदे, ते जे मरे होया च का कोई जी उठे ता भी से नी मंनगे ।

यीशु दे बचन

१७ फिरी तिनी अपने चेलया जो गलाया जे ठोकर न लगे अपने हाय तिस मनुआ पर जिस करी के ऐ इन्दी । २. जे जनां हलकयां च का कुसी इक जो ठोकर दिन्दा तिसा वास्ते ऐ भलां हुन्दा, जे घराटे दा इक पट्ट तिसेरे गले मंभ लटकाया जाये ते से फिरी समुन्दरे च सुटी दिता जाये । ३. सावधान रियो जे तेरा भाई अपराध करे ते तिसा जो समझा ते जे पछताये ते तिसा जो माफ करी दे । ४. जे दहाडीये च से सत बारी तेरा अपराध करो ते सते बारी तेरा के आई करी गलाये कि जे मैं पछतान्दा है ते तिसा जो माफ करी दे ५. ते चेलया ने प्रभु जो आई करी गलाया कि हमारा विश्वास बधा । ६. प्रभु ने गलाया जे तुसां जो जे राई दे दाणे बराबर भी विश्वास हुन्दा ते तुसी इस कँह दे बूटे जो गलादे जे जड़ा कने उखड़ी करी समुन्दरा मंभ लगी जाये ता से तुम्हारी गलाई मनी लिन्दा । ७. अपने तुम्हारे च का इदया कुण है जिसेरा नौकर हल बान्धा अता भेड़ा जो चरांदा कने जिस वेले खेतरा का आये ता तिसा जो गलाये कि भट आई करी रोटी खाणा बेई जाये । ८. अपने ऐ न गलाया जे मेरी रोटी बनाई कर ते कने जिस वेले ताई मैं खाई पी नी लियां ता ताई कमर बनी करी सेवा कर । इघरे बाद तु भी खाई पी लियां ? ९. कदा से उस नौकर दा दुसाव मंनगा ते तिनी सेई कम कीता जे तिसा जो गलाया गया । १०. इसा रिवाज कने तुसी वी जिस वेले तिना सारे कम जो करी लीगे जिघेरे वास्ते तुसां जो गलाया गया है तां गलाओ जे असी निकम्मे नौकर हिन जे असां जो करना थिया सेई किता ।

येसू दस कोड़िया जो खरा करवा है

११. तां फिरी इयां होया जे से येरुशलम जो जान्दे चेले सामरिया ते गलील मंभ्र का हुन्दा गया । १२. ते कुसी ग्रं च बडदे ही तिसा जो दस कोड़ी मिले १३. ते तिना दूर खड़ी करी जोरे करी गलाया हे यीसु हे स्वामी हमारे उपराले दया कर । १४. तिनी तिसा जो दिखी करी गलाया - जाओ - ते अपने आप जो याजका कने दिखाओ ते इदा टोदा अते से जान्दे जान्दे खरे भले होई गये । १५. तां फिरी तिना च का इक ने ऐ दिखी करी जे मैं खरा होई गया जोरे करी



परमेश्वरे दी स्तुति करी करी हटी आदा । १६. ते यीसु दे पैरा च मूंह भार डिगी करी तिसेरा धन्यवाद करने लगया अता से सामरी थिया । १७. फिरी येसू ने गलाया जे क्या १० ही खरे भले (शुद्ध) नी होय थिये ? ते फिरी से नौ कुते हिन ? १८. क्या इस परदेसी जो छड़ी करी कोई होर नी निकलया जे हटी करी परमेश्वरे दी स्तुति करदे ? १९. तां फिरी तिनी तिसा जो गलाया जे उठी करी चली जा तेरे विश्वास ने तिजो खरा कीता ।

स्वर्गीय राज दा आगमन

२०. जिस बेले फरीसियां ने तिसा जो पुछ्या कि परमेश्वरे दा राज कुस बेले इणा ? ते तिनी तिना जो जबाब दिता कि जे परमेश्वरे दा राज इयां सामणे नी इन्दा । २१. अता मनु ऐ नी गलागे जे दिखो यते है, जां उते है, किजो दिखो परमेश्वरे दा राज तुम्हारे मंभ है । २२. ते फिरी तिनी चेलया जो गलाय से दिन इगे जिस विच का तुसी मनुवे दे पुत्र दे दिना का एक दिन दिखण चहेंगे । ते नी दिखी सकगे । २३. लोक तुसां जो गलांगे जे दिखो उते है, जो इते है ! अपन तुसी चली मत जान्दे कने तिथेरे पिछे मत होई लियो । २४. किजो जिवा बिजली आसमाने दे इक पासे चमकी करी दूसरे पासे चमकती है तियां ही मनुष्या दा पुत्र अपने दिन सामने आंगा २५. अपन पहले ऐ जरूरी है से पहले मता दुख चुके अता इस जमाने दे मणु तिसा जो विल्कुल न मनन । २६. जियां नू दे दिनां च होया तियां ही मनुष्या दे पुत्रा दे दिनां च हुंगा । २७. जिस दिन तक नू बेड़ी उपराले नी चढ़या तिसां दिन तक लोग खान्दे पीन्दे थिये कने तिना च व्याह शादियां हुन्दीया थियां । अता तां फिरी पाणी दे तुफाना ने आई करी तिना जो मुकाई रखया । २८. अता जिदेया लूत दे दिनां च होया थिया जे लोक खान्दे पीन्दे दिन्दे लीन्दे थिये, बुटे लगादे कने घर बनादें थिये । २९. अपन जिस दिन लूत सदोम का निकलया तिस दिन अग कने गन्धक असमाने का बरणे लगी ते सब नाश होई गया । ३०. मनुष्य दे पुत्रे ते सामणे आने वाले दिन जो इयां ही हुंगा । ३१. तिस दिन जे कोठे पर हुंगे ते तिना दा समान घरे च हुंगा से तिसा जो लैणे ताई भिकन उतरन ते तियां जे खेतरा च हुण से पीछे न हटन । ३२. लूत दी घरे वाली जो याद रखण । ३३. जे कोई अपनी जान बचाना चाहन्गा से तिसा जो गवांगा, ते जे कोई तिसा जो गवाणा चाहन्गा से तिसा जो बचाई लिंगा । ३४. मैं तुसां जो गलांदा है जे तिस रात दो मनु इक मभ्हे उपराले सुते हुगे तिना विच इक लैई लिता जांगा दुआ छडी दिता जांगा । ३५. दो जनानीया कठी चक्की पीन्धी हुंगियां ते तिना च का इक लेई लिती जांगी ता दुई छडी दिती जांगी । ३६. (दो मनु खेतरा च हुंगे इक लेई लिता जांगा ते दुआ छडी दिता जांगा) । ३७. ऐ सुणी करी तिना ने तिसा जो पुछ्या हे प्रभु ऐ कुते हुंगा ? तिनी तिना जो गलाया जे जिते लोथ हुंगी तिथे गिद दी इकटठे हुंगे ।

१८ फिरी तिनी इस गने कने रोज प्रार्थना करना हिमम्त नी छड़ने दे बारे च तिना कन्ने गलाया । २. जे कुसी नगरे च इक न्यायी रिन्दा थिया जेड़ा व त परमेशवर का पुरदा थिया व लोका दी परवाह करदा थिया । ३. अते तिसी नगेर च इक विधवा भी रिन्दी थी, जे तिसा का आई करी गलान्दी रहन्दी थी जेमेरा न्याय करी के मिन्जो भागइ का बचाई लै । ४. तिनी कितने दिना तिकर से नी मणया अपन बाद च दिल च कुछ सोची करी गलाया, मैं ना ता परमेश्वरे का डरदा नी है मैं मनुआ दी परवाह करदा । ५. ता भी ऐ विधवा मिन्जो सतादी रिन्दी है, इस करी के मैं तसेरा न्याय करंगा कुते इयां न हो जे से घड़ी घड़ी आई करी मेरे नके च दम करी दे । ६. प्रभु ने गलाया सुनो जे ऐ अधर्मी न्यायी क्या गलान्दा ? ७. इस करी के क्या परमेश्वर अपने चुनीते मनुआ का न्याय नी चुकांगा जे रात दिन तिसा दी दुहाई दिन्दे रिन्दे कन्ने क्या से तिनेरे बारे च देर करंगा ? ८. मैं तुसां जो गलान्दा, से तौले तिनेरा न्याय चुकागां ता भी मनुआ दा पुत्र जिस बेले आंगा, ते क्या से पृथवी पराले विश्वास करंगा ।

फरीसी कन्ने चुर्गीवाला

९. फिरी तिनी कितनया जो जे अपने ऊपर भरोसा रखदे थिये, जे असी धर्मी हिन, ते होरा जो तुच्छ समझदे थिये, ऐ दृष्टान्त गलाया । १०. दो मनु मन्दिरा च प्रार्थना करने जो गये, इक फरीसी थिया ते दुसरा चुर्गी वाला थिया । ११. फरीसी खड़ी करी अपने दिला च इयां प्रार्थना करणा लगया हे परमेश्वर मैं तेरा बड़ा धन्यवाद करदा के मैं होर मनुआ साईं अघेर करणे वाला अन्यायी कने पापी कने नाई इस चूगी लैणे वाले साईं है । १२. मैं हफते विच दो बारी ब्रत रखदा है अपनी सारी कमाई दा दसवां हिसा भी दिन्दा । १३. पर चूगी लैणे वाले ने दूर खड़ी करी स्वर्ग पासो हाखी भी बुकणा नी चाईया । पर अपनी हीका जो कुटी कुटी करी गलाया, है परमेश्वर मेरे पापी पर दया करा १४. मैं तुसां जो गलादां है कि ओ दुआ नी है पर एई मनु धर्मी ठहराया गया और अपने घरे गया, किजो जे जेड़ा कोई अपने आप जो बड़ा मनगा उसीयो हल्का किता जांगा और जन्हा कोई अपने आप जो हल्का समझगा उसीयो बड़ा बनाया जांगा ।

यीशु बच्चयां जो आशीर्वाद दिन्दा

१५. फिरी मणु अपने निवेदा जो भी उस वाल अणना लगे कि ओ उना पर हथ रखे । पर चलेया ने उनां जो दिखी करी डाटयां । १६. यीशु ने बच्चयां जो अपने वाल सदी करी गलाया बच्चयां जो मेरे का आणे देओ कने उना जो मत ठाको, किजो जे परमेश्वर दा राज इन्हा दा ही है । १७. मैं तुसां जो सच गलादां कि जो कोई परमेश्वर दे राज जो बच्चयां साई नी मनगां ओ उस अन्दर कदी भी नी आई सकदा ।

अनन्त जीवन और धन से रुकावट : अनन्त जीन्द कने माया का मुश्कल

१८. फिरी कुसी सरदार ने पुछया जे हे उत्तम गुरु अनन्त जीन्द दा मालक होणे ताई मैं क्या करां । १९. यीशु ने उसीयो गलाया तू मिन्जो खरा किजो है बोलदा कोई उत्तम नी है । बस इक मेरा मतलब है कि परमेश्वर है । २०. तू अदेया जो ता जाणदा ही है कि बुरे करम नी करणे जान नी लैणी चोरी नी करणी, भूठी गवाहों नी दैणी अपने अमां कने बाबे कने दा आदर करणा । २१. उनी गलाया कि मैं तां इनहां जो ता बचपन का ही मनदा आया । २२. ऐ सुणी करी यीशु ने उसीयो गलाया, तेरे अन्दर अवे इक गल्ला दा घाटा है अपना सब कुछ बेची करी कंगाला जो बंडी दे और तिजो स्वर्ग अन्दर माया मिलगी और आई करी मेरे पिछे होई लै । २३. ऐ सुनी करी ओ बड़ा दुखी होई गया किजो जे ओ बड़ा अमीर थिया । २४. यीशु ने तिस जो दिखी करी गलाया जे अमीरा दा परमेश्वरे दे राज मंझ इना कितना मुश्कल है । २५. परमेश्वरे दे राज च अमीर मनुआ दे इणे का ता ऊटं दा सुई दे भौका च का निकली जाना असान है । २६. ते फिरी सुनने वालेयां ने गलाया जे फिरी कुसेरा भला हुंगा । तिनी गलाया जे मनुआ बला नी होई सकदा से परमेश्वरे का हीई सकदा है । पतरस ने गलाया, असी ता घर बार छडी करी तेरे पिछे चली पे दे हिन । तिनी तिना जो गलाया मैं तुसां जो सच गलान्दा है जे अदेया कोई नी जीनी ईश्वरे दे राज वास्ते घर घरेवाली भाईया मां बाबे या हल्के बच्चेयां जो छडी दिता । ते इस वेले मता नी लेई करी ते दूसरे लोका च खुशी दा जीवन मिलगां ।

यीशु अपणे मरी जाणे दी तिसरी भविष्यवाणी करदा है

३१. फिरी तिनी १२ जनेया जो कन्ने लेई करी तिस जो गलाया, दिखो येरुशलम जाये करदे हिन जे तिनी गला मनुआ दे पुत्रा वास्ते लिखी दी हिन से सब पूरी हूंगी। ३२. किजो जे मैं दूसरी जातियां दे हथा मंभू दिता जांगा ते से तिसा दा मजांक उड़ांगे कन्ने तिसा जो बेइज्जत करगे। अता कने तिसा पराले थुकुगें। ३३. कन्ने तिसा जो कोड़े मारंगे कन्ने जखमी करगे अता से फिरी तरीये दिन जिन्दा होई जांगा। ३४. ते तिना ने इना गला च का कोई गल्ल नी समभी, कने ऐ गल्ल तिना का लुकी रेई, ते जे गलाया गया से तिना जो समभू नी आया।

यीशु दा अन्ने अनुआ जो खरा करणा

३५. जिस वेले से यरीहो दे नेड़े पुजया ते इक अन्ना सड़क दे बखी बैठी करी भीख थिया मंगदा। ३६. ते सैं भीड़ा दे चलने दी अवाज सुणी करी पुछणे लगया ओ क्या करदा है। ३७. तिना ने तिस जो गलाया जे यीशु नासरी जाये करदा है। ३८. ता तिनी जोरी करी गलाया है यीशु दाऊद दी सन्तान मेरे पराले दया कर ३९. जे अगे जाये करदे थिये से तिस यो गुस्से होई करी गलान्दे चुप कर अपन से होर लेरा लगया देणा जे हे दाऊद दी सन्तान मेरे उपराले दया कर। ४०. ता यीशु ने खड़े होई करी गलाया जे उस जो मेरे का लेई आओ ते जिस वेले से नेड़े आया ते तिनी तिस जो पुछया ४१. तू क्या चाहन्दा है जे मैं तेरे वास्ते करां? तिनी गलाया हे प्रभु ऐ जे मैं दिखणे लगां। ४२. यीशु ने तिस जो गलाया जा दिखने लग तेरे विश्वास ने तिजो खरा किता। ४३. ते से भूट दिखणे लगया, ते परमेश्वरे दी बड़ाई करदा तसेर पिछे चली पैया, ते सारे मनुआ ने दिखी करी ईश्वरे दी स्तुति कीती।

जक्कई

१९

से यरीहो विच आई करी जाये करदा थिया। ते जक्कई ना दा इक मणु थिया जे चुंगी लैणे वालेया दा सरदार ते अमीर थिया। सैं यीशु जो

दिखणा चाहन्दा थिया जे से कुण है । अपनण भीड़ दी बजहा कन्ने दिखी नी सकदा थिया किजो जे से गिण्डा थिया । ४. ता तिस जो दिखने ताई से अगे दौड़ी करी गूलर दे बूटे पराले चढ़ी गया किजो जे से उसी रस्ते का जाने वाला थिया । ५. जिस बेले यीशु तिस जगहा पुजया ते ऊपरा पासे दिखी करी गलाया, हे जक्कई भट उतरी आ, किजो जे अज मैं तेरे घरे जरूर रहणा है । ६. से भट उतरया ते खुशी कन्ने तिसा जो अपने घरे लेई गया । ७. ऐ दिखी




करी बाकी मणु रढ़ी करी गलाणे लगे जे सैं इक दुष्ट मन दे घरे चली गया । ८. जक्कई ने खड़ी करी प्रभु जो गलाया । हे प्रभु दिख मैं अपना अधा धन कगाले जो दिन्दा है, ते जे कुसी दा अन्याय करी के लेई लेया है ते तिस जो मैं चौगुणा दिन्दा है । ९. ता यीशु ने तिस जो गलाया अज इस घरा च उद्धार आई गया इस करी के जे ऐ वी इब्राहिम दा इक पुत्र है । १०. किजो जे मनुआ दा पुत्र गवाची गया जो तापेणे कन्ने भला करने जो आया है ।

तोड़यां दा दृष्टान्त

११. जिस वेले सैं गल्ला सुनदे थिये, ते तिनी इक दृष्टान्त गलाया जे से यरुशलेम दे नेड़े थिया, ते सैं समझदे थिये जे परमेश्वरे दा राज हले सामने नी आया १२. तिनी गलाया इक अमीर मनु दूर देसा जो चलया जे राजपद लेई आये । १३. ते तिनी अपनणे नौकरा च का दस जनेया जो सदी करी दस मुहरा दितियां ते तिना जो गलाया जे मेरे हटी के आणे तिक तुसी यनां कन्ने लेने देण करदे रैंयो । १४. अपन तसेरे नगरा वाले तिस कन्ने वैर रखदे थिये, ते तसेर पिछे दूता जो गलाई भेजया जे असी नी चाहन्दे जे ऐ असा पर राज करे । १५. जिस वेले से राजपद लेई करी हटया ते इयां होया तिनी अपने नौकरां जिना जो उसने मुहरा दिती थिया सदी करी ऐ पुछया जे तिना ने क्या कमाया ? १६. ता पहले ने आई करी गलाया हे स्वामी तेरी मोहर दा दस होर कमाई हिन । १७. तिनी तिस जो गलाया धन्य हो हे खरे नौकर तू बड़े थोड़े च विश्वासी निकलया तू दस नगरा पर राज कर । १८. ता दुये ने गलाया मैं पंज होर कमाई हिन । १९. तिनी तिस जो भी गलाया जे तू पंज नगरा दा प्रधान बनी जा । २०. त्रिये ने आई करी गलाया जे हे स्वामी तेरी मोहर मैं ऐ बनी रखी दी हिन २१. किजो जे मैं तेरे का डरदा थिया, इस करी के जे तू बड़ा मणु सख्त है, जे तू नी रखया दा से चुकी लिन्दा जे तू नी बोया दा है से तू कटी लिन्दा है । २२. तिनी तिस जो गलाया, हे दुष्ट नौकर मैं तेरे ही मुंह कन्ने तिजो दोषी गलान्दा है, तू मिन्जो जान्दा थिया जे मैं सख्त मणु है, जे मैं नी रखया से चुकी लिन्दा है, ते जे मैं नी बोया से कटी लिन्दा है । २३. ते तू फिरी मेरे रुपइये कोटी विच की नी रखी दिते जे मैं आई करी व्याज समेत लेई लिन्दा । २४. ते जे मणु नेड़े खड़ीते दे थिये तिनी तिना कन्ने गलाया, से मोहर तिस का लेई लेयो, कन्ने जिस बाल दस मोहरा हिन तिस जो देई देखो । २५. तिना ने तिसा जो गलाया, हे स्वामी तिस का दस मोहरा ता हिन । २६. मैं तुसां जो गलान्दा है, कि, जिस का है तिस जो दिता जांगा ते जिस का नी है तिस का से भी लेई लिता जागां जे तिसा बाल है । २७. अपने मेरे से दुश्मण जे नी चाहन्दे जे मैं तिना पर राज करा तिना जो मेरे सामने लेयी करी मरी सुटो ।

यरुशलम विच यीशु दा विजय प्रवेश

२८. ऐ गल्लां गलाई करी से यरुशलम पासे तनेरे अगे अगे चली पेये
२९. ते जिस वेले से जैतून दे पहाड़ पर बैतफगे कन्ने बैतनियाह का पुत्रे ते तिना
अपनणे चेलयां च का दो जो ऐ गलाई करी भेजया । ३०. सामने वाले ग्रां



च जाओ ते तिथे पुजदे इक गदही दा बच्चा जिस पर कदी कोई सवार नी होया
तिस जो खोली करी लेई आओ । ३१. ते ओ जे कोई पुछे जे किजो खोलदे
हिन ते गलायो जे प्रभु जो इसेरी जरूरत है । ३२. तिनी जेड़े भेजे थिये तिना
ने जाई करी तदेया ही दिखया कन्ने पाया । ३३. जिस वेले से गदही दे बच्चे
जो खोले करदे थिये, ते तसेरे मालिक ने तिना जो पुछयां इस बच्चे जो किजो
खोलदे हिन ? ३४. तिना गलाया प्रभु जो इसेरी जरूरत है । ३५. से तिस
जो यीशु का लेई गये ते अपणे कपड़े तिस पर पाई करी यीशु जो तिस पर चढ़ाई
दिता । ३६. जो से जाये करदा थिया, ते से अपनणे कपड़े रस्ते च बदान्दे
जान्दे थिये । ३७. ते नेड़े आन्दे वलेले जा से जैतून पहाड़े दे उतराई पर पुजे
ते चेलया दी सारी मण्डली जे तसेरे बड़े कमा ही वजटा करी के बड़े खुश थिये ।
३८. धन्य हे से राज जे प्रभु दे ना का आन्दा है । स्वर्गा मंभ शान्ति हो ते

असमाना उपर तसेरी खुशी हो । ३६. ता भीड़ विच का कितने फरीसी तिस
जो गलाने लगे हे गुरु अपने चेलया जो गुस्से हो । ४०. तिनी जबाब दिता,
मैं तुसां जो गलान्दा जे ऐ चुप गये ते पत्थर लेरा दिगें ।



यरुशलम पराले यीशु दा विलाप

४१. जा से नेड़े आया ते नगरा जो दिखी करी तिसा पराले रोने लगया ।
 ४२. ते गलाया जे क्या भला हुन्दा जे तू हां तू इसी दिन ठाकठीक दी गल्ला सुनदा
 अपन अवे से तेरी अखां का लुकी गई । ४३. किजो जे से दिन तेरे पर आई
 जागें जे तेरे बैरी तिजो चारों पासे का घेरा पाई करी तिजो दबाएगें । ४४. ते
 तिजो ते तेरे चेलया जो जे तेरे कन्ने हिन मिटी विच मलांगे, ते तेरे पराले पत्थर
 कन्ने पत्थर भी नी छड़ेगें किजो जे तू तिस अवसरा जो नी दिखाया जा तेरे पराले
 दया किती थी ।

यीशु मन्दिरा जो शुद्ध करदा है

४५. ता से मन्दिरा विच जाई करी बेचने वालेया जो बाहर कढ़दा है ।
 ४६. ते तिना जो गलाया जे लिखया दा है जे मेरा घर प्रार्थना दा घर हुंगा अपन
 तुसाँ इस जो चोरा दा अडा बनाई रखया है । ४७. ते से हर रोज मन्दिर
 विच उपदेश दिन्दा थिया, ते महायाजक कन्ने शास्त्री ते मनुआ दे अमीर तिस जो
 खतम करने दा मौका लबदे थिये । ४८. अपन कोई उपा नी कढ़ी सके । कि
 ऐ क्या करण किजो जे सब मणु बेड़ वा कन्ने तसेरा गल्ला सुणदे थिये ।

माशु दा अधिकार पराले प्रश्न

२० इक दिन इयां होया जिस बेले से मन्दिर विच लोका जो उपदेश कन्ने सु-
 समाचार सुनांदा थिया ते महायाजक शास्त्री पुरानियां दे कन्ने नेड़े आई करी
 खड़ी गये । २. ते गलाने लगे जे तू असाँ जो दस तू इना कमा जो किस अधिकारा
 कन्ने करदा है, कन्ने से कुण है जिसजने ऐ अधिकार तिजो दिता है । ३. तिनी
 तिना जो जबाब दिता जे मैं भी तुसां का इक गल पुछदा है तसेरा जबाब दियो ।
 ४. यहून्ना दा बपतिस्मा स्वर्गा पासे का थिया या मनुआ पासे का ? ५. तां से
 अप मिते गलाने लगे जे असी गलाईये जे स्वर्गा पासे का ता से गलांगा जे ता
 फिरी तुसा तसेरी इज्जत की नी कीती । ६. जे असी गलाई की मनुआ पासे
 का ते सब मणु असां पर पत्थर सुटगें किजो जे सच्ची जान्दे थिये कि यहून्ना
 भविष्यवक्तता थिया । ८. यीशु ने तिना जो गलाया ते फिरी मैं भी तुसां जो
 नी दसदा जे मैं ऐ कम्म कुस अधिकारा कन्ने करदा ।

अंगूर दी बाड़ी दा दृष्टान्त

६. ता से मनुआ जो ऐ कहानी सुनाने लगया कि कुसी मनुआ ने इक दाख दी बाड़ी लगाई, ते किसाना जो तसेरा ठेका देई दिता ते मते दिना वास्ते परदेश चली गया। १०. पकदे तिनी इक नौकर जो किसाना का भेजया जे से दाख दी बाड़ी दा कुछ फल तिस जो देई दैण अपण किसाना ने तिस खूब फण्डया ते खाली हथ हटाई दिता। ११. फिरी तिनी इक नौकर होर भेजया ते तिना तिस जो भी फण्डया ते खाली हथ भेजी दिता। १२. फिरी तिनी तिसरा भेजया तिस जो भी तिना जखमी करी के भेजया। १३. ता दाख दी बाड़ी दे स्वामी ने गलाया मैं क्या करां? मैं अपन प्यारे पुत्रां जो भेजगा, क्या पता से तसेरा भी आदर करगें। १४. जो किसाना ने तिस जो दिखया ते से अप मिते गलाने लगे जेर ऐ ते मालिक है चलो असी इसजो मारी छड़दे, ताकि ऐ सब हमारा होई जाये। १५. ते तिना तिस जो बाड़ी का बाहर कडी करी मारी सुटया। इस करी के दाख दी बाड़ी दा स्वामी तिना कन्ने क्या करगां। १६. ऐ आई करी तिना किसाना दा नास करंगा, ते दाख दी बाड़ी होरा जो दिगां ऐ सुणी करी तिना गलाया हे परमेश्वर इया मत कर। १७. तिनी तिना जो दिखया ते गलाया, फिरी ऐ क्या लिखया है जे जिस पत्थर जो राजमिस्त्री खराब दसया है सेई कोने दा सिरा होई गया। १८. जे कोई तिस पत्थर पर रिड़कगा से चथूयई जांगा, ते जिस पराले से छुड़कगा से पिओई जांगा।

कर देने दा प्रश्न

१९. तिस बेले शास्त्रियों और महायाजको ने तिस जो पकड़ना चाया, किजो जे से समझ गये कि तिनी तिना पराले ऐ कहानी गलाई, अपन से लोकां का डरे। २०. ते फिरी से तसेरी ताक विच लगी गे ते तिना केई भेदिये भेज जे धर्म दा भेष पाई करी कोई न कोई गल्ल पकड़ने ता से तिस हाकिम दे हथा देई दैण। २१. तिना ने तिस जो पुछया, जे हे गुरु असी जान्दे ज तू ठीक गलान्दा है कन्ने सिखान्दा ते कुसी दे पासे नी है पर परमेश्वरे दा रस्ता सच्चाई जो दसदा है। २२. क्या हमारा कैसर जो कर देना ठीक है यानी? २३. तिनी तनेरी चलाकी जो दिखी करी तिना जो गलाया, इक दिनार मिन्जो

दिखाओ। २४. इस पर कुसेरी मूर्ती कन्ने ना है? तिना गलाया कैसर दा। २५. तिनी तिनाँ जो गलाया जे कैसर दा है से कैसर जो देई देआयो, ते जे परमेश्वर दा है से परमेश्वर जो देई देयो। २६. से लोकों सामने तिस गल्ल जो पकड़ी नी सके, अपन तसेरा जबाब जो सुणी करी चुप होई गये।

फिरी का पैदा होने दा प्रश्न

२७. फिरी से सद्की जे गलान्दे जे मरे होया दा जिन्दा होई जाना है ही नहीं तिना विच का कितने ने आई करी पुछया। २८. जे हे गुरु मुसा ने हमारे वास्ते ऐ लिखा दा है। जे कुसी दा भाई अपनी पत्नी कन्ने रिन्दे होये बिना सन्तान दे मरी जाये, ते तांसेरा भाई तसेरी पत्नी जो व्याही करी सन्तान पैदा कर अपने बशां जो अगे बधाने दे वास्ते २९. ते से सात भाई थे, पहला भाई बिना सन्तान उत्पन्न किते मरी जाये। ३०. फिरी दुये ते तरीये ने भी तसेरी पत्नी जो व्याही लेया। ३१. इयां से सात ही मरी गये। ३२. ते सारे दे बाद से जनानी भी मरी गई। ३३. ते जिन्दे होई जाने पर से कुसेरी पत्नी हुंगी? किजो जे सैं सात दी पत्नी होई गई थी। ३४. यीशु ने तिना जो गलाया जे इस जुग दी सन्तान विच ता व्याह शादी हुन्दी है। ३५. अपन जे मनु इस जोगे हुंगे, जे इस जुग जो ते मरे होया विच का जी उंठगे तिना विच व्याह शादी नी हुंगी। ३६. से फिरी मरगे भी नी, किजो जे से स्वर्गदूता सेई हुंगे, ते जिन्दे होई करी से परमेश्वर दी सन्तान हुंगे। ३७. अपन इस गल जो जे मरे दे जिन्दे होई जान्दे है, मूसा ने भाड़ी दी कथा विच दसया दा है जे से प्रभु जो इब्रहिम दा परमेश्वर कन्ने इसहाक दा परमेश्वर कन्ने याकूब दा परमेश्वर गलान्दा है। ३८. परमेश्वर दा मुरदेया दा नी पर जीन्दया दा है, किजो जे तसेरे नेड़े सब जीन्दे हिन। ३९. ता ऐ सुणी करी शास्त्रियां विच का कितनया ने गलाया जे हे गुरु तू ठीक गलाया है। ४०. ते फिरी तिना जो तिस का कुछ होर पुछने दी हिम्मत नी रेही।

क्या मसीह दाऊद दी सन्तान है?

४१. फिरी तिनी तिस जो पुछया मसीह जो दाऊद दी औलाद किजो गलान्दे? ४२. दाऊद भजनसंहिता दी कताबा विच गलांदा जे प्रभु ने मेरे

प्रभु जो गलाया । ४३. मेरे सीधे हथा बेई जा, जां तक मैं तेरे दुश्मनां जो तेरे पैरा थले नी करी दिन्ता ४४. दाऊद ता उस जो प्रभु गलान्दा है ते फिरी से तसेरी सन्तान किया होयां ?

शास्त्रियां दे विरुद्ध चितावनी

४५. जा सब सुने करदे थिये, ते तिनी अपनणे चलेया जो गलाया ४६. शास्त्रियां का चौकस रेया, जुना जो लम्बे लम्बे कपड़े पाई करी फिरना खरा लगदा जिना जो बजारा विच नमस्कार ते सभा विच उच्ची जगहा कभे जेवनारा विच खास जगहा खरी लगदी है । ४७. से विधवा दे घर खाई जान्दे, ते दिखाने वास्ते बड़ी हान तक प्रार्थना करदे रिन्दे, ऐ बड़ी भारी सजा पांगे ।

विधवा दी दमड़ी

२१ फिरी तिनी अख चुकी करी अमीरा जो अपना अपना दान भण्डार विच पान्दे दिखया २. ते तिनी इक कगाल जनानी जो भी दो दमड़ियां पान्दे दिखया । ३. तिनी गलाया, मैं तुसां जे सच गलान्दा है, जे इस कगाल विधवा ने सब का ज्यादा पाया है । ४. किजो जे उना सबने अपने अपने ज्यादा धन विच का दान पाया थीया अपन इनी अपनी गरीब विच का अपनी सारी कमाई पाई दिती ।



यीशु यरुशलम दे नष्ट होने दी कन्ने जुगअन्त दी भविष्यवाणी करदा है

५. जा कितने लोग मन्दिर दे बारे गलाये करदे थिये जे से कदेये छैल पत्थरा कन्ने भेट दी चीजा कन्ने सजाया गया है ते तिनी गलाया । ६. से दिन आंगे, जिस विच ए सब तुसी दिखंदे हिन, तिसविच का इतथे कुसी पत्थर पर पत्थर भी नी छुड़गा जे ढाया नी जांगा । ७. तिना ने तिस जो पुछया हे गुरु ऐ सब कदाड़ी हुंगा ? ते ऐ गलां जो पूरी होने जो हुंगी ता उस बेले दा क्या निशान हुंगा ? ८. तिनी गलाया, चौकन्ने रेयो ताकि भ्रम विच न फसी जाओ किजो जे मते मेरे ना दे तुम्हारे का आंगे ते गलांगे मैं सेई है, कन्ने ऐ भी जे वक्त आई गया पर तुसी तनेरे पिछे मत चली जायो । ९. ते जिस बेले तुसी लड़ाईया कन्ने बलवां दे बारे सुणो ते घबरआई मते जान्दे, किजो जे इनेरा पहले होना जरूरी है, अपन तिस बेले भट अन्त नी हुंगा १०. फिरी तिनी तिना जो गलाया जाति पर जाति कन्ने राज्य पर राज्य चढ़ाई करंगे । ११. ते बड़े बड़े भुईडोल हुंगे ते जगहा जगहा अकाल ते मरिया पैगीयां ते असमान का भयंकर गला कन्ने ते बड़े निशान दिखगे । १२. अपन इनां सारीगल्ला का पहले, से मेरे ना दी बजहा कन्ने तुसां जो पकड़गे ते तंग करेगे ते पचायतां जो दैई दिगें ते जेलखाने विच पाई दिगें ते राजे कन्ने हाकमा दे सामणे लेई जागें । १३. अपन ऐ तुम्हारे वास्ते गवाही देने दा बेला होई जांगा । १४. इस करी के अपने अपने दिल विच पक्का करी रखो जे असी पहले का जबाब देने दी चिन्ता नी करंगे । १५. किजो जे मैं तुसां जो अदेय बोल कन्ने बुद्धि दिगां जे तुम्हारे सारे विरोधी कुछ नी करी सकंगे । १६. ते तुम्हारे अमा बाबा भाई कन्ने कुटुम्म कन्ने तुम्हार दोस्त तुसा जो पकडांगे, इते तक की तुम्हारे विच का कितनया जो मरवाई भी छड़गे । १७. ते मेरे ना दी वजहा कन्ने तुम्हारे कन्ने कितने बैर करंगे । १८. अपन तुम्होर सरा दा कोई बाल भी बाकां नी करंगा । १९. अपने सब कन्ने तुसी अपणे प्राणां जो बचाई रखयो । २०. ता तुसी यरुशलेम जो सेनाआं कन्ने धिरे दे पांगे ते समभी जायो जे तसेरा उजड़ी जाणा नेड़े है । २१. ता जे यहूदीया विच हिन से पहाड़ा जो न सी जांगे ते जे यरुशलेम विच हिन से बाहर निकली जांगे ते जे ग्रां विच हिन से उना विच ना जान । २२. किजो जे ऐ पलटा लेने वाले दिन हिन, जिस विच लिखी दी सारी गल्लां पूरी होई जांगी । २३. उना

दिना जे गर्भवती कन्ने दूध पिलाने वाली हुंगी उना वास्ते हाय हाय किजो जे देश विच कड़ा कलहा कन्ने इना पर बड़ी मुश्किल हुंगी । २४. से तलवार कन्ने मरी जांगे ते सारे देस विच बन्धी बनाई करी पुजगें ते जा तिकर होर जातियां दा बेला पूरा नी हुंगा ता तिकर यरुशलेम होर जातिया का रौंदया जांगा । २५. ते सूरज चान्द कन्ने तारे विच निशान पाये जांगे ते जमीना पर दे मनुआ पराले संकट आंगा । किजो जे से समुन्दरे दे गरजने कन्ने लहरा दे शोर कन्ने डरी जांगे । २६. ते डरे दे मारे कन्ने संसारे पर आने वाली मुश्किला जो भालदे मनुआ दे जी विच जी नी रिंगा, किजो जे असमाने दी शक्ति हिलाई जांगी । २७. ता से मनुआ दे पुत्र जो बड़ी महिमा कन्ने असमाना विच बदला पराले आन्दे दिखगे । २८. जा ऐ गल्ला होने लगगियां तक सीधे होई करी अपने सरा ऊपर चुकेयो किजो जे तुम्हार छुटकारा नेड़े है ।

जागदे रहने दी चितावनी

२९. तिनी तिना कन्ने इक कहानी भी गलाई जे अजीर दे बूटे ते सारे बुटेया जो दिखो । ३०. जियां तसेरी कोपलां निकलदी हिन, ते तुसी दिखी कर समझी जान्दे जे गर्मियां अबे नेड़े हिन । ३१. इसी रीती जा तुसी ऐ गल्ला हुन्दे दिखो तां समझी जाओ जे परमेश्वरे दा राज नेड़े है । ३२. मैं तुसां जो सच गलान्दा है, जे जियां तिक ऐ गल्ला नी होई जाण तिधा तीकर इसी पीढी दा कदी अन्त नी हुंगा । ३३. असमान कन्ने पृथ्वी खत्मा होई जागे पर मेरी गल्ला कदी खत्म नी हुंगी । ३४. इस करी के सावधान रेयो इयां नी होय जे तुम्हारे मन खुमार कन्ने मतवालेपन कन्ने इस जिन्दा दी चिन्तां कन्ने सुस्त होई जांगे । ते से दिन तुम्हारे पर फन्दे सेई आई पैगे । ३५. किजो जे से सारी पृथ्वी दे सब रहने वालेया पर इयां ही आई पैगे । ३६. इस करी के जागदे रेयो, कन्ने हर वेले प्रार्थना करदे रेयो जे तुसी इनो सारी आणे वाले गल्लां का बचने कन्ने मनुआ दे पुत्र दे सामने खड़ीने जोगे बनी जाओ । ३७. ते से दिन वेले मन्दिरविच उच्चा बोल बोलदा ते राती बाहर जाई करी जैतून न दे पहाड़ा पराले रिन्दा थिया । ३८. ते बेयात्ता सब मणु तसेरी सुनने तीकर तिसा का मन्दिर विच आया करदे थिये ।

यहूदा दी बेईमानी

२२ खमीरी रोटी दी रीत जिस जो फसहा बोलदे से नेड़े थिया । २. ते महायाजक कन्ने शास्त्री इस गल्ला जो खोज बिच थिये जे तिस जो कियां करी मारी सुटीये अपन से मणु डरदे थिये । ३. ते फिरी शैतान यहूदा विच बसी गया जिसा जो इसकरीयोती गलान्दे थिये ते से बारहा चेले विच गनीदा थिया । ४. तिनी जाई करी महायाजकां कन्ने पहरुआ दे सरदारा कन्ने गल्ल कीती मैं तिसा जो किया से तनेरे हथा विच पकड़ाई दे । ५. से बड़े खुश होय, ते तिसा जो रुपेईये देने दा बचन दिता । ६. तिनी ऐ मनी लेया ते से वेला तौपने लगया जे बगैर कुसी गल्ला दे तिस जो तनेरे हथा पकड़ाई दे ।

आखरी भोज दी तयारी

७. ता फिरी खमीरी रोटी वाला दिन आया, जिस विच फसहा दा मेमना बली चढ़ाना जरूरी थिया । ८. ते यीशु पतरस यहूना जे ऐ गलाई करी भेजया जे जाई करी हमारे खाने दी फसहा तैयार करो । ९. तिना ने तिस जो पुछया तु कुते चाहन्दा जे असी तैयार कराये १०. तिनी तिना जो गलाया जे दिखो नगरा विच बड़दे ही तुसा जो इक मनु पाणी दा घड़ा चुकी करी मिलगा ते जिस घर विच से जाये तुसी भी तिस घर विच बड़ी जायो । ११. ते तिस घर दे मालिक जो गलायो जे गुरु तिजो गलान्दा है जे से पाहुनशाला कुते हैं जिते मैं अपण चेलया कन्ने फसहा खां । १२. से तुसां जो इक सजी दी अटारी दिखांगां तिथे तुसी तैयारी करयो । १३. तिन्हा ने जाई करी तदेया ही दिखया जदेया तिनी गलाया थिया ते तैयारी कीती ।

आखरी खाणा

१४. जिस वेले से घड़ी पुजी ते से चेलया कन्ने रोटी खाणे बेई गया । १५. ते तिनी तिना जो गलाया, मिन्जो बड़ी भारी मरजी थी जे दुख सहने का पहले मैं तुम्हारे कन्ने ऐ रोटी खांवा । १६. किजो जे मैं तुसां कन्ने गलान्दा है जे जा तक परमेश्वर दे राज विच मैं पूरा नी होई जा ता तीकर तिस जो नी खावां । १७. ता तिनी कटोरा लेई करी धनवाद कीता ते गलाया इस जो

लेयो ते अपु मिते बंडी लेयो । १८. किजो जे मैं तुसां जो गलान्दा है जे जिन्दा तक परमेश्वरे दा राज नी आंगा तिधा तीकर अणे का मैं दाखे दा रस नी पींगा । १९. फिरी तिनी रोटी लेई ते धनवाद करी के तोड़ी ते से गलाई करी दिती जे ऐ मेरी देह है, जे तुम्हारे वास्ते दिती जान्दी है, ते मिन्जो याद रखने ताई ऐई करया करयो । २०. इयां ही तिनी रोटी बाद कटोरा लेया जे ऐ कटोरा मेरा खून है जे तुम्हारे वास्ते बहाया जान्दा है । २१. अपन दिखो मिन्जो पकड़ाने वाले दा हथ मेरे कन्ने भेजा उपराले है २२. किजो जे मनुआ दा पुत्र ते जदेया उस वास्ते थिये से है ही पर हाय उस मनुआ पर जसेरी बजहा कन्ने से पकड़गां । २३. तां से अपु मिते पुछने लगे जे हमारे विच से कुण है जे ऐ कम्म करंगा ।


सच्ची बड़ाई

२४. तिना विच ऐ गला बर्ता भी होई जे असां विच का कुस जो बड़ा समभेया जान्दा है । २५. तिनी तिना जो गलाया होर जातियां दे राजे तनेरे पर राज करदे हिन, ते जे तनेरे पराले हक रखदे हिन, से बड़े हुन्दे । २६. अपन तुसी अदेय मत होयो अपन जे तुम्हारे विच बड़ा है से हल्के सेये ते जे बड़ा है से नौकरा साई बने । २७. किजो जे बड़ा कुण है से जे भोजन वास्ते बैठया या से जे सेवा करदा है । क्या से नी जे खाने वास्ते बैठया ? अपन मैं तुम्हारा विच सेवक साई है । २८. अपन तुसी से हिन जे मेरे इम्तिहान विच सदा मेरे कन्ने रे । २९. ते जियां मेरे पिता ने मेरे वास्ते इक राज बनाया । ३०. तियां ही मैं भी तुम्हारे वास्ते बनांदा है, ता जे तुसी मेरे राज विच मेरे मेजा पर खाओ पियो अपन सिहांसना विच बेई करी इस्राइल दे बारहा गोत्रा दा न्याय करयो । ३१. शमौन, ओ शमौन दिख शैतान ने तुसा जो मंगी लेया है जे गेहूं साई तुसां जो फटके ।

पतरस दे अस्वीकार बी घटना पर यीशु बी भविष्यवाणी

३२. अपन मैं तेरे वास्ते प्रार्थना कीती जे तेरा विश्वास जान्दा न रे । ते जा तू फिरे ते अपने बेयाअला जो ठीक रखेया । ३३. तिनी तिस कन्ने गलाया हे प्रभु मैं तेरे कन्ने जेलखाने जाने अपन मरने जो भी तैयार है । ३४. तिनी

गलाया हे पतरस मैं तिजो गलान्दा है जे अज मुर्गे ने बांग नी देणी जिदा तीक तू तीन बारी मेरी ना नी करी लिंगा कि मैं तिस जो नी जान्दा । ३५. तिनी तिना जो गलाया जे जा मैं तुसां जो बॅनोर बटुए खोख ते जुते भेजया ते क्या तुसां जो कुसी चीज दा घाटा होया था ? तिना गलाया कुसी चीज दी नी । ३६. तिना तिना जो गलाया जे अवे जिस का बटुआ हो से तिस जो लेई ले ते तियां भोली



भी ते जिस का तलवार नी है से अपने कपड़े बेची करी तलवार ले । ३७. किजो जे मैं तुसां जो गलान्दा है जे ऐ जे लिखया दा है से अपराधिया दे कन्ने गनीया दा है तिस जो मेरे विच पूरा होणा चाहिन्दा कि जो जे मेरे बारे विच गला पूरी होने वाली हिन । ३८. तिना गलाया हे प्रभु दिख इते दो तलवारां हिन तिनी तिना जो गलाया मती हिन ।

गतसमनी

३९. ता से बाहर निकली करी अपनी रीती दे अनुसार जैतून दे पहाड़ा पर गया, ते चले तसेरे पिछे चली गये । ४०. तिस जगहा पुजी करी तिनी तिना जो गलाया प्रार्थना करो जे तुसी परीक्षा विच न पेई जाओ । ४१. ते से अपू तिना का बखरा इक बटै उपराले बेई गया दे ते गोडे टेकी करी प्रार्थना करने लगया । ४२. जे हे पिता तू चाहे ते इस कटोरे का जो मेरे का हटाई लै ता भी मेरी नी अपन तेरी मरजी पूरी होये । ४३. ता तिस जो स्वर्गादा इक दूत नजरी आया जे तिस जो जोर दिन्दा थिया ४४. ते से बड़ी भारी मुसीबता विच वेई करी अपने पीढ़ा कन्ने भरौये दे दिला कन्ने प्रार्थना करने लगया, ते तसेरा पसीना इयां बुझिन्दा थिया जियां खूने दे बड़े बड़े थोबे जमीना पर पिन्दे हिन ।

४५. ते से प्रार्थना का उठया ते अपने चेलया का आई करी तिना जो उदासी दे मारे सुते दे दिखया ते तिना जो गलाया जे सोन्दे किजो हिन ? ४६. उठा ते प्रार्थना करो ता जे तुसी परीक्षा विच ना पेई जाओ ।

यीशु दा पकड़ाया जाणा

४७. से ऐ गलाये थिया करदा जे इक भीड़ आई, ते उना बारह विच का इक जिसेरा ना यहूदा थिया तनेरे अगे अगे आये करदा थिया से यीशु का आया ते तिसा जो सुन्ना दिता । ४८. यीशु ने तिस जो गलाया ओ यहूदा तू सून्ना देई करी मनुआ दे पुत्रा जो पकड़ाया । ४९. तसेरे साथियां ने जा दिखया जे क्या होणे वाला है ते गलाया हे प्रभु क्या असी तलवार चलाइये । ५०. ते तिना विच का इक ने महायजक दे नौकर पराले चलाई करी तसेरा कन्न बड़ी सुटया । ५१. यीशु ने गलाया अवे बस करो ते तसेरा कन्ने पकड़ी करी तिस जो ठीक करी दिता । ५२. ता यीशु ने महायाजका, ते मन्दिर दे सरदारां ते पुरानियां जे तिन उपराले चढ़ी आये थिये, गलाया जे तुसी मिन्जो चोर समझी करी तलवारां ते सोटीयां लेई करी निकले दे हिन ? ५३. जा मैं मन्दिर च रोज तुम्हारे कन्ने थिया ता तुसां ने मिन्जो नी पकड़या अपन ऐ तुम्हार बेला है ते नेरे दा इस उपराले कबजा हो ।

पतरस यीशु जो अस्वीकार करदा है

५४. फिरी से तिस जो पकड़ी करी लेई चले ते महायाजक दे घरे लेई आये ते पतरस दूर दूर तसेरे पिछे चलदा थिया । ५५. ते जा से बिचे विच अग जगाई करी किठे बेई गये ते पतरस भी तसेरे विच बेई गया । ५६. ते इक कुड़ी ने तिस जो अग दी रोसनीविच दिखया ते तिसा पासे दिखी करी गलाने लगी ऐ भी ता तसेरे कन्ने थिया । ५७. अपन तिनी गलाया जे हे मनीये मैं तिसा जो नी जान्दा । ५८. थोड़ी देरा बाद कुसी होर ने वी गलाया जे तू भी तां तिना विच का है पर तिनी गलाया ओ मनुआ मैं नी था । ५९. कोई घंटे बाद इक होर ने गलाया जे जरूर ऐ भी तिसा कन्ने थिया किजो जे ऐ गलीली है । ६०. पतरस ने गलाया ओ मनुआ मैं नी जान्दा जे तू क्या गलांदा है ? से ऐ

गलाये थिया करदा जे मुर्गे ने बांग दिती । ६१. ता प्रभु ने हटी कर पतरस जो दिखया ते पतरस जो प्रभु दी गल याद आई जे तिस ने गलाई थी । जे बांग का पहले तू मैरा तिन बारी न करंगा । ६२. ते से बाहर निकली करी जोरे



जोरे रोने लगया । ६३. जे मनु यीशु जो पकड़ी के खड़े थिये से तिसा जो मजाक करी के ते फढ़ने लगे । ६४. ते तसेरी अखाँ पराले कपड़ा बनी करी गलाने लगे जे दस तिजो कुनी मारया । ६५. ते तिना होर मती गलां तसेरे पराले कितीयां ।

महायाजक दे सामने यीशु दी हाजरी

६६. जां दिन चढेया ते मनुआ दे महायाजक शास्त्री ते पुरानी किठे होई गये, ते तिसा जो अपनी महासभा विच लेई आये करी पुछया । ६७. जे तू मसीह है ते असां कन्ने गलाई दे, तिनी तिना कन्ने गलाया जे मैं तुसां कन्ने गलादा तुसां नी विश्वास करना ६८. ते जे मैं पुछा ते जबाब नी दींगे । ६९. अपन अवे का मनुआ दा पुत्र सर्वशक्तिमान परमेश्वरे दे दहिने पासे बिगा ७०. इसा पर सारेयां ने गलाया जे क्या तू परमेश्वरे दा पुत्र है ? तिनी तिना कन्ने गलाया ते नी आप ता गलान्दे किजो जे मैं है । ७१. तां तिना गलाया अवे असा जो गवाही दी क्या जरूरत है, किजो जे असां अपु तसेरे मूहां का सुणी लैया है ।

रोमिया दे राजपाल पीलातूस दे सामने यीशु बी हाजरी

२३ ता सारी सभा उठी करी तिस जो पीलातूस का लेई गई । २. ते से ऐ गलाई करी तिस पर दोष लगाने लगे, जे असां इस जो ऐ गलान्दे जे कैसर जो कर नी दैण ते अपु जो मसीह गलान्दा सुणया । ३. ते पीलातूस ने तिस जो पुछया जे क्या तू यहूदियां दा राजा है ? तिनी गलाया जे तू अपु ता है गलान्दा । ४. ता पीलातूस ने महायाजका ते मनुआ जो गलाया जे मैं इसेरे विच कोई बुराई नी दिखदा है । ५. पर से बड़ी जोरे गलाने लगे ऐ गलील का लेई करी इते तक सारे याहुदियां विच उपदेश देई देई करी उकसान्दा रेया ।

यीशु हेरोदेस दे सामने

६. ऐ सुणी करी पीलातूस ने पुछया जे ऐ मणु गलीली है ? ७. ते ऐ जानी करी जे से हेरोदेश दी रियासत दा है तिस जो हेरोदेस का भेजी दिता, किजो जे तिना दिना से भी यहूशलम विच ही था । ८. हेरोदेस यीशु जो दिखी करी बड़ा खुश होया, किजो जे बड़े दिना का से तिस जो दिखना चाहन्दा थिया, इस करी के जे तसेरे बारे विच सुणया थिया ते तसेरा कोई निशान दिखना चाहन्दा थिया । ९. से तिस का मती गल्ला पुछदा रेया पर तिनी तसेरा कोई जबान नी दिता १०. ते महायानक ते शास्त्री खड़ी करी तन मन कन्ने तिस पर दोष लगान्दे रे । ११. ता हेरोदेश ने अपने सिपाही दे कन्ने तसेरी बेईज्जती कीती । ते बड़े चटकीले कपड़े पुआई करी वापस पीलातूस का भेजी दिता । १२. तिसी रोज पीलातूस ते हेरोदेश दोस्त बनी गये । इसा का पहले इक दूसरे दे दुश्मण थिये ।

पीलातूस बरअब्बा कन्ने यीशु


१३. पीलातूस ने सरदार ते महायाजकां ते लोकां जो सदी करी गलाया । १४. तुसी इस मनुआ जो मनुआ जो खराब करने वाला गलाई करी मेरे का लयाये हिन ते दिखो, मैं तुम्हारे सामने तिस जो परखेया अपन जुना गल्लां दा तुसी तिस पर दोष लगान्दे हिन तिना गल्ला वास्ते मैं तिस विच कोई बुराई नी दिखी । १५. न हेरोदेस ने किजो जे उसने तिस जो हमारे को हटाई दिता है

ते दिखो तिस का अदेया कुछ नी होया जे तिस जो मौत दी सजा दिती जाये ।
 १६. इस करी के मैं तिस जोर दी मार पवाई करी छडी दिन्दा । १७. (साले
 विच इक दोषी जो ठढी दिन्दे थिये) १८. ता सारे लेरा दैणे लगे, जे इस जो मारी
 देयो ते हमारे वास्ते बरअब्बा जो छडी दे । १९. ऐ कुसी लड़ाई दी बजहा जे
 नगरा विच होया थिया, ये हत्था दी बजहा कन्ने जेलखाने आया थिया ।
 २०. अपन पीलातुस ने यीशु जो छड़ने दी मरजी कन्ने लोकां जो फिरी समझाया ।
 २१. अपन तिना जोरे कन्ने लेर देई करी गलाया, जे उसजो सूली पर चढा सूली
 पर चढा । २२. तिनी ती बारी फिरी तिना जो गलाया, किजो तिनी क्या
 बुराई किती है मैं तिसा विच मारने वाली कोई गल्ल नी दिखी इस करी के मैं तिस
 जो मार पवाई करी छडी दिन्दा । २३. अपन से लेरा देई देई करी पिछे
 पेईगे उस जो सूली पर चढाई दे अता तनेरी मरजी पूरी होई गई । २४. ते
 फिरी पीलातुस ने आज्ञा दीती जे तनेरी प्रार्थना दे अनुसार करो । २५. ते
 तिनी तिस मणु जो जे लड़ाई ते खून दी बजहा कन्ने कदैखाने विच थिया ते जिस
 जो से मंगदे थिये छडी दिता, अता यीशु जो तनेरी मरजी दे मुताबिक देई दिता ।

यीशु दा सूली उपराल चढाना

२६. जा से तिस जो लेई चले ते तिना ने शमौन जो ना दे इक कुरेनी जो
 जे ग्रां का आये करदा थिया, पकड़ी करी तिस पर सूली रखी दिती जे सें तिस जो
 यीशु दे पीछे पिछे लेई चले । २७. ते मनुआ दी बड़ी भीड़ तसेर पिछे चली
 पेई ते मती सारी जनानीया जे तिस वास्ते रोन्दी ते छाती पिटदीया थियां से भी ।
 २८. यीशु ने तिना पासे फिरी करी गलाया, हे यरुशलेम दी कुड़ियो मेरे वास्ते
 मत रोआ अपन अपने ते अपने बच्चे तीकर रोओ । २९. किजो जे दिखो से
 दिन आये करदे हिन जिस विच बोलगे धन्य हिन से जे बाभं हिन ते से गर्भ जे नी
 जमगे । ते से ममे जिन्हा ने दुध नी पियाया ३०. तिस वेले से पहाड़ा कन्ने गलान्गे
 जे असां पर रिड़की पेयो ते चोटीयां जो जे असां जो ढकी लेयो । ३१. किजो
 जे से हरे बूटे कन्ने इयां करदें हिन ते सूखे दे कन्ने क्या कुछ नी करेगे । ३२. से
 होर दो मनुआ जो जे बदमास थिये मारने जो लेई चले ३३. जिस वेले से उस
 जगह खोपड़ी गलान्दे हिन पुजे ते तिथे तिना उसजो कन्ने तिना 'दोना बदमासां
 जो इक सीधे पासे ते इक पुठे पासरे सूली उपराले चढाई दिता । ३४. ता यीशु

ने गलाया हे पिता इना जो माफ कर किजो जे ऐ नी जान्दे जे ऐ क्या करदे हिन ? ते फिरी तिना तसेरे कपड़े अपु मिते बंडी ले । ३५. मणु खड़ीते खड़ीते दि दे थिये, ते सरदार तिस जो छोड़ी छोड़ी गलान्दे जे इमी होरां जो बचाया जे ऐ परमेश्वर मसीह है ते तसेरा चुनया दा है ते अपु जो नी बचाई लैं । ३६. सिपाही भी नेड़े आई करी सिरके दा रस देई करी गलान्दे । ३७. जे तु यहूदियां दा राजा है ते अपु जो बचाई लैं । ३८. ते तसेरे सिरा पर लिखया थिया जे ऐ "यहूदियां दा राजा है" । ३९. जे बदमाश लटकाये दे थिये, तिना विच का




इक ने तसेरी बुराई करी के गलाया, क्या तू मसीहा है ? ते फिरी अपु जो ते असां जो बचाई लैं ४०. इस पर दुये ने तिस जो गलाया, क्या तू परमेश्वरे बला भी नी डरदा ? तू भी ता सेई सजा पाये करदा है । ४१. ते असी न्याय कन्ने सजा भुगते करदे हिन, किजो जे असी अपने कमा दा फल पाये करदे हिन, अपन इनी कोई गलत कम नी कीता दा है । ४२. ता तिनी गलाया । हे यीशु जा तू अपने राज विच आंगा ते मेरी सुधि भी लैयां । ४३. तिनी तिस जो गलाया मैं तेरे कन्ने सच्च गलान्दा है जे तू अज ही मेरे कन्ने स्वर्गलोक विच हुंगा ।

यीशु दी मृत्यु

४४. ते फिरी कोई दो पहरे का लेई करी तिये पहरे तीकर सारे. देशा मंभ नेरा रेया । ४५. ते सूर्य दी रोशनी जान्दी रेई ते मन्दिर दा परदा मजाटे का फटी गेया ४६. ते यीशु ने बड़े जोर कन्ने गलाया हे पिता मैं अपनी आत्मा

तेरे हथा विच दिन्दा है, ते ए गलाई करी तिनी प्राण छोडी दिते । ४७. सूबेदार ने जे किछ होया था दिखी करी परमेश्वरे दी बड़ाई करी के गलाया जरूर ऐ



मणु धर्मी थिया । ४८. ते भीड़ जे ऐ दिखने ताई कठीती थी, छाती पिटदी पिटदी वापस हटी गई । ४९. ते तसेर सारे जान पहचान वाले कन्ने जे जनानीया गलीलं बला आईयां थियां दूर खड़ी करी सब दिखदी थियां ।

यीशु वा रबया जाणा

५०. ते फिरी दिखो जे यूसुफ ना दा इक मन्त्री जे बड़ी खरा कन्ने धर्मी थिया । ५१. ते तिनेरे इना विचारा कन्ने कम का खुश नी था ते से यहुदिया दे नगरा ओरमतीया दे रहने वाला थिया ते परमेश्वरे दे राज जो भालदा थिया । ५२. तिनी पीलातूस का जाई करी यीशु दी लाश मंगी लेई । ५३. ते तिस जो उतारी करी चादरी विच लपेटी लेया, ते इक कब्र विच रखया जे चटाना विच खोदी दी थी, ते तिस विच कुसी जो नी रखया दा थिया । ५४. से तैयारी दा रोज थिया, ते ऐतवार वाला रोज शुरू होने वाला थिया । ५५. ते तिना जनानीयां ने जे तसेरे कन्ने गलील का आईयां थियां पिछे पीछे जाई करी तिस कब्र जो दिखया ते ऐ भी जे तसेरी लाश किया रखी गई है । ५६. ते हटी

करी खुशबू वाली चीजां कब्रे इत्र तैयार किता ते ऐतवार वाले दिन तिना आज्ञानुसार बसाअं किता ।

खाली कब्र

२४ अपन हफते दे पहिले रोज बड़े तड़के से खुशबू वाली चीजा जो तैयार करी के कब्र पर लेई गईयां । २. ते तिना ने पत्थर जो कब्र पर का लुढकया दा दिखया । ३. ते अन्दर जाई करी प्रभु यीशु दी लाश नी पाई । ४. जिस वेले से इस गल्ल का परेशान थियां ता दो मणु साफ कपड़े पाई करी तिना का आई खड़ीते । ५. जां से डरी गईयां ते जमीना पासे मुहं करी के खड़ी रेईया तां उना ने तिना जो गलाया, तुसी जिन्दया जो मरे विच किजो तोपदीयां हिन । ६. से इते नी है, पर जिन्दा होई गया है, याद करो, जे तिनी गलील विच तुसां जो गलाया थिया । ७. जे जरूरी है जे मनुआ दा पुत्र पापियां दे



हथा पकड़ाया जांगा ते सूली पर चढाया जांगा ते तसेरे रोज जिन्दा हुन्गा । ८. ता तसेरी गल्लां तिना जो याद आईयां । ९. ते कब्र का हटी करी तिना ने तिना ग्यारहा जो ते होरां जो ऐ गला सुनाईयां । १०. जिना कब्रे दूता ने ऐ गल्लां गलाईयां से मरियम मगदलीनी कब्रे यौअन्ना ते थाकूब दी माता ते तनेरे कब्रे दी होर जनानीयां थियां । ११. पर तनेरी गलां तिना जो कहानी साईं लगी, ते तिना ने तिनेरा विश्वास नी कीता । १२. ता पतरस उठी करी कब्र पासे दौड़ी गया, ते तिनी कपड़े पे दे दिखे, ते जे होया, तिस पर हैरान होई करी अपने घरे चली गया ।

इम्माऊस दे रस्ते च यीशु दा सामने आणा

१३. ते तिसी रोज तिना विच का दो जने इम्माऊस ना नगरा जो जाये करदे थिये जे यरुशलेम का कोई सात मील दूर थिया । १४. ते से इना सारी गल्लां पर जे होईया थीया, अपु मिते गला करदे जाये करदे थिये । १५. ते जिस वेले से अपु मिते गल बात ते पूछताट करे करदे थिये ते यीशु अपू नेडे आई करी कन्ने चली पैया । १६. अपन तनेरी आखां इदैई बन्द होई गई जे से तिस जो पछानी भी नी सके । १७. तिनी तिना जो पुछया ऐ क्या गल्लां हिन जे तुसी चलदे चलदे अपु मिते करदे हिन ? से उदास जने खड़ीगे । १८. ऐ सुनी करी तिना विच का क्लियुपास ना दे इक मणु ने गलाया क्या तू यरुशलेम विच किला पखला आदमी है, जे नी जान्दा जे इना दिना विच क्या क्या होया । १९. तिनी तिना का पुछया कुण गल्ला ? तिना तिस जो गलाया, यीशु नासरी दे बारे जे परमेश्वरे ते सारे मनुआ दे नेडे कमा ते बचना दा बड़ा भविष्यवक्ता थिया । २०. ते महायाजका ते हमारे सरदारां ने तिस जो पकड़ाई दिता जे तिस पर मौत दा हुकम दिता जाये ते तिस जो सूली चढ़ाया । २१. अपन असां जो उमीद थी ऐई इस्राएल जो छुटकारा दुवान्गा, ते इना सारी गला जो हाये अज तिया रोजे है । २२. ते हमारे विच का कित्ती जनानीयां ने असां जो हैरानी विच पाई दिता जे बभयागा कब्र पर गेईया थियां । २३. ते जा तसेरी लाश नी मिली ते ऐ गलान्दी हटी आईयां जे असां ने स्वर्गदूता दे दर्शन पाये जिना ने गलाया जे से जिन्दा है । २४. ता हमारे साथिया विचु का कितने कब्र पर गये ते जदेया तिना दसया तदेया ही पाया पर तिस जो नी दिखया । २५. ता तिनी तिना जो गलाया हे बुद्धुओ ते भविष्यवक्ता दी सारी पर विश्वास करने वालेयो । २६. क्या ऐ जरूरी नी थिया जे मसीह ऐ दुख चुकी करी अपनी महिमा विच आई जाये । २७. ता तिनी मूसा का ते सारे भविष्यवक्ता का शूरु करी के सारे पवित्र शास्त्र विच का अपने बारे दी सारी गलां तिना जो समझाईयां । २८. इतने विच से तिस ग्रांका पुजे जिते से जाये करदे थिये ते तसेरे ढंग का इयां गलया जे से अगे बदी चलेया दा है । २९. अपन तिना ने ऐ गलाई करी तिस जो रोकया जो हमारे कन्ने रेह किजो जे संज होई चली दी है । ते दयाडा अवे बड़ा डूबी मया दा है । ता से तिना कन्ने रहने जो

गया । ३०. जा से तिनेरे कन्ने रोटी खाणे बैठया ते तिनी रोटी लेई करी धन्वाद कीता ते तिस जो तोडी करी तिना जो देणे लगया । ३१. ता तनेरी आखी खुली गई ते तिना ने तिस जो पछानी लिया, ते से तनेरी अखां का लुकी गया । ३२. तिना ने अपु मिते गलाया, जिस वेले से रस्ते विच हमारे कन्ने गला करदा थिया, ते पवित्र शास्त्र दा मतलब असां जो समझान्दा थिया, ते क्या हमारे मना मंझ तेजी नी आई ? ३३. से उसी वेले उठी करी यरुशलेम जो हटी गये, ते तिना ग्यारहा ते तनेरे साथियों जो किठे दिखया । ३४. गलान्दे थे, प्रभु सच्ची जिन्दा होई गया है ते शमौन जो लभया थिया । ३५. ता तिना रस्ते वाली गलां तिना जो दसीयां ते ऐ भी जे तिना ने तिस रोटी तोड़दे वेले कियां पहचानेया ।

शिष्या पर यीशु बा प्रकट होणा

३६. ऐ गला करे करदे थिये, जे से अपु तनेरे विच आई खड़ीता ते तिना जो गलाया तुसां जो शान्ति मिले । ३७. अपन से डरी गये, ते समझे जे असी कुसी भूत जो दिखन्दे हिन । ३८. तिनी तिना कन्ने गलाया, किजो डरदे हिन ? कन्ने तुम्हारे दिला विच शक किजो पिन्दा है । ३९. मेरे हथा कन्ने पैरा जो दिखो जे मैं सेई है मिन्जो हथ लगाई करी दिखो किजो जे आत्मा दे हड मास नी हुन्दा जदेया तुसी मिन्जो दिखन्दे हिन । ४०. ऐ गलाई करी तिनी अपने हथ पैर दसे । ४१. जा खुशी दे मारे तिना जो पता नी लगया ते हैं रात हुन्दे थे ते तिनी गलाया क्या इते तुम्हारे का किछ खाने जो है । ४२. तिना ने तिस जो तली दी मछी दा टोटा दिता । ४३. तिनी लेई करी तनेरे सामने खादा । ४४. फिरी तिनी तिना जो गलाया, ऐ मेरी से गलां हिन, जे मैं तुम्हारे कन्ने रिन्दे वेले, तुसां कन्ने गलाई थियां, जे जितनी गलां मूसा दी कताबा थे भविष्कता ते भंजना दी कताबा विच मेरे बारे लिखी हिन सब पूरी हुन्गी । ४५. ता फिरी तिनी पवित्र शास्त्र जो समझने वास्ते तनेरी अकल खोड़ी दिती । ४६. ते तिना जो गलाया इयां लिखया दा है जे मसीह दुख चुके ते तसीरे रोज मुदियां का जी उठी होये । ४७. ते यरुशलेम का लेई करी सब जातिया दे मन फिराव दा कन्ने पापां दी माफी दा प्रचार, तसेरे ना का कीता जांगा । ४८. तुसी इना सारी गलां दे गवाह हिन । ४९. से कन्ने दिखा, जिसेरी प्रतिज्ञा

मेरे पिता ने कीती दी है, मैं तिस जो तुम्हारे उपराले उतारंगा, ते जिन्दा तिकर स्वर्गा दा विश्वास नी पांगे ता तीकर इसी नगरा विच रेही ।

स्वर्गारोहण

५०. ता से तिना जो बैतनियाह तिकर बाहर लेई गया, ते अपने हथ चुकी करी तिना जो आशीष दिती । ५१. ते तिना जो आशीष दिन्दे दिन्दे से तिना का बख होई गया ते स्वर्गा पर चुकी लिता गया । ५२. ते से तिस जो टेकी करी बड़ी खुशी कन्ने यरुशलेम जो हटी आये । ५३. ते रोज मन्दिर विच जाई करी परमेश्वरे दी स्तुति ते बड़ाई करने लगे ।

